

Matiu

Yesus nugau Ze Naliupet Matiu nug sikut weun

Agau e nugau zebigeg

Yesus go koli Mesgai wag simai darena, wai 35 mazicina, Matiu go Yesus nugau ze oi aidaneun du tub, gonug Yesus nugau Ze Naliupet e sikut weun. Matiu gonug ze e gonugau zaugul Zuda duailel sikut wai mareun. Zuda duailel go Uwait nug agal gumarabun du banou tapai mareun, alamau en abe memenin. Bo, agal du banou erunai alamau go i abiu, gonun, Yesus em e ebu aleun, goagal dabeleu alia alia mui darena, Yesus en goagal oiagab petak ab tam. Matiu nug Yesus go petak pet goagal gumarabun du banou abai marabun agau e sikut wai mareun.

Agau e sesamorabun en ze

1:1–2:23 Yesus go erunai zoun.

3:1-12 Ze ziwaraneun du, Zon nugau salau.

3:13–4:11 Zon nug Yesus ze zoronda, Satan nug Yesus bimag peun.

4:12–18:35 Yesus go Galili agaig ebu, Uwait nugau ze duailel awarai aidaneun.

19:1–20:34 Yesus go Galili agaig uteimai, Zerusalem ban uzan aleun.

21:1–27:66 Yesus go zobu tutak Zerusalem ban uzan darena, ein igul zoun.

28:1-20 Yesus go noumaimai, gonugau duailel ameagab ebu usalina, ag go uligemen.

Yesus Kristus nugau asagul bagegul wanimag.

1 ¹E Yesus Kristus* gonugau asagul bagegul goagal wanimag, go Yesus go Devit nugau ug, go han Abraham nugau ug.

²⁻⁶Abraham go agal memeag eiman betei Devit gumaraneun du, goagal wanimag sikut e wai memen, dareu:

go Abraham,

Abraham nugau nag Aisak,

Aisak nugau nag Zekop,
 Zekop nugau nag Zuda, gonugau amagul abai,
 Zuda nugau nag Peres, go Sera dual goagal anaiag Tamar,
 Peres nugau nag Hesron,
 Hesron nugau nag Ram,
 Ram nugau nag Aminadap,
 Aminadap nugau nag Nason,
 Nason nugau nag Salmon,
 Salmon nugau nag Boas, gonugau anag Rahap,
 Boas nugau nag Obet, gonugau anag Rut,
 Obet nugau nag Zesi,
 Zesi nugau nag, gumaraneun du King Devit.

7-11 Devit dareun ziwases ebu, Israel duailel Babilon uzan hiacaranem
 imarai wanemen, go asagul bagegul goagal wanimag:

go Devit,
 Devit nugau nag Solomon, go Uria nugau wau nugau nag,
 Solomon nugau nag Rehoboam,
 Rehoboam nugau nag Abia,
 Abia nugau nag Asa,
 Asa nugau nag Zehosapat,
 Zehosapat nugau nag Zehoram,
 Zehoram nugau nag Usia,
 Usia nugau nag Zotam,
 Zotam nugau nag Ahas,
 Ahas nugau nag Hesehia,
 Hesehia nugau nag Manase,
 Manase nugau nag Emon,
 Emon nugau nag Zosaia,
 Zosaia nugau nag Zehoiakin, gonugau amagul abai.

12-16 Babilon* uzan Israel duailel betei daremen ziwases ebu, betei Yesus
 usaleun ziwases ebu, e asagul bagegul goagal wanimag:

go Zehoiakin,
 Zehoiakin nugau nag Sealtiel,
 Sealtiel nugau nag Serubabel,
 Serubabel nugau nag Abiut,
 Abiut nugau nag Eliakim,
 Eliakim nugau nag Asor,
 Asor nugau nag Sadok,
 Sadok nugau nag Akim,
 Akim nugau nag Eliut,
 Eliut nugau nag Eleasar,
 Eleasar nugau nag Matan,

Matan nugau nag Zekop,
Zekop nugau nag Zosep, go gonugau wau Maria, go Yesus nugau
anag.

Yesus go Kristus. Wanib go bigeg 'Uwait nug palautoroun, koli
imaigabun du'.

¹⁷Gonun, go asagul bagegul 14 goagal ug eiman ag Abraham daneun
ziwas eiman, zoizoi Devit dareun ziwas ebu daremen. Asagul bagegul
ipal ag 14 goagal ug eiman, Devit dareun ziwas eiman zoizoi Babilon
uzan hiacaranem daremen ebu daremen. Zoizoi, asagul bagegul 14
goagal ug eiman hiacaranem daremen eiman, zoizoi Yesus Kristus
usaleun ziwas ebu daremen.

Maria nug Yesus Kristus soligweun.

(Luk 2:1-7)

¹⁸Yesus Kristus erunai usaleun? Gonugau usaleun igul enai. Gonugau
anag Maria go Zosep wabun tapai memen. Bo, getal du go air dual i
igarau ebu, Maria go abe meun Uwait nugau Ah Wes nug go enib a meun.
¹⁹Zosep go igul unum naliu macaneu. Gonun, go duail el ameag ebu
Maria utaba, Maria ougab eg wamau. Guzenaimai, go wage wageimai
Maria utabun dabeleun. ²⁰Bo, Zosep go air utabun dabeleu una una,
Uwait nugau tibur* nug wabil eiman guzenai aureun, "Zosep. Devit
nugau asag, Uwait nugau Ah Wes gonugtal Maria enib a meun. Gonun, na
air go wabun iboin, go nait air. ²¹Mogoi go soligwaba, na gonugau wanib
Yesus men. Wanib go bigeg 'gonug gonugau duail el agal igul eg zilagai
maraimai, ag koli imaramau'."

²²Go ziwas ebu, igul go unum Dubanou Ban nug Uwait nugau ze
doimai, awaraneun du*, Aisaia, aureun sultal go petak usaleu. Aisaia nug
eneun,

²³"Air magun tub go du dual ninab tam, go enib a maimai, go mogoi
soligwamau, mogoi go wanib Emanuel amam. Go bigeg enai,
'Uwait ig ibaig dareu'."

Aisaia 7:14

²⁴Guzenaimai, Zosep go asaimai, Uwait nugau tibur nug aureun sultal
gonugau air Maria koli oun. ²⁵Bo, Zosep air go dual ninab tam gaul dai
dai, betei Maria go mogoi soligweun. Mogoi soligwina, Zosep nug mogoi
go wanib Yesus meun.

Ureb nanalanemen dudu go Yesus piabun alemenin.

2 ¹Yesus go anag nug Betlehem uzan Zudia agaig ebu nanag
soligweun. Ziwas go ebu, Herot go gue emgasag gumaraneun du
banou king dareun. Maria mogoi soligwai darena, am zuaneun ebulan
abi macanemen dudu ipal go ureb awau usalina, uligaimai, ag go ureb
sesamorai Zerusalem ban uzan alemen. ²Go alaimai, goagenag dudu go

ebuan guzenai kanabai awaremen, “Zuda* agal gumarabun mogoi awau usaleun, go erueim dareu? Ig gonugau ureb am zuaneun eiman usalina, uligaimai, ig go ulagwag murabun alem.”³ Emgasag gumaraneun du Herot ze go doimai, go ougab eg weun, duaille Zerusalem uzanan unum go ereg oiagab eg wemenin.⁴ Gonun, Herot nug Uwait ula dacanemen dudu banban* mui kasai ze tapaimaranemen dudu* mui go unum ze palautai marena, alina, kanabai awareun, “Kristus, Uwait nug go palautaba, alamau, go du go eru ebu zoi dareu?”

⁵Goagen koli go auremen, “Betlehem uzan Zudia agaig ebu. Getal Uwait nugau ze doimai, awaraneun du nug guzenai sikut wai meun:

⁶‘Betlehem, na uzan ginampet Zudia agaig ebu, na uzan ipal piagsal i damam. Tam pet. Nait du banou tub usalamau. Du go usalamau go izal Israel* duaille gumaramau.’

Gonun, go Betlehem uzan usalamau.”

Maika 5:2

⁷Guzenai aurina, Herot nug wage wageimai, dudu go am zuaneun ebuan kanabai awareun, “Go ureb ein ziwias ebu usaleun?” Goagal ze koli doimai, ⁸go Betlehem uzan palautaraimai, guzenai ze awareun: “Ag beteiban, mogoi go suban itanai betei peiban, iz koli alai ailan. Guzenebi, izaban beteimai ulagwag murai.” Go mogoi go betei wai hiabun aimai guzenai polu ze go awareun.

⁹⁻¹⁰Gonun, ureb nanalanemen dudu go Herot nugau ze doimai, utei wanemenin. Go abu bete betei, ureb go getal am zuaneun eiman uligemen. Ureb go amegai betei mogoi go dareun zau ebu wag dareun uligaimai, ag oiagab naliu usalina, siksikemenin.¹¹ Ag betei zaeim go simai, mogoi go gonugau anag dual dareun uligaraimai, taubib waimai, mogoi go ulagwag moromen. Guzenaimai, ag ecesab ipal wanib aiwag gol mui, garai ipal mui, a ilau nugau sous naliu mui, unum oimai, mogoi go gotulai moromen.

¹²Ag mogoi go ece moroimai, daren daren, Uwait nug wabil eiman ze guzenai awareun, “Ag koli Herot waugab i bitamamen.” Gonun, dudu go abu tub eiman goagal uzan koli wanemenin.

**Zosep wau Maria dual go mogoi imai aimai,
uminai Izip emgasag wanemenin.**

¹³Ureb nanalanemen dudu utei wanena, Uwait nugau tibur tub nug zoimai, wabil eiman Zosep guzenai aureun, “Herot nug mogoi wai hiabun itanai dareu. Gonun, na pigai asaiba, mogoi anag dual imaraiba, Izip emgasag betei dacan. Aiu ses, izanag koli aizemin, ag koli alamamen.”

¹⁴Go umaumtal, Zosep go asaimai, mogoi anag dual Izip emgasag imarai beteun.¹⁵Go, go ebu betei darena, Herot noumeun. Guzenaimai, ze go getal Uwait Ban nug gonugau ze doimai, awaraneun du eiman aneun go petak usaleun,

‘Izal mogoi Izip emgasag ebuan ulina, aleun.’

Hosea 11:1

Mogoi ginaginamul unum wagarina, noumemen.

¹⁶Zosep go Izip emgasag wanena, Herot go ureb nanalanemen dudu agen polu moroimai, wanemen ze doimai, go aigsisileun. Gonun, gonugau malai dudu awarina, go Betlehem uzan mui, uzan ipal Betlehem uzan waugab daremen mui, ag go uzanan mogoi ginaginamul ap zanemen, wai aliag a mui, ulisan mogoi ginaginamul mui, unum wagarina, noumemenin. Einen, ureb nanalanemen dudu go agen ziwag go ebu ureb go usaleun auremen.

¹⁷Igul go Uwait nugau ze doimai, awaraneun du Zeremaia nug ze meun ulis petak usaleu:

¹⁸Go guzeneun,

‘Rama* uzan weinemen saiu domenin. Resel go gonugau gelegul en manil mai dareu. Ailel ipal agen gonugau ougab naliu usalabun ze aurina, go agal ze duab tam. Go koli manil mai dareun. Gonugau gelegul i daremen, unum noumemenin.’

Jeremaia 31:15

Zosep wau Maria dual koli Yesus imai aimai, Nasaret uzan betemenin.

¹⁹Dai dai, Herot noumina, Uwait nugau tibur nug Zosep Izip emgasag dareun wabil eiman zoimai aureun, ²⁰“Na asaiba, mogoi gonugau anag dual koli Israel agal em ebu imarai bitamam. Einen, dudu go ag mogoi wai hiabun emen go noumemen.” ²¹Gonun, Zosep go asaimai, mogoi go anag dual koli Israel goagal em ebu imarai beteun.

²²Herot go noumina, Arkelaus go gonugau memeg nugau empip zoi oimai, Zudia agaig gumeun. Zosep go ze go doimai, go ebu bitabun umineun. Go uminina, Uwait nug wabil eiman ze asiu suban morona, go Zudia agaig siab tam, Galili agaig beteun. ²³Go betei Nasaret uzan em oun. Guzenaimai, Uwait nugau ze doimai, awarenemen dudu agen ze memen go petak usaleun: ‘Go Nasaret uzanan du.’

Zon, ze ziwaraneun du gonug dualiel ze awareun.

3 ¹Yesus go ban mina, ziwag go ebu, Zon, ze ziwaraneun du, go du tamacag uzan Zudia agaig em ula ebu salau bigegweun. ²Zon nug duaille go waugab alina, awareun, “Ag agal igul eg ebuan koli kekulan. Einen, Uwait ag gumarabun ziwag aleu!” ³Zon nugen Uwait nugau ze doimai, awaraneun du Aisaia nug getal dabeleimai, ze meun:

“Du tub, go du tamacag uzan em ula ebu ulai dareu. ‘Dubanou Ban nugau abu suban kalai moron. Gonugau abu tuguiyai moron!’”

Aisaia 40:3

⁴Zon nugau tibur galau egun kamel ulig oimai, tibur galau patai meun, go egun tub galau oimai, let sul tuageun. Go ta mui, guap ze ilau

mui, zaneun. ⁵Zerusalem uzanan duail el mui, duail el ipal unum Zudia agaig ebu darem mui, Zordan Ze gasag danemen duail el mui, unum go waugab alemen. ⁶Ag agal igul eg Uwait aurina, Zon nug Zordan Ze ebu ze ziwareun*. ⁷Zon go Parisi* Sadiusi* dudu asiu ze ziwabun alemen uligaraimai, gonug awareun, “Ag man nugau ug sul, agal igul eg pet Uwait nugau aigsisilaba, wagarai hiabun ziw as ebu ag eru uminai unamamen? ⁸Ag agal igul eg semoroiban, oiagab kekulan. Go dudu ipal abiu mamamen agal igul eg ebuan koli kekulemen. ⁹Ag agal dabeleu eim guzenai ze i macan, ‘Abraham go igual asanig. Gonun, Uwait nug ig isanigaba, ig naliu damam.’ Iz ag petak pet awarem e aiwag em ebu darem Uwait nug oimai, Abraham nugau asagul sul usalai marabun iboin. ¹⁰Uwait nugau ebeg nug man pataimai, a dulu ebu mai dareu. A dab ipal suban i useg maneu, man nug go a kuataimai, oi ab unig oug hiba, ilamau. ¹¹Iz ulis ze sil ag ze ziwaranem, go agal igul eg ebuan kekulabun guzenemin. Bo, du tub ses alai dareu, gonugau gusig nug izal gusig zilacuramau, gonug Uwait nugau Ah Wes ab mui eiman ze ziwaramau. Iz go zilacurabun iborain tam, iz du naliu tam. Gonun, iz gonugau arab galau gamai murabun iborain tam. ¹²Go savol ebeg sil patai dareu, go savol sil wit uleimai, wag hina, wol nug wit sog go puaicina, wit useg naliu oimai, gonugau zaueim gotulai mamau, sog oimai, ab i noumaneu ebu agamau.”

Zon nug Yesus ze zioreun.

(Mak 1:9-11; Luk 3:21-22)

¹³Ziwas go ebu, Yesus go Galili agaig uteimai, betei, Zordan Ze ebu go Zon nug ze zioramaun en aleun. ¹⁴Bo, Zon nug Yesus gonugau dabeleu koli kekulabun aimai aureun. “Na igul go i men. Nagen iz ze ziwilabun iboin. Na einen izan ze ziwizabun en aimai alem?” ¹⁵Yesus nug koli aureun, “Erunamau, ulis nagen guzenen! Uwait nugau igul ig unum mamam. Ig guzenemun, Uwait uligigeimai, enamau, igul go tugui anau.” Gonun, Yesus nug Zon aureun sultal Zon guzeneun.

¹⁶Zon nug Yesus ze ziorana, go pigai ze uteimai, gasag zoun. Go gasag zoimai, Uwait nug Mesgai im oitina uligeun, go Uwait nugau Ah Wes meg kurumuk sul go ziw as alaimai, gagalig wag hei dareun uligeun. ¹⁷Uwait Ban nug du tub nugau zeu sul eiman Mesgai wag eim ulina, doun, “E izal naguai pet go en izal oiab nug noumanem. Izal oiab nug go en naliu usalai dareu.”

Satan nug Yesus bimag peun.

4 ¹Guzenaimai, Uwait nugau Ah Wes nug Yesus du tamacag uzan em ula ebu Satan nug bimag piabun imai beteun. ²Gil 40 Yesus go ee tamacag we dareun. ³Ziwas go ebu, Satan nug go waugab zoimai,

aureun, “Na Uwait nugau Nag aba, na aiwag e auremen, *bret* kekulaba, zenen.”

⁴Bo, Yesus nug koli gusig ze aureun, “Ei, Uwait nugau ze eim guzeneu,

‘Du *bret* sag zaimai, awau i damau, Uwait nugau ze tutak sesamoraimai, petak awau damau.’”

Lo 8:3

⁵Guzenaimai, Satan nug Yesus Zerusalem ban uzan imai beteimai, Uwait ecesab muranemen zau banou wag meun. ⁶Guzenaimai, aureun, “Na Uwait nugau Nag aba, nagtal go eiman em ebu kuanai nonen? Uwait nugau ze eim guzeneu,

‘Uwait nug gonugau tibur na en awaramau: Goagen nait eben tubaim tubaim pataimai, imaizei numam. Guzenebi, aiwag tub nug nait aram i wamau.’”

Buk Song 91:11-12

⁷Yesus nug koli gusig ze aureun, “Ei, bo, Uwait nugau ze nug guzeneu, ‘Na nait Uwait Ban bimag i pen.’”

Lo 6:16

⁸Satan nug Yesus em manam banou pet wag imai simai, ece unum gusig mui em e ebu dareu abai moroun. ⁹Satan nug aureun, “Na iz en taubib waiba, na iz ulapwag milemen, e ece na uligai darem go unum na mizai.” ¹⁰Guzenina, Yesus nug aureun, “Satan, na utei alien! Uwait nugau ze nug eneu,

‘Na nait Uwait Ban tutak ulagwag moren. Na Uwait nugau salau sag oi muramam.’”

Lo 6:13

¹¹Guzenai aurina, Satan go Yesus utei waneun. Uwait nugau tibur agen alaimai, Yesus isanoromen.

Yesus go Galili agaig ebu salau bigegweun.

(Mak 1:14-15; Luk 4:14-15)

¹²Ziwas go ebu, Yesus go Zon hiacaranem zau oug hemen ze doimai, uzan go utei Galili agaig ebu beteun. ¹³Go Nasaret uzan sag i dareun, go betei Kapaneam uzan dareun, uzan go Galili Ze Unig pezoroi, Sebulun zaug Naptali goagal ug agal em be ebu betei dareun.

¹⁴Guzenaimai, igul go Uwait nugau ze doimai, awaraneun du Aisaia nug getal ze meun sultal petak usaleu.

¹⁵‘Sebulun nugau em mui, Naptali nugau em mui, ban abu ibut ze gasag em dareu mui, Zordan Ze gasag tubaim, Galili agaig ebuan duail el mui ipal uzanan duail el mui agal oiagab Uwait en petak i anemen go danemen. ¹⁶Go ebuan duail el ag umus oug daremen, ag al banou pimamen! Duail el ipal ag unum em umus oug pet nuaporoi daremen ag han al hilanau pimamen.’”

Aisaia 9:1-2

¹⁷Ziwas go ebu, Yesus gonugau salau bigegwaimai, guzenai aneun: “Uwait ag gumarabun ziwas aleu. Gonun, agal igul eg ebuan koli kekulan!”

Yesus nug karuk wanemen dudu iwanarai ulareun.

(Mak 1:16-20; Luk 5:1-11)

¹⁸Yesus go Galili Ze Unig gasageim ai dai dai bete betei, karuk wanemen dudu aliag piareun. Du tub Saimon, (gonugau wanib tub Pita) gonugau amag wanib Andru, go karuk wabun zo ban ze oug hei daremen. ¹⁹Yesus nug guzenai awareun, “Ag alan, iz sesamilebi, izan ag duaille imarabun igul abai marai.” ²⁰Yesus nug guzenai awarinatal, zaug dual goagal karuk wanemen zo mui, ecesab ipal tebil ebu uteimai, pigai Yesus sesamorai wanemen.

²¹Go betei, du aliag piareun. Du go Zems, gonugau amag Zon dual, go Zebedi nugau gelegul aliag. Go agal memeag Zebedi dual goagal tebil ebu daremen, go agal karuk wanemen zo bigageun, gonun, suban kasai daremen. Yesus nug dudu aliag go ulareun. ²²Go pigai goagal tebil mui, goagal memeag mui, uteimai, Yesus dual wanemen.

Yesus go ebeu duaille kasareun.

(Luk 6:17-19)

²³Yesus go Galili agaig ai dai dai beteimai, Uwait nugau ze naliupet Zuda duaillel agal gotulanemen zaueim simai, awareun, “Uwait go alai koli duaillel imaramau.” Yesus go ze guzenai awaraimai, duaillel ipal suiag mui, ebeu mui, wes eg a mui, kasareun.

²⁴Duaillel gonugau igul uligaimai, zeze mai betena, Siria agaig unum doi bitenar. Gonun, go ebuan dudu agen ipal ebeu dudu asiu mui, dudu mu banou a mui, dudu wes eg goagal oiagab oug dareu mui, ebeu patai hamaracaneun mui, aramag ebeag noumeun dudu mui, Yesus waugab imarai alina, gonug unum kasareun. ²⁵Duaillel asiu asiu Galili agaig ebuan mui uzan ginaginam houhou wanib banou Dekapolis ebuan mui, Zerusalem uzanan mui, Zudia agaig ebuan, em Zordan Ze tubaim mui, go unum Yesus sesamorai wanemen.

Em manam ebu, Yesus nug duaillel Uwait nugau ze awareun.

5 ¹Yesus go duaillel asiu uligaraimai, betei em manam tub ebu hoboi dareun. Guzenina, gonugau tapaimaraneu dudu agen go waugab alemen. ²Go guzenina, Yesus go ein igul memen goagal oiagab naliu usalamau aimai awareun. Go guzenai awareun:

³“Duaillel inen ag abiu agtal agal doropag isanurabun iborain tam, agtal igul naliu mabun iborain tam, gonun go agal oiagab naliu damau. Uwait nug ag gumaramau.

⁴Duaillel inen ag weinai dacanemen, go agal oiagab naliu damau. Uwait nug duaillel go agal oiagab eg koli suban maraba, damamen.

⁵Duaillel inen agal wanimag agtal wag i macanemen, go agal oiagab naliu damau. Uwait nug ag ece marabun awareun, go unum agal umamen!

⁶Duailen inen ag Uwait nugau igul naliu wabun salau gusig mamamen, go agal oiagab naliu damau. Einen, Uwait nug agal salau memen uligaraimai, isanaramau.

⁷Duailen inen ag duailen ipal en bisomagar piaranemen, go agal oiagab naliu damau. Uwait nug guzental ag en bisomag pimau!

⁸Duailen inen ag oiagab oug unu tamacag, go agal oiagab naliu damau. Ag Uwait pimamen.

⁹Duailen inen agal salau go dudu ipal alalebi, gaul dabun kuatai aidanemen, go agal oiagab naliu damau. Uwait nug ag izal gelear alear awaramau!

¹⁰Duailen inen ag igul naliu mui, Uwait nugau salau morobi, dudu ipal agen uligaraimai, aiag sisilaimai, uhu ipal ag ebalagab mebi, go agal oiagab naliu damau. Dudu go aiu ses Uwait nugau uzan simam.

¹¹Ag iz sesamilai aidabi, dudu ipal ag uligaraimai, polu ze enimag ebu maimai, ze biabial kuaimai, wagebi, ag oiagab eg i umau, ag oiagab naliu damau. ¹²Ag oiagab naliu damau, einen, Uwait nug ece naliu ipal tapai mareun Mesgai wag dareu aiu ses umamen. Igul go getal igual embigeg ipal agen Uwait nugau ze doimai, awarenemen dudu wagaremenin sultal dudu goagen han ulis ag guzenaramam.”

Duailen oiagab petak emen ag siu mui, al mui sul.

(Mak 9:50; Luk 14:34-35)

¹³Yesus nug koli awareun, “Duailen agal oiagab petak emen unum ag siu sul. Bo, siu go kel tamacag usalaba, koli siu go kel usalabun iborain tam. Go unum eg weun, ag hamacina, duailen agen aramag sil tapai hiacanemen!

¹⁴Duailen agal oiagab petak emen go ag emgasag agal al sul. Ban uzan em tabag ebu zau macanemen go wagemabun iborain tam.

¹⁵Du tub nug gonugau al usaimai, mis oug i macaneu. Go al usaimai, wag araog asai mina, duailen unum gonugau hilanau ebu dacanemen. ¹⁶Igul go sul agal al hilanau duailen go agal ameag ebu maramamen. Guzenaimai, goagen ag ein igul naliu guzenemenin go uligaimai, agal memeag Mesgai wag dareu go gonugau wanib ulagwag mamam.”

Yesus nug duailen Uwait nugau kasai ze awareun.

¹⁷Yesus nug kolital duailen awareun, “Ag iz Moses nugau kasai ze mui Uwait nugau ze doimai, awarenemen dudu agal ze maremenin go oi hiabun alem ta ag guzenai i dabilan. Bo, iz ze go oiabun alab tam, iz agal ze go iborabun alem. ¹⁸Iz petak pet awarem, Mesgai mui em mui daremen ziwaz ebu kasai ze ginampet tub i wagemamau. Goagal ze tutak tutak unum petak pet usalamau, ziwaz go ebu petak, agal kasai ze poamau. ¹⁹Guzenaimai, du in nug kasai ze go ginampet pet i

sesamoramau, gonug dudu ipal gonugau igul abai maramau, gonugau wanib Uwait nugau amegwab ginampet pet damau. Ze tub go enai, na du in nugau kasai ze ginampet go unum sesamoramau, na han dudu ipal igul go abai maramam nait wanim go Uwait nugau amegwab banou damau. ²⁰Iz ag petak awarem, agal oiagab Uwait en petak aimai, agal igul naliu abiu macanemen dudu mui, Parisi dudu agal ze tapaimaranemen dudu mui, zilacarab tam, ag petak, Uwait nugau gumarabun uzan simai dabun iborain tam.”

Yesus nug dudu aiag sisilaneu koli oiagab naliu usalabun ze mareun.

(Luk 12:57-59)

²¹Yesus nug kolital awareun, “Ag ze e getal asanagar agen awarina, duanemen,

‘Na du tub wemen, i noumamau. Du in nug du tub waba, noumamau go ze sisieranemen dudu amegwab ebun imai bitamam.’

Kisim Bek 20:13

²²Bo, ulis iz ag awarem, du in go gonugau zaug dual iwai mamau, go ze sisieranemen dudu waiagab imai bitamam. Du in go gonugau zaug ze biabial kuai auramau, go Zuda agal kaunsel ebun imai bitamam. Du in go gonugau zaug auramau ‘Na kar niwaneu du’ ai auramau, du go gue Satan nugau ab unig oug numau. ²³⁻²⁴Gonun, na nait egun ta, ee ta oimai, Uwait nugau ece murabun biz ebun mabun oi alamam, bo, koli dabilamam nait zaun na ibaiz ze a auremen, na utei koli beteiba, nait egun ta, ee ta biz go waugab men. Beteiba, nait zaun dual ze maimai, agal oiagab tutak maiban, na koli alaiba, nait ece oimai, biz go ebun maimai, Uwait muramam.

²⁵Bo, na du tub dual ze sisianemen dudu waiagab bitabun ag abu ebun bete beteimai, ziwag go betei betemen ebutal agal ze koli oiagab naliu usalabun suban zeze mamamen. Guzenamamen, go na ze sisianemen dudu waiagab imaiz i bitamau. Na igul go i guzenamam, gonug na ze sisiraneneu du nugau ebeg ebun mizaba, gonug na *polis* nugau ebeg ebun mizaba, *polis* nug hiacaranem zau oug heizamau. ²⁶Gonun, na go zau eiman koli uzaneim nuabun gaul i palautizamam. Bo, na aiwag banou mabun aizeun guzentel unum maremen, petak na uzaneim palautizebi, numam.”

Yesus nug air omenin dudu ipal wal igul macanemen en ze mareun.

²⁷Yesus nug kolital awareun, “Ag ze getal guzenai ze mina, domenin.

‘Na air omen du ailel ipal abai wal igul i men.’ *Kisim Bek 20:14*

²⁸Bo, iz guzenai awarem, du tub go air tub uligaimai, gonugau ougab asaba, eg murai aimai dabeleun, du go gonugau ougab oug air go dual igul eg meun.

²⁹Gonun, na nait amen naliu eiman igul eg mabun nait bimag piba, amen go eseiceiba, amamam! Go amen ginampet amacen, nait enim unum mui Satan nugau ab banou muzmuz ilaneu uzan i heizamam.

³⁰Nait eben naliu eiman igul eg mabun nait bimag piba, go eben naliu eiman kuataiba, amacen. Na eben hogu damau, go iboi, nait enim unum Satan nugau ab banou muzmuz ilaneu uzan i heizamam.”

Yesus nug duaille egaraimai, agzozou uta utaremenin en ze mareun.

(Matiu 19:9; Mak 10:11-12; Luk 16:18)

³¹Yesus nug koli awareun, “Getal go guzenai ze memenin, ‘Du in go gonugau air utaba, unamaun en go agau ginampet tub ebu sikut waimai, air moroimai, air go utaba, unamau.’ *Lo 24:1-3*

³²Bo, iz ag awarem, du tub gonugau wau wal igul eg mab tam, gaul utamau, du go nug igul eg pet gonugau wau ebu meu. Go gonugau wau uhu muraneu, einen, wau go koli du tub uba, go duair egarabun agal kasai ze etuborou. Du tub air go umau, du go han kasai ze go etuborou.”

Yesus nug duair baib mabun igul en ze mareun.

³³Go koli eneun, “Ag getal duaille guzenai awaremen domenin, ‘Na ein baib Uwait dual memenin go i utamam, bo, na ein baib Uwait Ban dual memen guzentel, go guzentel sesamoramam.’ *Wok Pris 19:12*

³⁴Bo, ulis iz ag awarem, na ze tub maimai, ze go baib mui aimai i gusig men. Na ze maimai, na Mesgai nugau wanib i paten, einen, Mesgai go Uwait nugau hobo dacaneun biz. ³⁵Na em gaul i wanib paten, einen, go ebu Uwait gonugau arab maimai, i mai dacaneu. Na Zerusalem wanib i paten, einen, go go Uwait igual gumiganeun du banou gonugau ban uzan. *Buk Song 48:2* ³⁶Na ze tub maimai, na gagalin pataib, ze go dabeleimai, i gusig men, einen, nait gagalin ulig tub auremen, ausiau ta, mutuanau ta, i usalamau. ³⁷Na gaul guzenai ze mamam, ‘io’ ta, ‘tam’ ta, amam. Na ein ze tub maranem, ze go Satan nug eiman alaneu.”

Yesus nug dudu goagal zaiagar agen wagarina, go koli goagal zaiagar abai i alalabun en ze go mareun.

(Luk 6:29-30)

³⁸Yesus nug koli eneun, “Getal ag guzenai ze mina, domenin, ‘Du tub nug nait amen eg wai mizaba, nagen han koli gonugau ameg eg wai muramam, du tub nug nait ain kuaba, nagen han gonugau aceg kuai muramam.’ *Kisim Bek 21:24*

³⁹Bo, ulis iz ag awarem, du tub nug niwaba, na koli go i wen. Du tub nug nait siben naliu eiman niwaba, koli kekulaiba, siben nanai eiman moromena, niwamau. ⁴⁰Ze tub enai, du tub nug na ze sisarianemen du ebu imaiz bitamoroi nait tibur galau huia uba, na kuatai ze i auren. Utemen, nait tibur galau tub han umau.

⁴¹Ze tub enai, malai du tub nug gonugau zo oimai, abu huia imaillei beten aizaba, nagen han du go imai aimai, abu ginam huia pet imai bitamam. ⁴²Ziwas tub ebu, du tub nug nait ecesab wabun aizaba, na kuatai ze i auren, na go moren. Du tub nug mui nait ee ta, ecesab ipal ta oimai, ‘Koli ameg mizai aimai aizaba, na i galinen, na go moren.’”

Yesus nug duaillel guzenai awareun, “Agal iwai zaiagar en oiagab nug noumamamen.”

(Luk 6:27-28, 32-36)

⁴³Gonug koli eneun, “Getal ag ze guzenai memen domenin, ‘Nait ounab nug nait zaun en sag noumanem, bo, na nait iwai zaunar en ounab nug i noumanem.’” *Wok Pris 19:18*

⁴⁴Bo, ulis iz ag awarem, agal iwai zaiagar en oiagab nug noumaiban, dudu go en ag wagaremenin en ag Uwait nug isanarabun auramamen.

⁴⁵Gonun, ag agal memeag Mesgai wag dareu nugau gelegul alegul usalamamen. Uwait nug am usalai maimai, al hilanau duaillel eg mui, duaillel naliu mui, al go maraneu. Ze han guzental duaillel naliu mui, Satan nugau igul eg macanemen dudu mui, ereg ze hei maraneu. ⁴⁶Dudu ipal agenag ag en oiagab noumanem, agenag han koli dudu go en sag oiagab noumamamen. Guzenamamen, Uwait nug ag ece naliu tub maramau ta? Dudu go igul eg mui goagenag han guzental guzenanemen. ⁴⁷Ag agal zaiagar tutak “Io” awaremen, ag dudu ipal “Io” i awaramamen. Agal igul nug duaillel ipal agal igul i zilaramau. Einen, Uwait nugau ze i duanemen dudu agen han guzental guzenanemen. ⁴⁸Agal memeag Mesgai wag dareu gonugau igul naliupet pet. Gonun, ag han go sul igul naliupet pet mui damamen.”

Yesus nug duaillel ipal isanarabun igul en awareun.

6 ¹Yesus nug kolital awareun, “Ag suban dabilan. Ag agal igul naliu naliu duaillel ipal agal ameagab ebu i macan. Einen, ag igul go duaillel ameagab ebu guzenamamen, agal memeag Mesgai wag dareu, gonug ag ece tub i maramau.

²Ag ecesab tamacag du tub ece moroimai, ag duaillel ipal ularebi, i alai pimam. Polumanemen dudu agen Zuda duaillel agal gotulanemen zaueim, abu ebu agal igul guzenai marena, duaillel agen uligaraimai, igual wanimig wag migamam aimai guzenanemen sul, ag i guzenan. Iz ag petak pet awarem, polumanemen dudu go agal ece unum omenin. Aiu ses Uwait nug dudu go ece i maramau. ³Ziwas tub ebu, na ecesab tamacag du ece murabun, wage wageimai moren. Guzenemen, nait zaunar na wautab darem agen i peizaimai, abe mamamen. ⁴Na guzenamam, go nait igul wageimai damau. Na igul go wageimai guzenemen nait Memen nug tutak peizaimai, gonug na du naliu aizaimai, aiu ses na ece mizamau.”

Yesus nug duaillel Uwait dual ze mabun igul abai mareun.

(Luk 11:2-4)

⁵“Ag Uwait auranemen ziwases ebun, polumanemen dudu agen guzenanemen sul i guzenan! Ag duaillel agen uligaraimai, wanimag wag maraimai, Nou Zauetim mui, ban abu gasag tapai daimai mui, Uwait ze muranemen sul, ag i guzenan. Iz ag petak pet awarem, go dudu agal ece unum omenin. Aiu ses Uwait ag ece tub i maramau. ⁶Bo, na Uwait aurabun nait ninanem zau oug sieiba, im gebeiba, nait Memen wageimai dareu piabun, auramam. Na guzenemen, nait Memen nug nait auremen dabeleu uligaimai, aiu ses ece tub mizamau. *Aisaia 26:20*

⁷Ag Uwait aurabun ziwases ebun, ze gau gaul i auran. Duaillel Uwait en oiagab petak ab tam, goagenag agal polu tibur auraimai, ze asi asiudumau en aimai guzenanemen sul ag go i guzenan. ⁸Ag dudu go sul i usalan. Ag Uwait i aurau ebun, go agal dabeleu get abe meun.

⁹Ag Uwait guzenai auran, ‘Igualel memenig, na Mesgai wag darem. Nait wanim noupet ig ulapwag mizem. ¹⁰Nait gumiganem ziwases em e unum alai iboramau. Nait onsau Mesgai wag sesamoramenemen sul, ig han em e ebun han ereg sesamoramen. ¹¹Ulis na ig ee migamam. ¹²Iguanag dudu ipal agal igul eg ig ebligeb miganemen zilagai maranemen sul, nagen han igualel igul eg zilagai migen. ¹³Na ig ece abun eg ebun i amaigamam. Na ig utigemen, igul eg nug i imaigamau.’

¹⁴Guzenaimai, ag agal zaiagar agen igul eg ag ebalagab maranemen, agen agal igul eg go zilagai marebi, agal memeag Mesgai wag dareu gonug han agal igul eg macanemenin zilagai maramau. ¹⁵Bo, ag agal zaiagar agal igul eg i zilagai marebi aban, agal memeag nug han agal igul eg i zilagai maramau.”

Yesus nug ee ur mabun igul en abai mareun.

¹⁶Yesus nug kolin awareun, “Ag Uwait aurabun ee ur macanemen, go polumanemen dudu agenag ee ur maimai, bisomag a sul dacanemen sul i guzenan. Ag we aidarena, dudu ipal agen uligaraimai, dudu goagen ze mamam, ‘Dudu go ag ee ur maimai, guzenai darem.’ amam. Iz ag petak pet awarem, dudu go ag agal ece unum omenin. Aiu ses Uwait nug ece tub i maramau. ¹⁷Na ee ur maiba, ze ziuaimai, gagalin salanaib, nait tibur galau naliu tuagen. ¹⁸Na igul go guzenemen, dudu ipal agen na ee utemen i abe mizamam. Nait memen wageimai dareu, go sag abiu mamau. Na igul go wageimai guzenemen, nait memen nug uligizeimai, gonug na du naliu aizaimai, aiu ses gonug na ece mizamau.”

Ag Mesgai wag ece asiui damamen.

(Luk 12:33-34)

¹⁹Yesus nug kolital awareun, “Ag em e ebun agal ece naliu asi asiui gotulai macan. Ag go guzenamamen, umum nug ece ipal eg wai

maraneun, ipal agal ece unum eg wab tam, zob dudu ipal agen agal zau bigagaimai, ece go zob umam. ²⁰Bo, ag agal ece naliu Mesgai wag gotulai macan. Go ebun, umum nug i eg umau. Zob dudu agen go ebun agal zau i bigagaimai, agal ece unum mui i umam. ²¹Gonun, ein uzan nait ece gotulai macanem ebun nait ounab han uzan go dareu.”

Enimag ebuan al.

(Luk 11:34-36)

²²Gonug koli eneun, “Agal ameag go enimag ebuan al. Agal ameag naliu damau go agal enimag al sul elei damau. ²³Bo, nait amen eg umau, nait ounab oug han unum umusamau. Gonun, nait ounab oug al hilanau tamacag go umuteu, go petak umutai banou pet dareu!”

Uwait nugau salau maimai, aiwag salau mui i macan.

(Luk 16:13; 12:22-31)

²⁴Gonug koli eneun, “Salau du tub nug du aliag ebun salau wabun iborain tam. Einen, go du tub en ougab nug noumaimai, du tub en ougab nug i noumamau. Go du tub nugau ze suban sesamoraimai, salau naliu moroimai, du tub semoroimai, gonugau ze suban i sesoraneu. Ag Uwait nugau salau mui aiwag asi wabun salau mui ereg gotulai wabun iborain tam.”

Dudu oiagab eg waimai, dabeleu asi wanemen igul.

²⁵Yesus nug koli awareun, “Gonun, iz ag petak pet awarem. Ag awau dabun dabeleu asi oimai, guzenai ze i macan, ‘Ig ein ee mui ze mui zaimai, damam?’ ‘Ig ein tibur galau tugamam?’ guzenai ze i macan. Doropag go banou pet, ee go banou tam. Agal enimag banou pet, tibur galau go banou tam. ²⁶Ag meg inain piaran! Go ee ug i banemen, go ee egeimai, betei zaueim i gotulai macanem. Agal memeag Uwait nug meg inain ee maraneu. Agen Uwait nugau amegwab meg inain unum zilarai daremen. ²⁷Du in ag ula ebun gonugau dabeleu asi asi mui em e ebun ziwis huia dabun iboin? Go guzenabun iborain tam.

²⁸Ag einen tibur galau en dabeleu asi oi daremen? Ag gaian a sisil pian. Go salau i macanem, tibur galau han agtal i patai macanem. ²⁹Bo, iz ag petak pet awarem, getal gumaraneun du Solomon go gonugau tibur galau naliu macaneun, tibur galau go a sisil naliu sul tam. ³⁰Gaian gig gaugaul go Uwait nug tibur galau maraneu. Gig go ulis damau, go tuaba ab nug unum ilamau. Go gig gaugaul dacanemen go Uwait nug tibur galau maraneu. Agal oiagab petak emen go ginampet! Ag abe macan, Uwait nug ag han gumaraneu. ³¹Gonun, ag dabeleu asi oiban, guzenai ze i macan, ‘Izal ee eru eiman alamau? Ze eru eiman alamau? Izal tibur galau eru eiman alamau?’ ³²Go Uwait nugau ze i duanemen dudu

agenag em e ebuan ece wabun dabilanemen. Bo, agal memeag Mesgai wag dareu go abiu meun, ece go salau a, gonun, gonug ag maramau. ³³Ag Uwait nugau uzan siabun amegai dabeleimai, gonugau igul naliu sesamoramamen, gonug koli ece go unum ag maramau. ³⁴Gonun, ag tuaba en dabeleu ulis i on. Ulihan uhu go gonugau atai. Tuaba en han uhu a. Ag ulisan uhu sag dabilan.”

Ag dudu ipal agal ze pigai i sisiai maran.

7 ¹Yesus nug kolital awareun, “Ag dudu ipal agal igul i sisiai maran. Ag guzenebi, Uwait nug han agal igul i sisiamau. ²Ag duaille ipal agal ein ze sisiai maramamen, Uwait nug han guzentel agal ze sisiai maramau. Ag dudu ipal ebalagab ein igul eim sisiranemen, Uwait nug ag ebalagab han guzentel sisiamau.

³Na einen nait zaun nugau ameg ebue esues ginampet oi hiabun uligem? Nait amen ebue a tatau dareu na piabun iborain tam ta? ⁴Nait amen ebue a tatau banou darena, na erunai nait zaun nugau ameg ebue esues oi hiabun aurem, ‘Zai, iz nait amen ebue esues oi ai em.’ ⁵Na polumaranem du, amegai a tatau banou nait amen ebue dareu oi heiba, koli naliu abu uligaiba, petak zaun nugau esues ameg ebue dareu oi amam.

⁶Ag ein ece naliu Uwait murabun tapai memenin go bau inain i maran. Ag galoloi naliu naliu bo sigual ebue i amaican. Bau bo agen ece go i zaimai, go koli kekulaimai, agal aramag ebue ece go tapai hiacaraimai, koli ag kaluaramam.”

Ag Uwait aurebiag, gonug ag ece maramau.

(Luk 11:9-13)

⁷Yesus nug koli eneun, “Ag ein ece wabun Uwait aurebi, gonug ece maramau. Ag ein ece itanamamen, ag pimamen. Ag im korukoru amamen, Uwait nug im oitai maramau. ⁸Duair in go ece wabun Uwait auramau, go ece umau. Duair in ece itanamau, go pimau. Duair in go Uwait nugau im korukoru amau, Uwait nug go im oitai muraba, zaueim simau.

⁹Bo, du tub nugau nag nug memeg auramau, ‘Mekai, iz ma zai,’ auraba, memeg nug aiwag em ebuan oi muraneu ta? ¹⁰Ziwas tub ebue, gonugau nag nug, ‘Mekai, iz karuk zai,’ auraba, memeg nug man eg tub oi muraneu ta? ¹¹Iz ag petak pet awarem, dudu igul eg macanemen agen goagal gelear ein ece naliu marabun abe macanemen, sultal agal Memeag Mesgai wag dareu aurebi, gonug ag ece naliupet pet maramau.

¹²Go ze go Moses nugau kasai ze mui, Uwait nugau ze doimai, awarenemen dudu agal ze mui, goagal bigeg, einen go ein igul naliu duaille agen ag ebalagab mabun guzenebi, ag han igul go sag ebalagab macan.”

Awau dabun abuog go agiug pet.

(Luk 13:24)

¹³Guzenaimai, koli eneun, “Ag abuog agiug pet sian. Ab unig nuabun abu banou gereua pet, duail el asiu ag abu go ebu pigai sesamoranemen. ¹⁴Bo, awau dabun abuog go agiug pet. Duail el go asiu siabun iborain tam. Duair tutak tutak go abuog go pianemen.”

Polu ze awaranemen dudu agal ze suban sisian.

(Luk 6:43-44)

¹⁵Yesus nug duail el guzenai awareun, “Ag polu ze doimai, awaranemen dudu suban piaran. Dudu go piaraimai, go sipsip sul darem aimai dabilanemen, bo, go gaian bau zag sul darem. ¹⁶Polu ze awaranemen dudu agal igul erunanem eim ag petak abe mamamen. Dudu ag wain dab us kulam ebuan wanemen ta? Dudu ag sabug dab ebulig ziu ebuan wanemen ta? Tam pet tam. ¹⁷Guzenaital, ein a naliu go dab naliu useg macaneu. Ein a eg go dab useg eg macaneu. ¹⁸A naliu go dab eg i macaneu. A eg go dab naliu i useg macaneu. ¹⁹A go unum dab naliu i useg macanemen, go unum kasaimai, ab oug hiacaramam. ²⁰Igul go guzenamam, gonun, polu ze awaranemen dudu go agal igul erunanem eim ag abe mamamen.”

Aiu ses sisiarabun ziwaz zumau.

(Luk 13:25-27)

²¹Yesus nug koli awareun, “Duail el unum izal wanim pataimai, enanem, ‘Dubanou Ban, Dubanou Ban,’ duail el go Uwait nugau gumaneu uzan i simam. Bo, du in izal mekai Mesgai wag dareu gonugau ze sesamoraneu du tutak go petak simau. ²²Aiu ses sisiarabun ziwaz zumau ebu, duail el asiu agen alaimai, guzenai ailamamen, ‘Dubanou Ban, Dubanou Ban, ig nait wanim ebu ig Uwait nugau ze oimai, duail el ipal betei abai maranemun, ig nait wanim ebu dudu ipal go wes eg a dacanemen kasaremun, nait wanim ebu ig gugeg beu beu macanemun.’ ²³Ziwaz go ebu iz ag guzenai awarai, ‘Ag igul eg macanemen duail el, ag enan! Iz ag en i abiu.’”

Zau mabun igul aliag.

(Luk 6:47-49)

²⁴Gonug koli eneun, “Gonun, du in go izal ze doimai, sesamoraneu du, go du dabeleu naliu a. Gonugau zau aiwag asiu ebu gusig tapai macaneu sul. ²⁵Ze nuna, zewei banou noimai, wol banou zoimai, zau go suai heun, bo, suai hina, alai nuab tam, einen, zau sanag aiwag gusig ebu tapai meun, gonun, zau gusig pet dareu.

²⁶Bo, du in go izal ze doimai, sesamorab tam, go dudu ipal kar wageun dabeleu tamacag sul, gonugau zau us nogoug ebu tapai meun. ²⁷Ze nuna, zewei banou noimai, wol banou zoimai, zau go us nogoug ebu tapai meun unum suai hina, asolaimai, unum alai noun.”

Yesus nugau ze gusig a.

²⁸Yesus nug gonugau ze unum duaillel marai mazicina, go gonugau ze atai abai mareun doimai, esilakemenin. ²⁹Gonugau ze kasai ze tapaimaranem dudu agal ze sul tam. Go du tub wanib a sul ze mareun.

Yesus nug du tub ebeu eg leprosi mui kaseun.

8 ¹Yesus go em manam wag eim utei nuna, duaillel asiu go sesamorai betemenin. ²Du tub ebeu eg leprosi mui gonug Yesus waugab alaimai, taubib waimai, aureun, “Dubanou Ban, na, izal sui eg zilagai milabun iboin, aba, nait dabeleu eim guzenen. Na iz kasilemen, iz naliu usalai.”

³Yesus gonugau ebeg nug du go pataimai, aureun, “Izan aizem. Na naliu usalamam.” Ziwas go ebutal, Yesus nug du go leprosi mui kasai meun. ⁴Guzenaimai, Yesus nug aureun, “Iz igul e guzenem na betei duaillel ipal i awaren. Bo, na Uwait ula dacaneu du waugab beteimai, nait enim naliu usaleun abai moromen, peizamau. Peizaimai, na Moses nugau kasai ze sesamoreiba, egun oiba, Uwait ulagwag moromen, go petak duaillel unum abiu mamam, na koli naliu usalemen.” *Wok Pris 13:49*

Yesus nug malai dudu agal du banou nugau salau du kaseun.

(Luk 7:1-10)

⁵Ziwas go ebu, Yesus go Kapaneam uzan beteimai, Rom malai dudu agal du banou nug zoimai, gonugau salau du kasurabun aimai Yesus aureun, ⁶“Dubanou Ban, izal salau du go ebeu banou oimai, go mu banou mui aidabun iborain tam, go zaueim biz ebu gabuai dareu.”

⁷Yesus nug koli aureun, “Iz beteimai, du go kasai mai.”

⁸Malai dudu go agal du banou nug koli Yesus aureun, “Dubanou Ban, iz igul eg macanem du, gonun, na izal zaueim i beten. Bo, na onsau eim sag ze memen, izal salau du go naliu usalamau. ⁹Iz han dudu banban agal piagsal danem. Malai dudu ipal go izal pisal dacanem. Izal malai du tub auranem, ‘Na e alen,’ aurina, alaneu. Tub auranem, ‘Na ulib go beten,’ aurina, bitaneu. Izal salau du go ‘Na salau e men,’ aurina, salau macaneu.”

¹⁰Yesus go malai dudu agal du banou gonugau ze doimai, go esilakaimai, duaillel sesamorai betemen go guzenai awareun, “Iz petak pet awarem, iz Israel du tub du e sul gonugau ougab petak eun sul i pemin. ¹¹Iz ag petak pet awarem, duaillel am zuaneun ebulan mui, am nuaneun ebulan mui,

alaimai, Abraham, Aisak, Zekop mui alai Uwait nugau gumaraneun uzan gotulaimai, Uwait nug dual hoboimai, ereg ee zai damamen. ¹²Bo, dudu ipal ag Uwait nugau ameg ebu ze a daremen, ag oi hiacaraba, umaum damamen, duaiel go ag agal aiag kititkatitai, weinai damamen.”

¹³Guzenaimai, Yesus nug malai dudu agal du banou aureun, “Na nait uzan beten! Iz nait ounab petak emen uligizem. Go petak zumau.” Ziwasi go ebutal, malai dudu agal du banou nugau salau du naliu usaleun.

Yesus nug duaiel asiu ebeu mui kasareun.

(Mak 1:29-34; Luk 4:38-41)

¹⁴Yesus go Pita nugau zaueim simai, go Pita nugau tanau air ebeu enib zabeg mui, biz ebu gabuai dareun uligeun. ¹⁵Yesus nug air gonugau ebeg patena, ebeu air go ebu dareun utei waneun. Air go asaimai, Yesus nugau ee zabun suban kasai moroun.

¹⁶Umusig mina, duaiel ipal agen duaiel asiu wes eg go agal oiagab oug daremen Yesus waugab imarai alemen. Yesus nug duaiel go wes eg mui, ogusau eim awarina, wes eg go duaiel oiagab an utarai wanemen. Yesus nug duaiel ipal ebeu mui han kasareun. ¹⁷Go igul go guzenina, go ze go Uwait nugau ze doimai, awaraneun du, Aisaia nug ze mareun,

‘Du go nugtal igual ebeu mui, wes eg mui, zilagai migeimai, oi waneun.’

Aisaia 53:4

Ze go petak usaleu.

Duail el agen Yesus sesamoraporoi emenin.

(Luk 9:57-62)

¹⁸Dudu asiu go Yesus waugab gotulaimai, tali talioroi darena, gonug uligaraimai, gonugau tapaimaraneu dudu Galili Ze Unig tubaim bitabun aimai awareun. ¹⁹Kasai ze tapaimaraneu du tub nug Yesus waugab alaimai, Yesus aureun, “Du Banou, na eru unamam, iz na umkoskos sesamizai bitai.”

²⁰Yesus nug koli aureun, “Gaian egun zag inain go ninabun empip a, meg inain go ninabun teu mui, bo, Du Nugau Nag go ninabun empip tamacag.”

²¹Yesus nugau tapaimaraneu du tub nug Yesus aureun, “Dubanou Ban, amegai na iz utileben, betei izal mekai ob oug heimai, koli alai, na sesamizai.”

²²Yesus nug koli aureun, “Na iz ulis sesamilen. Noumemen dudu agtal goagal zaiagar noumemen ob oug hiacaramam.”

Yesus nug wol banou aurina, poeun.

(Mak 4:35-41; Luk 8:22-25)

²³Yesus go gonugau tapaimaraneu dudu abai tebil ebu ereg simai, betemenin. ²⁴Wol banou zoimai, ze isacasoi ina, tebil ibut ze unig oug

nuamoroi eun. Bo, Yesus go gabuai dareun. ²⁵Gonugau tapaimaraneu dudu agen beteimai, go asoroimai, auremen, “Dubanou Ban, na ig isanigen. Ig ze nug oigai zamoroi!”

²⁶Yesus nug koli awareun. “Ag einen uminai daremen? Agal oiagab petak eun go ginampet!” Guzenaimai, go asaimai, wol mui, ibut ze mui, gusig ze awarina, saipag socemen. Ibut ze gonugau dareun go sultal iau dareun.

²⁷Guzenina, dudu unum dabeleu asiui oimai, agzozou enemen, “E du ein du eneneg? Wol mui ibut ze mui gonugau ze sesamoranem!”

Yesus nug du aliag wes eg mui kasareun.

(Mak 5:1-20; Luk 8:26-39)

²⁸Ziwas go ebu Yesus go Gadara duailel agal em ebu, ban ze tubaim gasag beteun. Uzan tub dudu noumanemen ob oug hiacaranemen empip eim du aliag go ob dareun eim, zoimai, abu ebu Yesus tuloromen. Du zaug dual go wes eg mui, kar wagareun. Duailel unum go kar wageun dudu aliag uminaraimai, abu go eiman i bitanemen. ²⁹Dudu aliag go Yesus gusig uloroimai, guzenai auremen, “Na Uwait nugau Nag, na ig erunigabun alem? Na ig uhu migabun alem ta? Igualel sisicigabun ziwas ulis tam, aiui ses alamaui.”

³⁰Dudu aliag go dacanemen ebu, bo asiui go ebu tubaiman eim ee zai daremen. ³¹Gonun, wes eg go agen Yesus gusig ze auremen, “Na ig palautigeben, ig ulib e, bo inain darem goagal oiagab oug palautigemen, numam.”

³²Yesus nug wes eg awareun, “Ag alian!” Guzenina, wes eg go bo agal oiagab oug utei siemen. Bo go pigai uminaimai, em eg eiman betei ban ze oug noi beteimai, ze zaimai, noumemenin.

³³Bo gumaranemenin dudu go igul go uligaimai, pigai goagal ban uzan uminai beteimai, dudu aliag go wes eg mui erunaremen ze unum duailel ipal awaremen. ³⁴Gonun, uzanan duailel go unum Yesus piabun betemen, go betei uligaimai, goagal em uteimai, uzan tub bitabun aimai gusig ze auremen.

Yesus nug du tub arab ebeg egugweun kaseun.

9 ¹Yesus go koli tebil ebu simai, Galili Ze Unig matelai, gonugau uzan Kapaneam beteun. ²Dudu ipal agen ebeu du tub gonugau arab ebeg egugweun mui biz ebu maimai, Yesus waugab imai alemen. Dudu go agal oiagab Yesus en petak emen uligaraimai, du go arab ebeg egugweun mui aureun, “Nagwai, nait ounab iau damau, iz nait igul eg zilagai mizem.”

³Guzenai aurina, kasai ze tapaimaranem dudu ipal agen go agal oiagab eim agzozou guzenai dabilemenin, “Du go gue Uwait ze biabial kuai aureu.”

⁴Yesus go dudu go agal dabeleu abe maimai, awareun, “Ag einen agal oiagab eim go dabeleu eg oi daremen? ⁵Iz ein ze mabun iboin, ein ze mabun iborain tam? ‘Nait igul eg zilagai mizem,’ iz guzenai ze mai ta, ‘Na asaiba, alien,’ iz guzenai ze mai ta? Iz ein ze mai, ag agal oiagab iz en petak amamen? ⁶Bo, ag Du Nugau Nag go wanib a, go em e ebu an igul eg zilagabun iboin abe mabun en iz guzenai.” Guzenai ze maimai, gonug ebeu du go aureun, “Na asaiba, nait biz oiba, nait uzan beten!”

⁷Guzenina, du go asaimai, gonugau uzan waneun. ⁸Duaillel go igul go uligaimai, go Uwait nugau wanib ulagwag memenin. Einen, gonug Yesus gusig morona, gonug dudu asai maraneun.

Yesus nug Matiu uloroun.

(Mak 2:13-17; Luk 5:27-32)

⁹Yesus go Kapaneam uzan uteimai, abu ebu betei, du tub gonugau wanib Matiu go *takis* aiwag waneun du gonugau salau macaneun zaueim hobo dareun uligeun. Go Matiu guzenai aureun, “Na alai, iz sesamilen.” Guzenai aurina, Matiu go asaimai, Yesus sesamorai waneun.

¹⁰Yesus go Matiu nugau zaueim ee zina zina, aiwag wanemen dudu ipal mui, igul eg macanemen dudu abai zoimai, Yesus gonugau tapaimaraneu dudu abai hobo dacanemen eebiz ebu zoimai, ereg hobo mai ee zemen. ¹¹Parisi dudu ipal agen dudu go uligaraimai, Yesus nugau tapaimaraneu dudu kanabai awaremen, “Agal tapaimaraneun du go einen go aiwag wanemen dudu mui, igul eg macanemen dudu abai ereg ee zai dareu?”

¹²Yesus go ze go doimai, awareun, “Duaillel ebeu tamacag go ebeu kasaraneun du waugab i bitanemen, duaillel ebeu mui sag petak go ebeu kasaraneun du waugab bitamamen. ¹³Ag ze go Uwait nug aneun ag betei bigeg itanaiban, abe mamamen. ‘Egun agaimai, iz milamamen go iz oiab i naliu mamau.’ Ag igul go i guzenan, ag dudu ipal en bisomagar piaraiban, isanaramamen go izal oiab naliu mamau. Iz duaillel igul naliu macanemen ularabun alab tam. Iz duaillel igul eg macanemen ularabun alemin.”

Yesus nug duaillel ee ur mabun en ze awareun.

(Mak 2:18-22; Luk 5:33-39)

¹⁴Ziwas go ebu Zon, ze ziwaneun du nugau tapaimaraneu dudu agen Yesus waugab alaimai, guzenai kanabemen, “Ig Parisi dudu abai ziwag ipal ebu ee ur macanem. Nait tapaimaremen dudu einen ee ur i macanem?”

¹⁵Yesus nug koli awareun, “Du tub go air awau wabun aimai, gonugau zaugul abai daimai, goagal oiagab eg mui dacanemen ta? Tam! Dudu ipal agen du go air oun gusig pataimai, imai wanebi, go ag abai i daba, ziwag go ebu, ag oiagab eg waimai, ee ur damamen.

¹⁶Du tub nug gonugau tibur galau bigageun, tibur galau zig awau oimai, tibur galau muzinan ebu i galia mamau. Tibur galau go ze ulusabun ziwas ebu, tibur galau awau ginampet usalaimai, gonugau tibur galau koli bigagaimai, biag banou usalamau.

¹⁷Du tub nug wain ze awau meme galau muzinan ebu i gorai macaneu. Go guzenamau, wain ze awau go siwalkuk aimai, muzinan meme galau bigagaimai, wain ze em ebu esikai numau. Go meme galau han ereg zilagamau. Wain ze awau go meme galau awau ebu gorai memen, go naliu damau.”

Yesus nug ainag noumeun mui, ebeu air mui, kasareun.

(Mak 5:21-43; Luk 8:40-56)

¹⁸Yesus go duaillel ze go mare marena, Zuda du tub banou gonug Yesus waugab zoi taubib waimai, aureun, “Izal ainag ulis noumeun, bo, na beteib, nait eben go ebu memen, go koli usamau.”

¹⁹Guzenai aurina, Yesus go asaimai, du go sesamorai beteun. Gonugau tapaimaraneu dudu han go ereg betemenin.

²⁰Air tub go geil ebeu umkoskos waneu, ebeu gonugau wai begurug dareun. Yesus go bete betena, go Yesus seugab zoimai, Yesus nugau tibur galau siu pateun. ²¹Air go gonugau ougab eim dabeleun, ‘Iz gonugau tibur galau sag patai, iz koli naliu usalai.’

²²Yesus go koli kekulaimai, air go uligeun, gonug guzenai ze meun, “Aleguai, nait ounab iau selanau mui damau. Na iz en ounab petak emen, gonun, na naliu usalamam.” Ziwas go ebutal, air go koli naliu usaleun.

²³Guzenaimai, Yesus go du banou nugau zaueim beteun. Duaillel go gonugau aleg noumina, dudu ipal go balau huai daremen, duaillel ipal go weinai daremen picareun. ²⁴Gonug awareun, “Ag duaillel unum uzaneim non! Ainag go go noumab tam, go gaul gabuai dareu!” Yesus nug guzenai ze mina, duaillel agen go peimai, welemen. ²⁵Duaillel go unum uzaneim utei nuna, Yesus go ainag gonugau zau empip oug simai, gonugau ebeg aliag patena, ainag go koli aseun. ²⁶Go igul go meun ulag go emgasag unum iboreun.

Yesus nug du aliag ameag kumi kasareun.

²⁷Yesus go uzan go uteimai, abu ebu betei beteimai, du ameag kumi aliag agen go sesamorai beteimai, gusig ulemen. “Devit nugau Nag, na ig en bisomig peiba, na ig isanigen.”

²⁸Yesus go zau tub simai, dudu aliag agen go waugab sina, gonug kanabai awareun, “Agal oiagab iz ag isanarabun en petak eu ta?” Zaug dual agen koli guzenai auremen, “Dubanou Ban, io, na iboin, guzenai igul mamam.”

²⁹Yesus nug goagal ameag pataimai, enai ze meun, “Agal oiagab iz en petak emenin, gonun, agal ameag waipamau!” ³⁰Yesus nug guzenai ze

mina, dudu aliag go agal ameag waipeun. Yesus nug koli guzenai gusig ze awareun, “Ag betei, duailen i awaran!”

³¹Bo, dudu aliag go uzaneim noimai, Yesus nug kasareun en ze emgasag unum ze betei maremen.

Yesus nug du tub ogusau tapeleun kasai meun.

³²Yesus gonugau tapaimaraneu dudu abai unabun ina, duailen ipal agen du tub ogusau tapeleun wes eg mui Yesus waugab imai alemen.

³³Guzenina, Yesus nug wes eg go ogusau tapeleun du dual dacaneun oi heun. Guzenina, du go ze meun, duailen go dabeleu asiu oimai, guzenai ze memen, “Ig igul go getal Israel duailen ula ebu piab tam.”

³⁴Bo, Parisi dudu agen guzenai ze memen, “Go wes eg goagal du banou nug go gusig morona, go wes eg oi hiacaraneu.”

Yesus nug duailen bisomag piareun.

³⁵Yesus go ban uzan mui, uzan ginampet mui, unum beteimai, goagal gotulanemen zaueim duailen ze mareun. Uwait nug duailen gumarabun en alamau Ze Naliupet gusig mareun. Go duailen ebeu beu beu mui kasaraneun. ³⁶Go duailen asiu alai go tulina, uligaraimai, bisomagar piareun, einen, ag du tub nug i isanaraneu, ag agal dabeleu beu beu daremen igul go ag sipsip gumarabun dudu tamacag sul. ³⁷Gonun, Yesus nug gonugau tapaimaraneu dudu guzenai awareun, “Go ougem ee asiu iboin usalai dareu, ougem go ee egeimai, gotulabun salau dudu asiu tam. ³⁸Ag ougem atag du go aurebi, gonug salau dudu ipal palautaraba, goagen betei ee go gotulai mamam.”

Yesus nug gonugau ze oi aidabun dudu* begurug tapai mareun.

10 ¹Yesus nug gonugau tapaimaraneu dudu begurug ularena, alina, wes eg oiabun mui, duailen ebeu beu beu mui, kasarabun mui gusig mareun. ²⁻⁴Yesus nugau tapaimaraneu dudu begurug Uwait nugau ze oi aidanemen dudu agal wanimag enai: Saimon gonugau wanib tub Pita, gonugau amag nugau wanib Andru, Zems gonugau amag Zon dual, go Zebedi nugau gelegul aliag. Pilip, Bartolomiu, Tomas, Matiu go *takis* aiwag waneun du, Zems go Alpius nugau nag, Tadius, tub Saimon go ug tub wanib Serot ebuan, Zudas Iskariot gonug Yesus gonugau iwai zaugul ebeagab mareun.

Yesus nug Uwait nugau ze oi aidabun dudu salau mareun.

(Mak 6:7-13; Luk 9:1-6)

⁵Yesus nug dudu begurug go palautaraimai, awareun, “Ag ipal emgasag ebuan duailen agal uzan uzan mui, Samaria agal ban uzan ipal mui, i bitan. ⁶Bo, ag Israel duailen sipsip sul wageimai darem waiagab bitan.

7Ag beteimai, guzenai awaramamen, ‘Uwait nug duailel gumarabun ziwias waiagab zoi dareu.’ 8Ag betei guzenamamen, duailel ebeu mui kasaramamen, noumemen duailel koli usarai mamamen, duailel ebeu suiag gusig (leprosi) mui kasaramamen, wes eg duailel ebalagab darem oi hiacaramamen. Ag salau go mamamen, guzenai dabeleimai, enan, ‘Ig gusig go gaul omun, gonun, iguan dudu ipal en ig ece migabun i awaramam.’ 9Ag aiwag ipal agal zo nag oug zulagai mamamen, i oi unamamen. 10Ag abu anaporoï, du tub nug gonugau zo ta, tibur galau ta, arab galau ta, taru tub ta, i oi unamamen. Salau macaneu du gonug ece go petak waneu.

11Bo, ag ban uzan tub ta, uzan ginampet tub siceiban aba, ag duailel agal igul suban uligamamen. Du in gonugau igul naliu, du in gonugau igul eg piaramamen. Ag dudu naliu go abai suban daiban, betei ag, koli uzan go utarai unamamen. 12Ag go dudu agal zaueim simai aba, ag guzenai ze mamamen, ‘Iguale oigeb ag abai naliu dareu.’ 13Go zauan du nug ag imaraimai, suban gumaraba, agal suban dabun en ze du go dual damau. Bo, du in go ag gonugau zaueim i imarai siba, agal suban dabun en ze go dual i damau. 14Dudu ipal agen agal ze duabun uteimai, suban i gumarebi aba, ag uzan go uteiban, agal igul eg abai marabun en agal aramag ebulan emwaibul kueian. 15Iz ag petak pet awarem, sisiarabun ziwias ebu Sodom mui Gomora duailel uhu banou ginam umam, bo, go uzanan duailel ag uhu banou petpet umam.” Yesus nug gonugau ze oi aidanemen dudu guzenai awareun.

Uhu beu beu ipal ag ebalagab zumau.

(Mak 13:9-13; Luk 21:12-17)

16Yesus nug kolital guzenai awareun, “Ag go don, iz ag sipsip sul bau zag inain darem ula ebalagab palautaremin, betei damamen. Gonun, ag man sul iau betei daimai, abu suban pimamen, ag meg kurumuk agal igul sesamoraiban, ag iau dan. 17Ag dudu ipal subantal piaran. Dudu ipal agenag gusig pataraimai, sisiarabun du waugab imarai bitamam. Ag gusig pataraimai, agal gotulanemen zaueim beu beu imarai beteimai, esalau sul ugaramam. 18Ag izal wanim ebu salau mebi, uligaraimai, dudu ipal goagen hiacaranem zau oug hiacarabun agal gumaranemenin dudu banban waiagab imarai bitamam. Guzenebi, ziwias go ebu agenag mui emgasag ipal ebulan dudu mui, izal ze awaramamen. 19Dudu ipal agenag hiacaranem zau oug hiacarabun imarai betebi, ag uminaimai, ‘Ig erunai ze mab’, ‘Ig ein ze koli awarab’, guzenai dabileiban, ag oiagab eg i umau. Ziwias go ebu, ag Uwait nug dabeleu maraba, ag ze awaramamen. 20Ag ze go agal oiagsau ebu agtal i ze mamamen. Agal memeag nugau Ah Wes nugtal dabeleu maraba, ag ze maramamen. 21Ipal dudu agtal agal apanagar, amanagar abai, agal iwai zaiagar agal ebeag ebu marebi, go

iwai zaiagar goagen ugarebi, noumamam. Memeagar agen agal geleagar aleagar guzental guzenarebi, ugaramam, guzenebi, geleagar aleagar agen han koli kekulaimai, agal memeagar guzental guzenaramam. *Maika 7:6*
 22 Bo, ag izal salau oi milanemen, gonun, dudu agen ag en aiagsisilaimai, gasag eim hiacaramam. Du in go izal salau i utamau, go umkoskos gusig mai damau, aiu ses sisiarabun ziwas ebu, Uwait nug go koli imacamau.
 23 Bo, ag go ban uzanan dudu agen ag ebalagab igul eg marebi, ag koli ban uzan tub uminai unamamen. Iz ag petak pet awarem ag Israel agal uzan banban salau unum i poau ebu Du Nugau Nag koli alamau.

24 Abiu mogoi tub nug gonugau tapaimoroun du zilacurabun iborain tam, salau du tub nug gonugau gumaneu du zilacurabun iborain tam. 25 Gonun, mogoi go gonugau dabeleu gonugau tapaimoroun du sul usalaimai, go petak gonugau ougab naliu usalamau. Salau du han guzental, go gonugau gumaneun du sul usalaimai, gonugau ougab naliu usalamau. Iz agal gumaranemin du, dudu ipal agen Belsebul nugau wanib iz ebilab milamam, ag izal tapaimaremin dudu ebalagab goagen wanimag eg pet maramam.”

Duaille ag Uwait tutak uminoron.

(Luk 12:2-7)

26 Yesus nug kolital awareun, “Gonun, ag dudu ipal i uminanan. Ein ece ulis kulai wageimai dareu, go araog zumau. Ein ze wageimai dareu, dudu ag go abe mamam. 27 Izal ze umaum awarai darem agen han amban ze maramamen. Iz ag ein ze agtal iau awaremin, agen han duaille ameagab ebu asaimai, tapai daimai, ze araog awaramamen. 28 Ag dudu ipal agen dudu ugarina noumanemenin, dudu go en ag i uminanan, goagen ag ugaraimai, agal doropag eg wai marabun iborain tam. Ag Uwait tutak uminuramamen, gonug petak agal enimag mui, doropag mui, unum ab banou oug hiacarabun iboin. 29 Na aiwag ginampet sil meg supikiau aliag gau macanem. Nait memen nug meg unum gumaraneu. Meg tub nugtal i nuaneu, gonug ze mina, meg go em ebu utena, nuaneu. Uwait nug meg inain naliu gumaraneu, gonun, gonug ag han subantal gumaramau. 30 Gonug agal gagaliag ulig tutak tutak go unum nanaleun dareu. 31 Gonun, ag i uminan, Uwait nugau amegwab ag dudu naliu, agen meg inain zilarai daremen.”

Yesus Kristus nugau wanib ulagwag murabun igul.

(Luk 12:8-9)

32 Yesus nug kolital eneun, “Du in nug iz en duaille ameagab ebu ‘Iz gonugau zaug’ amau, izan han izal mekai Mesgai wag dareu gonugau amegwab du go en ‘Go izal zai’ anai. 33 Bo, du in nug iz en ‘Iz gonugau zaug’ duaille ameagab ebu i ze mamau, izan han izal Mekai Mesgai wag dareu gonugau amegwab du go en ‘Go izal zai’ i anai.”

**Iz oiagab siksikanau mui dabun alab tam, bo, iz
alalabun malai mui alemin.**

(Luk 12:51-53; 14:26-27)

³⁴Yesus nug koli awareun, “Ag guzenai i dabilan, go emgasag e ebu duaillel oiagab siksikanau mui dabun aleu aimai i ze macan. Iz ag abai oiagab siksikanau mui dabun alab tam, bo, ag abai alalabun iz malai oi alemin.

³⁵Iz geleagar aleagar agal oiagab kekularemin, goagal memeagar abai iwai damam. Ainagul han anaiagar abai iwai damam. Ailel han goagal buziagar abai iwai damam. ³⁶Duaillel ag ug tutak koli agzozou iwai damam. *Maika 7:6*

³⁷In mogoi ainag, go gonugau memeg, anag en ougab nug noumaimai, go iz en ougab nug i noumamau, go izal tapaimaranem du i damau. Du in go gonugau mogoi, ainag en ougab nug noumaimai, go iz en ougab nug i noumamau, go izal tapaimaranem du i damau. ³⁸Du in go gonugau a gegeulanau gamai aimai, iz sesamilab tam, du go gue izal tapaimaranem du tam. ³⁹Bo, du in nugtal gonugau dorog awau dabun salau mamau, du go gonugau dorog eg umau. Bo, du in go iz en dabeleimai, gonugau enib utaneu, du go gonugau dorog awau muzmuz damau. Go i noumamau.”

Yesus nug duaillel ece naliu wabun en ze awareun.

(Mak 9:41)

⁴⁰Gonug guzenai awareun, “Du in nug ag imaraimai, suban gumaraneu, du go nug iz han imailaneu. Du in nug iz imailaneu, du go gue Uwait han imaneu. Go guzenabun Uwait nug iz palautilena, alemin. ⁴¹Du in go du tub Uwait nugau ze doimai, awaraneun du abiu maimai, go du imaneu, aiu ses Mesgai wag go ece ze doimai, awaraneun du go oun sul umau. Du in go du tub tuguiyai aidaneun abiu maimai, go du go imaneu, aiu ses go ece du tuguiyai go oun sul umau. ⁴²Du in nug du tub wanib banou tamacag, go izal igul sesamoraneu abiu maimai, go du go ze ule muramau, iz ag petak pet awarem, du go Uwait nug i semuramau, aiu ses Mesgai wag ece naliu go petak umau.”

**Ze ziwaraneun du Zon nug gonugau tapaimaraneu
dudu Yesus waugab palautarena, betemenin.**

11 ¹Yesus nug gonugau tapaimaraneu dudu begurug salau mabun ze awaraimai, go uzan go uteimai, uzan ipal uzan go waiagabtal betei Uwait nugau Ze duaillel mareun.

²Ze ziwaraneun du, Zon go hiacaranem zau oug daimai, Kristus nug eruneun go ze go doimai, gonugau tapaimaraneu dudu Yesus waugab palautarena, betemen. ³Gonug ag Yesus guzenai kanababun awareun,

“Ig abiu du banou tub alamau emen. Na du go ta, ta, ig du tub aiu ses alamaun gumamam ta?”

⁴Yesus nug dudu go koli awareun, “Ag ein ze domen, agal ameag nug ein igul uligemen go unum, koli betei Zon auran. ⁵Ameag kumi dudu go koli ametem. Aramag eg dudu go koli abu aidarem. Dudu ebeu suiag gusig (leprosi) mui go koli naliu usalemen. Dabuiag utub dudu go koli ze suban domen. Noumemen dudu go koli awau asem. Ecesab tamacag dudu go Uwait nugau Ze Naliupet domen. ⁶Du in go iz en ougab petak aimai, go gusig tapai damau, du go gonugau ougab naliu usalamau.”

Aisaia 35:5; 61:1

⁷Zon nugau tapaimaraneu dudu go utei wanena, Yesus nug Zon nugau ze duaille gotulai daremen ebu awareun. Go guzenai kanabarai awareun, “Ag du tamacag uzan em ula ebu Zon waugab ein piabun betemenin? Ag waliwal tub wol nug patena piabun betemenin ta? ⁸Ag ein betei pemenin? Ag du tub tibur galau naliu iweiu arugai dareun betei pemenin ta? Guzeneneg dudu ag tibur galau naliu naliu mui iweiu arugaimai, ag gumaranemen dudu banban agal zau naliu ebu dacanemen. ⁹Bo, ag ein piabun betemenin, iz ailan. Ag Uwait nugau ze tub doimai, awaraneun du piabun betemenin ta? Go petak pet. Iz petak awarem, go Uwait nugau ze doimai, awaraneu du. Gonug Uwait nugau ze doimai, awaranem dudu ipal zilarai dareu. ¹⁰Uwait nugau ze nug Zon en guzenai ze meun, ‘Uwait nug eneun,

“Ag go don, izal ze oi awarabun du palautemin, amegai alai, nait abu tuguiyai kalai mizamau.” ’

Malakai 3:1, Aisaia 40:3

¹¹Iz ag petak pet awarem, Zon nug em e ebuan duaille unum zilarai dareu. Bo, du in go Uwait nugau ameg ebu wanib banou tamacag, gonug eneu, ‘Uwait izal gumilaneu du banou, iz gonugau pigsal darem’ du go nug Zon zilauroi dareu. ¹²Ze ziwaraneun du, Zon nugau ze maraneun ziwias, zoi zoi ulis, uteu, dudu gusig mui ipal agen Uwait agal Dubanou Ban sul ag gumarabun gusig patai moroi emenin. Gonun, ag Uwait nugau gumarabun igul naliu eg memenin. ¹³Zon i usalau ebu, getal Uwait nugau ze doimai, awaranemen dudu mui, Moses nugau kasai ze mui, agenag Uwait ig gumigabun alamau aimai ze macanemen. ¹⁴Dudu go agenag guzenai ze memen, ‘Elaiza koli alamau.’ Ag go dudu agal ze doimai, agal oiagab petak emenin, ag abiu Zon gotal go Elaiza, alamau emenin. ¹⁵Duaille dabuiag a, ag ze go don!

¹⁶Bo, iz ulisan duaille ag erunai pet awarai? Ag mogoi ginaginamul agen em nogoug ebu hobo daimai, mogoi ipal abai onabun guzenai ularanem.

¹⁷‘Ig duair igarabun en pulel huemun, bo, ag ilanab tam.’ ‘Ig eb noumanemenin kabal wemun, bo, ag manil mab tam.’ ¹⁸Zon go zoimai, ziwias ipal ebu go ee mui wain ze mui ur macaneun. Guzenina, duaille

agen guzenai ze memenin, ‘Du go gue wes eg go ebudareu.’¹⁹ Bo, Du Nugau Nag aleun, go ee mui wain ze mui zina, duaiel agen guzenai ze memenin, ‘Du go uligan! Go ee mui wain ze asi asiu zaneu. Go *takis* aiwag wanemen dudu mui, igul eg macanemen dudu mui goagal zaiag! Ag guzenai ze memenin. Bo, Uwait nugau dabeleu naliu ag aiu ses uligaimai, abe mamamen gonugau igul naliupet pet.”

Bisomagar ipal uzanan duaiel Yesus en oiagab petak ab tam.

(Luk 10:13-15)

²⁰ Uzan ipal duaiel go ebuan, Yesus nug gonugau gugeg beu beu go abai mareun. Go, go uligaimai, goagal igul eg uteimai, go oiagab kekulab tam. Guzenina, Yesus nug uzanan duaiel go gusig ze awareun. ²¹ Go eneun, “Korasin uzanan duaiel, iz ag bisomagar pem! Betsaida uzanan duaiel, ag han bisomagar pem! Iz go gugeg banou beu beu Tair uzanan duaiel mui, Saidon uzanan duaiel mui, ag gugeg go abai maremin sul zob, go Umus ougan duaiel ag oiagab eg ugaba, pigai tibur galau muz tugaimai, waibul ebudareu zob. Igul go guzenemenin, go agal igul eg ebuan koli oiagab kekulemen! ²² Iz ag petak pet awarem, aiu ses Uwait nug koli alai duaiel sisiarabun ziwases ebudareu, Tair mui, Saidon duaiel mui, ag uhu banou ginam umam, bo, ulisan duaiel ag uhu banou pet umamen! ²³ Ag Kapaneam duaiel, ag agtal Mesgai wag simamen ta? Petak pet, ag i simamen. Uwait nug ag ob oug ab banou oug hiacaramau. Gugeg e ag abai maremin sul Sodom uzanan duaiel ag han guzenai gugeg abai maremin zob, go ulises ebudareu zob! ²⁴ Guzenaimai, iz ag awarem, ag guzenai dabilan, Uwait nug koli alai duaiel sisiarabun ziwases ebudareu, Sodom uhu banou ginam umam, bo, ulisan duaiel uhu banou pet umam”

Yesus nug duaiel go waugab alai i mabun en ze awareun.

(Luk 10:21-22)

²⁵ Ziwases ebudareu Yesus nug eneun, “Mekai, na tutak Mesgai mui, em mui, agal Banou, iz nait wanim ulapwag mizem, einen, na nait igul naliu abiu macanemen duaiel mui, abiu mabun betemen duaiel agal ameagab ebudareu wagememen. Bo, na igul naliu go abiu tamacag duaiel unum abai maremin. ²⁶ Mekai igul go petak nagtal nait dabeleu eim guzenemen. ²⁷ Izal Mekai nug ece unum izal ebe ebudareu meun. Du tub nug gonugau Nag i abe macaneu, memeg nugtal go abiu. Du tub nug nag gonugau memeg abe mabun iborain tam, gonugau nag nug sag memeg abiu. Go nag nug duaiel gonugtal tapai maraimai, gonugau memeg abai maraba, go han go abe muramam. ²⁸ Duaiel, ag salau gusig maimai, uhu banou umkoskos gamai aidanemen, ulises ebudareu unum iz waiab alaimai, i mai damamen. ²⁹ Ag ze e izan ag abai maremin oiban, sesamoramamen. Go a tatau dudu bulumakau beu ebudareu maimai, ece keuai bitanemen sul. Einen,

iz i aisisilaneu, iz duaillel suban isanaranem. Guzenemin, agal oiagab iau selai damau. ³⁰Ag izal ze sesamoramamen, go uhu banou tam, ag sesamorabun iboin.” *Jeremaia 6:16*

Parisi dudu agen goagal imabun gil ebu Yesus kanabai ze auremen.

12 ¹Zuda agal imanem gil tub ebu, Yesus gonugau tapaimaraneu dudu abai go wit ougem ula betemenin. Gonugau tapaimaraneu dudu go we wagena, ougem go ebulan wit dab oimai, zemenin. ²Parisi dudu ipal agen igul go guzenemen en uligaimai, goagen Yesus auremen, “Na go uligen! Nait tapaimaranemen dudu agen igual imabun gil ebu igul eg go guzenem. Go igual kasai ze etuburacanem.”

³Yesus nug koli awareun, “Devit gonugau dudu abai we wagena, ein igul minar? Ag ze go nanalemenin ta? ⁴Devit gonugau dudu abai we wagena, Uwait nugau Nou Zaeim simai, *bret* go Uwait moromenin oimai, zinar. Go kasai ze sesamorab tam, *bret* go dudu gaugaul agen i zanemen, Uwait ula dacanemen dudu sag go zanemen. ⁵Ag Moses nugau kasai ze agau nanalanemen ta, imabun gil ebu Uwait ula dacanemen dudu agen Uwait ecesab muranemen zau banou oug agal salau macanemen. Dudu go ag imabun gil ebu kasai ze suban i sesamoranem, bo, ag Uwait nugau amegwab ze tamacag. ⁶Iz ag petak pet awarem, du tub e dareu gonug Uwait nugau ecesab muranemen zau zilauroi dareu. ⁷Uwait nugau ze nug guzenai aneu,

‘Ag egun agaimai, iz milamamen, go iz oiab i siksikeu. Ag igul go i guzenan. Dudu ipal ag en bisomag piaraimai, isanaramamen, go petak iz oiab siksikamau.’ *Hosea 6:6*

Ag ze go bigeg abe maiban, ag dudu ipal igul eg i macanemen goagal enimag ebu guzenai polumaraimai, ag igul eg memenin aimai i awaran. ⁸Einen, Du Nugau Nag go sag imabun gil gumaneu.”

Yesus nug du tub ebeg eg a kaseun.

(Mak 3:1-6; Luk 6:6-11)

⁹Yesus uzan go uteimai, go Zuda agal gotulanemen zaueim sieun. ¹⁰Zaeim go du tub go ebeg eg mui dareun. Dudu ipal agen Yesus igul eg tub maba, piabun aimai, go kanabai ze auremen, “Igal kasai ze sesamoraimai, ig igual imabun gil ebu dudu ebeu mui kasarabun iboin ta, tam ta?”

¹¹Yesus nug koli guzenai awareun, “Du tub nugau sipsip imabun gil ebu ob oug numau, ag erunamamen? Ag sipsip go ob ougan i mai umamen ta? ¹²Du go dorog mui, go sipsip zilauroi dareu, gonun, igual kasai ze nug io aigeun, ig dudu ipal imabun gil ebu isanaramam.”

¹³Gonug du go ebeg eg mui aureun, “Nait eben henen.” Guzenai aurina, du go nug gonugau ebeg hina, ebeg naliu tub dareu sul, gonugau

ebeg naliu usaleun. ¹⁴Guzenina, Parisi dudu go utei beteimai, Yesus wai hiabun en ze patemenin.

Uwait nug Yesus gonugau salau murabun tapai moroun.

¹⁵Yesus go wabun en ze mina doimai, go uzan go utei waneun. Duaille asi u go sesamorai betena, gonug ebeu duaille unum kasareun. ¹⁶Yesus nug duaille go gusig ze awareun, “Ag iz en duaille ipal i awaran.” ¹⁷Go ze go guzenai awareun, go Uwait nugau ze doimai, awaraneun du Aisaia nug ze sikut weun ze go ulis petak usaleu. ¹⁸Uwait nug eneun,

‘E izal salau du, go izanag tapai memin, go en izal oiab nug noumeun, go en izal oiab naliu usaleun. Izal Ah Wes go ebu palautemin, gonug koli alai emgasag ipal ebu duaille sisiarai en ze unum awaramau. ¹⁹Go gusig ze i mamau, go abu ebu ze banban ze ze mai i aidamau. ²⁰Gonug dudu ipal gusig tamacag darem isanaramau, dudu ipal agen goagal zaiagar gusig tamacag isanaranemen gonug isanaramau. Gonugau salau go meun nug ai u ses gonugau sisiarabun igul naliu sil igul naliu ipal unum zilacaramau. ²¹Em gasag duaille unum go en goagal oiagab petak aimai, go gumei damam’

Aisaia 42:1-4

Dudu ipal agen Yesus go Belsebul (gonugau wanib tub Satan) nugau zaug emen.

(Mak 3:20-30; Luk 11:14-23; 12:10)

²²Ziwas go ebu, dudu ipal agen du tub wes eg nug ameg kumi usalaimai, ogusau tapelai meun Yesus waugab imai alemen. Yesus nug wes eg go du go ebu oi hina, du go ze maimai, go koli ameg ameiteun. ²³Yesus nug igul guzenina, duaille agen uligaimai, esilakaimai, go enai ze memenin, “Go Devit nugau Mogoi ta, go tam ta?”

²⁴Parisi dudu ze go doimai, go agen duaille guzenai awaremen, “Go Belsebul, wes eg agal gumaraneu du banou, nug gusig morona, go wes eg oi hiacaneu,” guzenai ze memenin.

²⁵Yesus goagal dabeleu abe maimai, guzenai ze meun, “Emgasag tub ebu duaille ag agzozou alalaimai, agzozou doun damamen, ag ziwas huia i damamen. Uzan tub duaille ag han agzozou alalaimai, agzozou doun damamen, ag eg umamen. Ug tub han guzentel guzenamam. ²⁶Gonun, wes eg go Satan nugau uzan darem, agal zaiagar abai agzozou alalaimai, agzozou doun damam, ag erunai damamen? ²⁷Agen iz en guzenai ze memenin, ‘Go Belsebul nug gusig morona, go wes eg oi hiacaneun.’ Igul go guzenanem zob, in nug agal tapaimaranemen dudu gusig marena, goagen wes eg oi hiacaranem? Agal tapaimaranemen dudu agen agal ze go iboin tam anem! ²⁸Bo, iz Belsebul nug gusig i milaneu, Uwait nugau Ah Wes nug iz gusig milena, iz wes eg oi hiacaranemin.

Gonun, ag go abe mamamen Uwait nugau gumarabun ziwas ag waiagab ulis alai dareu.

²⁹Du tub nug du gusig tub nugau zaueim bigagai simai, amegai go zau atag du go ebeg arab us sil kiai maimai, gonugau zauan ece unum umau.

³⁰Duair in izal zai tam, go izal iwai zai. Duair in iz isanileimai, dudu ipal iz waiab imarai alab tam, go duaillel zamarina, go wane anemen.

³¹Gonun, iz ag petak pet awarem, du in go igul eg macaneu mui, ze eg maraneu, Uwait nug igul eg go zilagai imau, bo, du in go Uwait nugau Ah Wes ze biabial kuai auramau, Uwait nug du go nugau igul eg i zilagai muramau. ³²Duair in go Du Nugau Nag enib ebu ze eg muraba, Uwait nug go gonugau igul eg zilagai muramau, bo, go Uwait nugau Ah Wes ebu ze eg muramau, Uwait nug ze go ulis i zilagai muramau, aiu ses han i zilagai muramau. Du gonugau igul eg meun go ze a, go guzental muzmuz damau.”

A eg gonugau dab eg, a naliu gonugau dab naliu.

(Luk 6:43-45)

³³Yesus nug koli awareun, “A naliu pianemen, go gonugau dab han naliu. A eg go gonugau dab han eg. Dudu ag a gonugau dab uligaimai, ag abiu macanemen go a naliu ta, eg acanemen. ³⁴Ag go don, ag dudu eg, man abau inain sul. Agal oiagab oug igul eg kapai dareu? Agal oiagsau eim ze naliu erunaimai, ze macanemen? ³⁵Du naliu go gonugau dabeleu naliu mui, go ze naliu gonugau ougab oug zuna, ze macaneu. Du eg go gonugau dabeleu eg mui, go ze eg macaneu. Ein dabeleu gonugau ougab oug dareu, go gonugau ogusau eim ze macaneu. ³⁶Uwait nug koli alai em e ebulan duaillel sisiaramaun ziwas ebu, ag ein ze gau gaul macanemen, Uwait amegwab erunai ze macanemen ag guzental auramamen.

³⁷Agal ein ze macanemen, go ze nugtal koli ag sisiaramau. Ag ze naliu macanemen, Uwait guzental sisiaraimai, ag duaillel naliu amau. Ag ze eg macanemen guzental sisiaraimai, ag duaillel igul eg macanemen amau.”

Dudu ipal agen Yesus gugeg beu beu mina, piabun aimai auremen.

(Mak 8:11-12; Luk 11:29-32)

³⁸Ziwas go ebu kasai ze tapaimaranem dudu ipal mui, Parisi dudu ipal mui, goagen Yesus auremen. “Abai maranemen du, ulis, nait gugeg tub abai migemen, ig pimam.”

³⁹Yesus nug koli awareun, “Ag ulisan duaillel, ag igul eg macanemen. Ag Uwait nugau ze i sesamoranemen. Agen iz gugeg tub memin, piabun aimai kanabai ailemen ta? Tam pet tam! Iz Uwait nugau ze doimai, awaraneun du Zona nugau gugeg sag go petak abai maremin, ag go petak pimamen. ⁴⁰Zona go amban ainarai, umaum ainarai, go karuk banou nugau ougab oug dareun sul, Du Nugau Nag han guzental, amban ainarai,

umaum ainarai mui, go ob oug damau. ⁴¹Aiu ses, Uwait nug koli alai em e ebu du duaillel sisaramaun ziwias ebu Niniwe uzanan duaillel noumemenin koli asaimai, Uwait nugau amegwab ulisan duaillel abai ereg tapai daimai, auramam, 'Ulis duaillel ag igul eg macanemen'. Einen, Niniwe uzanan duaillel ag Zona nug Uwait nugau ze mareun, agal igul eg uteimai, koli oiagab kekulaimai, Uwait en agal oiagab petak emen. Iz ag petak pet awarem, ulis e ebu du tub dareu go banou, gonug Zona zilauroi dareu. Ag du banou gonugau ze duabun utemen. ⁴²Aiu ses Uwait nug koli alai em e ebu du duaillel sisaramaun ziwias ebu, Siba emgasag gumaraneun air go noumeun koli asaimai, go Uwait nugau amegwab tapai daimai, auramau, 'Ulis duaillel ag igul eg macanemen'. Einen, go air go abu ebu pulig alaimai, gumaraneun du Solomon nugau ze duabun aleun. Iz ag petak pet awarem, e ebu du tub dareu, go banou, gonug Solomon zilauroi dareu. Ag du banou gonugau ze duabun utemen!"

Wes eg koli gonugau zaueim aleun.

(Luk 11:24-26)

⁴³⁻⁴⁴Yesus nug koli eneun, "Wes eg du enib ougan oi hina, go beteimai, du tamacag uzan imai dabun empip itanamau. Go betei imabun empip i peimai, wes eg go go koli dabeleimai, eneun, 'Iz koli izal zau muz oug bitai.' Guzenaimai, go koli betei zau go em kalai suban memenin, gaul dareun peun. ⁴⁵Peimai, go betei wes eg kwali goagal igul eg pet mui, imaraimai, koli zau oug go ereg dabun alemenin. Gonun, wes eg inain go agen du go ebu igul eg pet mina, go, go gonugau getal eg dareun sul tam, go ulis eg pet pet dareu. Igul go guzental ulisan duaillel ebalagab zumau."

Yesus nugau anag amagul abai Yesus aurabun alemen.

(Mak 3:31-35; Luk 8:19-21)

⁴⁶Yesus go duaillel abai zaueim ze marai darena, gonugau anag amagul abai alemen. Go uzaneim alai tapai daimai, guzenai ze memen, "Ig Yesus dual ze mabun alem." ⁴⁷[Gonun, du tub nug piaraimai, gonug simai Yesus aureun, "Nait anan amaiar abai na peizabun go alai uzaneim tapai darem, go na ibaiz ze mabun darem."]

⁴⁸Yesus nug koli du go aureun, "Izal anikai in? Izal magite inen?" ⁴⁹Guzenaimai, Yesus nug gonugau tapaimaraneu dudu ebeg sil abai maraimai, awareun, "Ag uligaran, duaillel e darem, go izal anikai te magi te! ⁵⁰Duair in go izal Mekai Mesgai wag dareu gonugau dabeleu sesamoraneu, duair go petak go izal anikai, izal abi, izal magi."

Du ee ug heun en tatau ze.

13 ¹Yesus go nineun zau uteimai, betei Galili Ze Unig gasag eim hoboï daimai, duaillel Uwait nugau Ze mareun. ²Duaillel asiu pet

alai go waugab gotulaimai kapatotuai darena, go tebil tub wag simai hobo darena, duail el go ze gasageim tapai daremen. ³Go tatau ze* eimantal igul asiu awaraneun. Go guzenai awareun, “Ziwas tub ebu du tub ee ug hiacabun gonugau ougem beteun. ⁴Go ee ug go ougem eim hiacabun oi betei betena, ee ug ipal abu ebu ululai noun. Guzenina, meg agen zoi oi zemen. ⁵Ee ug ipal ai em ebu nomenin. Em naliu asiu tam, gonun, ee ug go pigai walu zoimai, gau mui usalemen. ⁶Bo, am gusig zoimai, ee ug go walu zomenin unum elareun. Goagal ginib em oug suban nuab tam, gonun, unum gulaleun. ⁷Ee ug ipal eb geleu kulam ziu oug noimai, walu zomenin. Kulam nug oi zina, suban simai useg suban mabun iborain tam. ⁸Bo, ee ug ipal em naliu ebu nomenin, ee ug go walu zoimai, suban useg memenin. Useg ipal asi asiu pet memenin, useg ipal asiu memenin, useg ipal tutak tutak memenin.”

⁹Yesus nug tatau ze go awaraimai, go guzenai ze meun, “Duail el ag dabuiag a aba, ag tatau ze go doimai, bigeg abiu mamamen!”

Yesus nug einen duail el tatau ze eiman awaraneu.

(Mak 4:10-12; Luk 8:9-10)

¹⁰Yesus nugau tapaimaraneu dudu go waugab alaimai, kanabai ze auremen. “Na einen tatau ze eiman duail el ze awaranem?”

¹¹Yesus nug koli guzenai awareun, “Uwait nug duail el gumarabun igul getal wageimai dareun. Ulis ag izal tapaimaranem dudu, gonun, bigeg go abai marem. Bo, duail el ipal go bigeg go abai marab tam. ¹²Du tub go dabeleu naliu ipal mui, du go Uwait nug dabeleu naliu ipal han muramau. Guzenaba, go dabeleu naliupet pet umau. Bo, du in go dabeleu naliu tamacag, Uwait nug gonugau dabeleu ginampet patai dareu go unum koli ebegalaumau. ¹³Iz tatau ze eim duail el ipal awaranem, iz go guzenemin, ag ein ece agal ameag nug pianemen, bo, ag suban i pianemen, ag ein ze agal dabuiag nug duaneu, bo, ag suban i doimai, bigeg abiu i mamamen. ¹⁴Gonun, Uwait nugau ze doimai, awaraneun du Aisaia, go dudu go en ze maraneun, ulis petak usaleu. Uwait guzenai ze meu,

‘Ag ze agal dabuiag nug duaneu, bo, ag suban i doimai, bigeg abiu macanemen, ag ece ameag nug planeu, bo, ag suban i pianemen.

¹⁵Duail el go ag suban i dabilanemen, go agal dabuiag utub, ameag kumi dacanemen, Ag igul go i guzenamamen, agal ameag nug ein igul pimamen, agal dabuiag nug ein ze dumamen, agal dabeleu naliu zuba, ag bigeg go abe mamamen, ag agal igul eg uteimai, koli oiagab kekulebi, iz agal igul eg zilagai marai.’ Uwait nug guzenai ze meu.

Aisaia 6:9-10

¹⁶Ulis, ag izal ze tapaimaranemin dudu, ag agal oiagab naliu usalamau! Agal ameag nug ece pimamen, agal dabuiag nug ze dumamen.

¹⁷Iz ag petak pet awarem, getal Uwait nugau ze doimai, awaranemen

dudu mui, dudu ipal Uwait nugau amegwab naliu dacanemen mui, ag ece go ag ulis uligemen sul piabun en guzenemen, ag i pemen. Ze ulis ag domen sul getalan dudu ag duabun en guzenemen, ag i domen.”

Yesus nug du ee ug heun tatau ze en bigeg gonugau tapaimaraneu dudu awareun.

(Mak 4:13-20; Luk 8:11-15)

¹⁸ Guzenaimai, Yesus nug gonugau ze tapaimaraneu dudu guzenai awareun, “Ag du tub nug ougem ee ug heun, tatau ze go gonugau bigeg enai ag go don. ¹⁹ Dudu asiug ag Uwait nug gonugau duaillel gumarabun ze awarina, duanem, gonugau bigeg ag suban i abiu, duaillel ag ee ug abu ebu nomenin sul. Guzenina, Satan go pigai ag ebalagab zoimai, Uwait nug gonugau ze agal oiagab oug meun pigai oi hiacaneu. ²⁰ Ee ug ipal ai em ebu noimai, walu zomenin, go gonugau bigeg enai, duaillel ipal ag Uwait nugau ze doimai, pigai siksikanemen. ²¹ Bo, ze naliu go agal oiagab oug umkoskos i daneu. Gonun, ze naliu go igul ipal en agal oiagab eg wina, Uwait nugau ze go unum utanemen. ²² Duaillel ipal ag ee ug eb geleu kulam ziu oug walu zomenin, go gonugau bigeg enai, duaillel ipal ag Uwait nugau ze duanemen, bo, ag em e ebuian igul dabeleimai, ece asi asiug en agal oiagab nug noumimai, Uwait nugau ze utanemen. Ze naliu go ag omenin go eb geleu kulam nug ee ug oi zaneu sul suban i useg macaneu. ²³ Ee ug ipal em naliupet ebu noimai, walu zomenin, go gonugau bigeg enai, duaillel ipal ag ze doimai, agal oiagab oug memenin. Ag Uwait nugau ze go bigeg suban abe memenin, ze naliu go omenin ee asi asiug useg macaneu sul, useg ipal asiug pet 100 macaneu, ipal 60 macaneu, ipal tutak tutak 30 macaneu.”

Eb geleu eg nugau tatau ze.

²⁴ Yesus nug tatau ze tub gonugau ze tapaimaraneu dudu guzenai awareun, “Uwait nugau duaillel gumarabun igul enai, du tub nug wit ug naliu gonugau ougem heun. ²⁵ Guzenina, umtabag umaum tub duaillel unum ninena, du go nugau iwai zaug nug zoimai, gonugau wit ug heun ougem eb geleu ug eg heimai, go utei waneun, ²⁶ Dai dai, go wit ug walu zoimai, eb geleu eg mui ereg walu zuna, uligemen. ²⁷ Go ougem gumanemen salau dudu agen ougem atag du waugab beteimai, guzenai auremen, ‘Banou, ig na ee ug naliu nait ougem hemen aimai dabilanemun. Eb geleu eg go nait ougem erunai usalai dareu?’ ²⁸ Gonug koli guzenai awareun, ‘Go igual iwai zaicig tub nug go guzeneun.’ Gonugau salau dudu agen koli ougem atag du guzenai auremen, ‘Ig betei go eb geleu eg ulei hemam ta?’ ²⁹ Du go nug guzenai awareun, ‘Tam, ag eb geleu eg uleimai, wit mui uleicamamen, gonun, go i guzenan. ³⁰ Ag eb geleu utebi, wit mui eregtal damam. Aiu ses wit wabun ziwas ebu, ag

amegai eb geleu eg oi aimai, sisiaimai, agamamen, wit naliu sag oimai, izal ee macanem zaueim betei mamamen!”

Yesus nug tatau ze tub paipai dab en ze meun.

(Mak 4:30-32; Luk 13:18-19)

³¹Yesus nug gonugau tapaimaraneu dudu tatau ze tub guzenai awareun, “Uwait nug duailel gumaraneu igul enai. Du tub nug a tub wanib paipai dab ginampet pet oimai, gonugau ougem beun. ³²Go paipai dab go ginampet pet, ee dab ipal sul tam, bo, go paipai dab walu zoimai, ipal ougeman ee ug unum zilaraneu, go a banou pet usalamau. A go bigeg banou usalina, meg inain go alai a ebeg go ebu teu macanemen.”

Yesus nug tatau ze tub *bret* aganemen marasin gonugau wanib zis en ze mareun.

(Luk 13:20-21)

³³Yesus nug gonugau tapaimaraneu dudu tatau ze tub guzenai awareun. “Uwait nug duailel gumaraneu igul go marasin tub wanib zis sul. Air tub nug zis ginampet oimai, plaua gap 40 ulei oimai, tulaimai, ipulaimai, plaua go neleimai, suai banou zuaneu.”

Yesus nug duailel ze awarabun go tatau ze eim sag awaraneu.

(Mak 4:33-34)

³⁴Ze asiu go Yesus nug duailel tatau ze eim awaraneu, go ze tub araog awarab tam, go tatau ze eim sag awaraneu. ³⁵Go tatau ze maraneu go Uwait nugau ze doimai, awaraneun du nug duailel awaraneun, ze go ulis petak usaleu. Gonug guzenai sikut weun,

‘Iz tatau ze eim duailel ze awaranem. Ze, em e usalai meun ziwaz ebu, zoizoi ulis wageimai dareun, iz ag awarem.’ *Buk Song 78:2*

Yesus nug eb geleu eg nugau tatau ze bigeg en gonugau tapaimaraneu dudu awareun.

³⁶Yesus go dudu asiu utaraimai, go zaueim sieun, gonugau tapaimaraneu dudu agen zoimai, guzenai auremen, “Na ig eb geleu ug eg ougem walu zoun nugau tatau ze bigeg en aigamam.”

³⁷Yesus nug koli guzenai awareun, “Du ee ug naliu heun, go Du Nugau Nag. ³⁸Ougem go em e, ee ug naliu go Uwait nug gumaraneu duailel, eb geleu eg go ag Satan nugau duailel. ³⁹Eb geleu ug eg ougem heun du, go igual iwai zaicig, Satan. Ougem nugau ee ug wabun ziwaz igual Uwait nug koli alai duailel sisiaramau, ee wabun dudu go Uwait nugau tibur. ⁴⁰Eb geleu eg sisiaimai, ab ebu agamam, aiu ses Uwait nug sisiaramaun ziwaz ebu, em e ebu guzentel guzenaramam. ⁴¹Du Nugau Nag nug gonugau tibur palautaraba, alaimai, goagen Uwait nugau duailel ula ebu

duaillel ipal igul eg mabun emen mui, dudu ipal ereg igul eg macanemen abai unum oi hiacaramau. *Sefanaia 1:3* ⁴²Duaillel go ab banou elei dareu, oug hiacaramam, go ab oug noi weinaimai, goagal aiag katutai damam. ⁴³Ziwas go ebu, Uwait agal memeag nug duaillel gumarabun igul araog zuba, duaillel oiagab petak emen ag am nugau al sul hilamamen. Duaillel ag dabuiag a, go ze doimai, bigeg abiu mamamen.” *Daniel 12:3*

Yesus nug tatau ze tub guzeneun, du tub nug aiwag ot tub em ougan oun.

⁴⁴Yesus nug guzenai ze meun, “Em ebulan duaillel ag Uwait nugau duaillel usalabun go enai, du tub nug gonugau aiwag asiu ot oug maimai, gonugau ougem wageimai meun. Du go noumina, du tub nug aiwag ot go uligaimai, gonug koli wageimai meun. Go siksikaimai, gonugau ece unum dudu ipal marena, gau mina, gonug aiwag go oimai, betei ougem go gau meun. Guzenaimai, aiwag ot oug dareun, gonugau usaleun.”

Du tub go aiwag naliu wanib kelek gau macaneun en tatau ze.

⁴⁵Yesus nug koli eneun, “Uwait nug duaillel gumaraneu igul tub go enai. Du tub go aiwag naliu wanib kelek, aiwag banou sil gau mabun itanai ai dareun. ⁴⁶Go aiwag wanib kelek naliupet pet tub uligaimai, go koli betei gonugau ece unum dudu ipal marena, gau mina, gonug han aiwag go oimai, betei go aiwag kelek naliu gau meun. Guzenaimai, go aiwag kelek gonugau pet usaleun.”

Karuk wanemen zo nugau tatau ze.

⁴⁷Yesus nug kolital eneun, “Uwait nug duaillel gumaraneu gonugau igul tub go enai. Karuk wanemen dudu ipal agen karuk wabun zo ze unig oug heimai, karuk asiu eg mui, naliu mui, gaul omenin.

⁴⁸Karuk asiu nug zo kapina, go karuk zo mui patai keuina, gasageim alina, go hoboimai, karuk sisiaremen. Karuk naliu go agal tebil oug memen, karuk eg hamaremen. ⁴⁹⁻⁵⁰Tatau ze go gonugau bigeg enai, Uwait nug koli alai duaillel sisiaramaun ziwas ebu, gonugau tibur agen Satan nugau duaillel go Uwait nugau duaillel abai ereg gotulai darem ebulan sisiai imaraimai, ab banou muzmuz elei dacaneu ebu betei, ab unig oug hiacaraba, goagal aiag kititkatitai, weinai damam.”

Getalan ze mui ulisan ze awau mui.

⁵¹Yesus nug gonugau tapaimaraneu dudu kanabarai awareun, “Ag ze go bigeg ag abiu ta?” Goagen koli go auremen, “Io, ig abiu.”

⁵²Yesus nug guzenai awareun, “Ze go gonugau bigeg enai. Kasai ze tapaimaraneu du go Uwait nugau gumarabun igul abiu maimai, go izal tapaimaranem du usalabun, go simai, zauan go ece muzin mui awau mui oi alaneu.”

Nasaret uzanan duailen agen Yesus semoromenin.

(Mak 6:1-6; Luk 4:16-30)

⁵³Yesus go, go tatau ze awaraimai, uzan go utei waneun.

⁵⁴Guzenaimai, gonugau muz uzan koli beteun. Go duailen goagal gotulanemen zaueim simai, Uwait nugau ze mareun. Duailen agen gonugau ze doimai, esilakemenin. Guzenaimai, goagen guzenai ze memenin, “Du go dabeleu naliu mui, igul go eruan oun? ⁵⁵Go gugeg beu beu mabun gusig eruan oun? Go igual zau macaneun du nugau nag tam ta? Maria go gonugau anag ta? Zems, Zosep, Saimon, Zudas go gonugau amagul ta? ⁵⁶Gonugau abiagul e ebu darem ta? Go igul go eruan oun?” ⁵⁷Go guzenai ze maimai, Yesus semoromenin. Guzenina, Yesus nug guzenai awareun, “Uzan ipal Uwait nugau ze doimai, awaraneun du, go wanib ulagwag a, duailen agen goagal oiagab eim go en petak anemen, bo, nug nugau uzan wanib ulagwag tamacag, gonun, gonugau duailen mui, gonugau ug mui agenag go semoromenin.” ⁵⁸Go ebuan duailen agal oiagab petak ab tam, gonun, go uzan go igul ipal asiu abai mab tam.

Ze ziwaraneun du, Zon go noumeun.

14 ¹⁻¹²Ziwas go ebu, Herot-Antipas go Galili agaig gumaneun du banou. Getal Herot nug gonugau amag Pilip nugau wau Herodias ebegalacoun. Guzenina, ze ziwaraneun du, Zon nug Herot guzenai aureun, “Na nait amai nugau air Herodias omen. Go na kasai ze etuboromen!” Zon nug guzenai aurina, Herot go Zon wai hiabun dabeleun, bo, go Zuda duailen agen Zon go Uwait nugau ze doimai, awaraneun du tub anemen. Guzenaimai, Herot go, go darena, uligaraimai, uminareun. Uminaimai, go dudu ipal awarina, beteimai, Zon ebegarab durub waimai, ebeg us sil kiaimaimai, hiacaranemen zau oug hemen.

Herot gonugau anag nug soligweun gil zuna, duailen asiu gotulaimai, go dual oiagab siksikai mui ee zai daremen. Gil go ebu, Herodias gonugau aleg go duailen ameagab ebu zoi ilanai dareun. Guzenina, Herot go ainag magun guzenai uligaimai, gonugau ougab naliu meun. Go ainag magun go dual baib maimai, gonug guzenai aureun, “Iz petak pet aizem, na ein ece wabun iz ailemenag, izan na unum mizai.”

Go ainag nug gonugau anag kanabai auraimai, go anag nugau dabeleu oimai, koli alai Herot guzenai aureun, “Na ze ziwaraneun du, Zon nugau beu kuataiba, gonugau gagalig kuatemen tebil tub oug maimai, oi alai milen.”

Ainag gonug Herot guzenai aurina, go doimai, go ougab uhu usaleun. Bo, duailen go dual hobo ee zai daremen goagal ameagab ebu ainag go dual baib maimai, petak ze meun ze dabeleimai, go utabun iborain

tam. Guzenaimai, go ainag gonugau ze sesamoraimai, gonugau salau du aureun, “Na beteiba, Zon nugau beu kuaten.” Gonugau salau du tub guzenai aurina, go betei Zon hiacaranemen zau oug an ebu beu kuatai heun. Zon nugau gagalig kuatai heun tebil tub oug maimai, oi alaimai, ainag go morona, gonug han oi betei gonugau anag moroun. Zon gonugau tapaimaraneun dudu agen gonugau enib sag oimai, betei ob oug hemen.

Dai dai, Herot nug Yesus nugau salau meun ze doimai, gonug gonugau salau dudu guzenai awareun, “Go ze ziwaraneun du, Zon go noumeun koli ob ougan koli asai zoun, gonun, go gugeg beu beu mabun gusig a.”

Yesus nug dudu tausen tabkuai (5,000) ee mareun.

(Mak 6:30-44; Luk 9:10-17; Zon 6:1-13)

¹³ Yesus go Zon noumeun ze doimai, go tebil oimai, uzan go uteimai, nugtal du tamacag uzan em ula ebu waneun. Guzenina, duaille go Yesus waneun ze doimai, goagal uzan uteimai, abu eim go sesamora betemen. ¹⁴ Yesus go gasageim betei i maimai, tebil ougan noimai, duaille asiu daremen uligaraimai, go en bisomag piaraimai, duaille ipal ebeu a kasareun.

¹⁵ Yesus nugau tapaimaraneu dudu agen umusig ee zabun ziwis ebu go zoimai guzenai auremen, “Em umuteu, du tamacag uzan e darem. Na duaille palautaremen, goagal uzan beu beu betei ee gau maimai, zimam.”

¹⁶ Guzenai aurina, Yesus nug koli gonugau tapaimaraneu dudu guzenai awareun, “Duaille go eru eim unamam? Agenag ee zabun maran.”

¹⁷ Goagen koli go guzenai auremen, “Ig ee asiu oi alab tam, *bret* tabkuai mui, karuk aliag mui, oi alemun dareu.”

¹⁸ Yesus nug gonugau tapaimaraneu dudu awareun, “Ee go oi alai iz milan.” ¹⁹ Go duaille awarina, go gig ebu hobi darena, gonug *bret* tabkuai go mui, karuk aliag mui oimai, Mesgai wag ameitaimai, Uwait ‘Ese-e’ aureun. Go *bret* go kikakaraimai, gonugau tapaimaraneu dudu marena, goagen oimai, duaille marena, zemenin. ²⁰ Duaille unum ee go zaimai, biguiag zoun. Ee ogog go darena, Yesus nugau tapaimaraneu dudu agen gom gau zo begurug oimai, zulagai mina, go gom gau zo unum kapeun. ²¹ Ee zemenin dudu tausen tabkuai (5,000), aille, gelear aleagar abai, go ee zemenin nanalab tam.

Yesus go Galili Ze Unig wag ai dareun.

(Mak 6:45-52; Zon 6:15-21)

²² Guzenaimai, Yesus nug gonugau tapaimaraneu dudu awarina, “Go tebil wag simai, Galili Ze Unig tubaim amegai bitamam.” Awaraimai, nug daimai, duaille palautarena, goagal uzan unamamen aimai awareun. ²³⁻²⁴ Go duaille palautarena, wanena, go nugtal em manam wag simai, Uwait aurai dareun. Umusig, em umutai alina alina, Yesus nugtal go ebu

darena, tebil go gonugau tapaimaraneu dudu agen oi betemen go ze unig ban ula ebu betena, wol banou zoimai, tebil go patena, ze nug tebil go kulai mamoroi eun.

²⁵Umaseu, em hilai zuna zuna, am ameg ainarai betei, am ameg wasolig ebu sul, Yesus go koli gonugau tapaimaraneu dudu daremen ebu ze unig wag ebu tapai tapai aleun. ²⁶Gonugau tapaimaraneu dudu agen go ze wag tapai tapai alina, uligaimai, go banban uminemen. Guzenai ze memen, “Go eb dorog!” Guzenaimai, go banban uminaimai, eg pet piecemenin.

²⁷Pigai Yesus nug awareun, “Ag gusig dan. E izanag. Ag i uminan!”

²⁸Pita nug koli guzenai aureun, “Dubanou Ban, go petak na darem aba, iz ailemen, ze wag na darem ebu bitai.”

²⁹Yesus nug koli aureun, “Io, na alen!” Guzenai aurina, Pita go tebil wag an silikai noimai, ze wag Yesus dareun ebu beteun. ³⁰Guzenina, Pita go wol banou nug ze ban oug kulai mamoroi ina, uligaimai, go banban uminaimai, uleun, “Dubanou Ban, na iz isanilen!”

³¹Yesus nug gonugau ebeg pigai pataimai, guzenai aureun, “Nait ounab petak emen go ginampet pet. Na einen dabeleu aliag omen?”

³²Yesus go Pita dual koli betei tebil ebu sina, wol maziceun. ³³Yesus nugau tapaimaraneu dudu go tebil oug daremen go gonugau wanib ulagwag moromen. Go guzenai ze memen, “Petak pet, na Uwait nugau Nag.”

Yesus go Genesaret em ebu ebeu duaillel asiu kasareun.

(Mak 6:53-56)

³⁴Yesus gonugau tapaimaraneu dudu abai, go Galili Ze Unig hei beteimai, Genesaret em gasag betemen. ³⁵Go ebuan duaillel go abe memen go Yesus aleu. Guzenaimai, goagen ze palautina, em go ebuan duaillel ipal ebeu mui Yesus waugab imarai alemen. ³⁶Duaillel ipal agen Yesus guzenai gusig auremen, “Na ebeu duaillel go utaremen, goagen alai nait tibur galau siugal patamam.” Guzenaimai, ebeu duaillel agal ebeag nug Yesus nugau tibur galau patena, unum naliu usalemen.

Asaniger agal kasai ze.

15 ¹Parisi dudu ipal, kasai ze tapaimaranem dudu mui, go Zerusalem uzanan alaimai, Yesus guzenai kanabai ze auremen, ²“Einen nait tapaimaranem dudu agen igual asaniger agal kasai ze i sesamoranem? Ag ee zabun agal ebeag kasai ze meun sul i ulusanemen.”

³Yesus nug koli awareun, “Ag einen Uwait nugau ze i sesamoranemen, ag agal asanagar agal igul sag sesamoranemen? ⁴Uwait nug eneun,

‘Na nait memen anan nugau ze sesamoren.’ Go koli eneun, ‘Du in go gonugau memeg anag ze biabial kuai auramau, dudu ipal agen go webi, noumamau.’

Kisim Bek 20:12,17

⁵Bo, ag guzenai ze macanemen, ‘Du in go ece mui, gonugau memeg anag dual isanarabun iboin, bo, go ag awaraneu. “Iz ece go Uwait murabun sag tapai memin dareu. Guzenaimai, iz ag isanarabun iborain tam.”’ ⁶Ag Parisi dudu guzenai ze macanemen, ‘Go iboi, go gonugau memeg anag i isanaramau.’ Go igul ebu ag Uwait nugau ze tonoi maimai, agal asanagar agal ze sag petak sesamoranemen. ⁷Ag polumanemen dudu! Uwait nugau ze doimai, awaraneun du, Aisaia nug ag en petak ze meun. Go guzenai sikut weun,

⁸‘Uwait nug eneun,

“Duaillel go agen gaul oiagsau nug izal wanim ulapwag macanem, bo, agal oiagab nug iz en noumab tam. Ag izal ze awaranem ag suban i sesamoranem. ⁹Ag du tub nugau kasai ze sesamoraimai, ag guzenai ze macanem go Uwait nugau ze. Ag polu ze sesamoraimai, ag izal wanim gaul ulapwag macanem!””

Aisaia 29:13

Ein ece gonug dudu unu maraneun.

(Mak 7:14-23)

¹⁰Yesus nug duaillel asiu ularena, go waugab alina, guzenai awareun, “Ag ze e awarai doiban, suban abe macan! ¹¹Du tub go ee zaneu gonug Uwait nugau amegwab unu i muraneu. Dabeleu eg ougab oug dareu asina, gonugau ogusau nug ze maneu gonug petak go unu muraneu.”

¹²Ziwas go ebu, gonugau tapaimaraneu dudu agen go waugab alaimai, guzenai auremen, “Na ze go ze memen en Parisi dudu ze go doimai, goagal oiagab eg weun, na go abiu ta?”

¹³Yesus nug koli gonugau tapaimaraneu dudu awareun, “Izal Mekai go Mesgai wag dareu, go ougem a. Ee ug, ebeg sil bab tam, go unum goagal ginib mui silaicamau. ¹⁴Ag dudu go utarebi, damam. Dudu go ameag kumi, ag zaiagar ipal ameag kumi abu abai marabun iborain tam. Du ameg kumi tub gonug ameg kumi zaug tub abu abai morom aimai, go zaug dual ereg alanoimai, ob oug numam.”

¹⁵Guzenai ze mina, Pita nug Yesus guzenai aureun, “Na tatau ze go bigeg ig aigemen, dumam.”

¹⁶Yesus nug awareun, “Iz ag ze asiu abai maremin, bo, agal dabeleu naliu usalab tam. ¹⁷Ag igul go i abiu ta? Ein ee zanemen go biguiag oug noi daneu, go koli biguiag ougan alaimai, nuaneu. ¹⁸Bo, dabeleu eg oiagab oug daneu asina, oiagsau eim zuaneu, dabeleu gonug sag duaillel petak unu maraneu. ¹⁹Oiagab eim, duaillel go dabeleu eg guzenai wanemen: Ag duaillel ugarina, noumabun dabilanemen, ag du omenin ailel eg marabun dabilanemen, ag igul eg pet ipal mabun en dabilanemen, ag ece zob wabun dabilanemen, ag ece uligaimai, ameag nug alaneu, ag polu ze mabun, duaillel enimag ebu ze mabun mui dabilanemen. ²⁰Igul eg

go gonug duailel unu maraneu. Bo, ag ebeag ze ulusab tam, ee zanemen gonug duailel Uwait nugau amegwab unu i maraneu.”

Kanan air tub go Yesus en ougab petak eun.

(Mak 7:24-30)

²¹Yesus gue uzan go uteimai, emgasag tub Tair ban uzan mui Saidon ban uzan ula ebu beteun. ²²Kanan air tub go uzan go dacaneun, go zoimai, Yesus aureun, “Du banou, na Devit nugau Ug, na iz en bisom peiba, iz isanilen! Izal ainag wes eg nug unum eg wai moroun dareu.”

²³Bo, Yesus nug air go koli ze tub aurab tam. Gonugau tapaimaraneu dudu agen go waugab zoimai, guzenai auremen, “Air gue, go ig sesamigai alaimai, ul mui alai dareu, gonun, na go palautemen, koli unamau!”

²⁴Guzenina, gonug koli awareun, “Israel duailel ag sipsip sul gumarabun du tamacag. Izal mekai nug go Israel duailel ag en sag iz palautilena, gumarabun alemin.”

²⁵Guzenai awarina, air go gue Yesus waugab zoimai, patai weinaimai, guzenai aureun, “Du banou, na iz isanilen.”

²⁶Yesus nug koli guzenai aureun, “Ig mogoi agal ee oimai, bau hamacai i maranem. Go igul eg.”

²⁷Guzenina, air gonug Yesus guzenai aureun, “Du banou, na petak ze mem, bo, bau agal memeagar eebiz ebu ee zina, ee sibsib em ebu nuna, goagal bau agen go ee sibsib oi zanemen.” *Buk Song 62:12*

²⁸Guzenina, Yesus nug air go aureun, “Air, nait ounab petak emen go banou pet! Nait ein igul iz na isanizabun ailem, go isanizai.” Yesus air go guzenai aurinatal, air gonugau aleg go koli naliu usaleun.

Yesus nug duailel asiu ebeu beu beu mui kasareun.

²⁹Yesus go uzan go uteimai, Galili Ze Unig gasageim beteun. Go em manam tub ebu simai, hobi dareun. ³⁰Duailel ipal agen duailel asiu, ameag kumi, aramag eg, oiagsau tapeleun, ebeu dudu ipal mui, go Yesus waugab imarai alai memenin. Gonug duailel go ebeu mui unum kasareun. ³¹Guzenina, go igul go meun uligaimai, go dabeleu asiu omenin. Oiagsau tapeleun dudu go koli suban ze memenin, aramag ilueun dudu go koli tuguiai tapemenin, ameag kumi dudu go ametaimai, ece pemenin, i aidanemen aramag eg dudu go koli aidanemenin, dudu ipal go ebeu beu beu mui go naliu memenin. Guzenina, duailel goagen Israel agal Uwait wanib ulagwag moromenin.

Yesus nug dudu tausen iwanarai (4,000) ee mareun.

(Mak 8:1-10)

³²Yesus nug gonugau tapaimaraneu dudu ularena, alina, guzenai awareun, “Iz duailel e gil ainarai ee tamacag ig ibaig ereg gaul daremen

uligaraimai, bisomag pem. Go abu ebu betei we en noumamam. Gonun, iz gaul goagal uzan palautaremin, i unamam.”

³³Gonugau tapaimaraneu dudu agen koli guzenai auremen, “Ig du tamacag uzan e darem, duail e asiu, ig ee eruan oimai, duail maremun, zimam?”

³⁴Yesus nug koli awareun, “Ag *bret* eiceisab dareu?” Goagen koli auremen, “Ig ee asiu oi alab tam, *bret* kwali mui, karuk ipal ginaginam mui dareu.”

³⁵Guzenina, Yesus nug koli duail em ebu hubamam aimai awarina, go hobomen. ³⁶Gonug *bret* kwali mui, karuk mui oimai, Uwait ‘Ese-e’ aureun. Guzenaimai, gonugau tapaimaraneu dudu marena, goagen han duail go marena, zemenin. ³⁷Duail go ee go zaimai, unum biguiag zoun. Ee ogog ipal utemenin Yesus nugau tapaimaraneu dudu agen gom gau zo kwali oimai, ee zemenin ogog go zulagai mina, kapeun. ³⁸Ee zemenin dudu go tausen iwanarai (4,000), bo, aile geleagar aleagar abai go nanalab tam.

³⁹Gonun, Yesus nug duail go palautarena, goagal uzan wane anena, go tebil wag simai, Magadan em ebu beteun.

Parisi dudu, Sadiusi dudu mui, goagen Yesus nug gugeg tub maba, piabun aimai kanabai ze auremen.

16 ¹Parisi dudu ipal, Sadiusi dudu mui, goagen Yesus polumurabun alemenin. Goagen Yesus auremenin, “Na gugeg tub abai migen. Guzenemen, ig abiu mamam, na Uwait Mesgai wag dareu nugtal gusig go mizaneu.” [²Bo Yesus nug koli guzenai awareun, “Ag umusig am noimai, emes epelina, uligaimai, ag guzenai ze macanemen, ‘Tuaba gil naliu.’ ³Umaseu ag emes epelaneu mui, pi mutuaneu mui, uligaimai, guzenai ze macanemen, ‘Ze numau.’ anemen. Ag emes uligaimai, igul go ag petak abiu macanemen. Bo, ein igul ulis zou, ag bigeg go i abiu.] ⁴Ag duail eg, ag Uwait nugau igul naliu i sesamoranemen! Agen iz gugeg tub memin, piabun kanabai ailemen ta? Bo, iz ag gugeg go i abai marai! Zona nugau gugeg tutak abai maremin, go petak ag pimamen.”

Guzenai awaraimai, Yesus go utarai waneun.

Yesus nug Parisi, Sadiusi agal igul *bret* agena, neleimai, suaizuanen marasin wanib zis sul en ze meun.

(Mak 8:14-21)

⁵Yesus nugau tapaimaraneu dudu go dabuiag sikena, *bret* ipal i omen, go gaul Galili Ze Unig heimai, tubaim betemenin. ⁶Yesus nug gonugau tapaimaraneu dudu guzenai awareun, “Ag Parisi, Sadiusi dudu, goagal *bret* agena, neleimai suaizuanen marasin wanib zis go suban uligan.”

⁷Agzozou guzenai ze maimai, enemen, “Ig *bret* oi alab tam, gonun, go ze go aigeu.”

⁸ Yesus goagal ze ze mai daremen abiu maimai, gonug guzenai kanabai awareun, “Ag einen guzenai ze mai daremen? ‘Ig *bret* oi alab tam.’ Agal oiagab petak emen go ginampet! ⁹Bo, ag dabeleu naliu tamacag ta? Iz *bret* tabkuai oimai, kikakaraimai, dudu tausen tabkuai (5,000) marena, zemenin, ag go en dabelab tam ta? Ag gom gau zo eiceisab oimai, *bret* ogog zulagai mina, kapeun? ¹⁰⁻¹¹Ziwas tub ebu, iz *bret* kwali oimai, dudu tausen iwanarai (4,000) marena, zemenin ag go en dabeleu omen ta? Ag gom gau zo eiceisab oimai, *bret* ogog oi zulagai mina, kapeun? Ag einen go dabelab utemen? Ulis iz ag *bret* en awarab tam. Iz ag Parisi, Sadiusi dudu mui, agal zis go suban piabun aimai iz ag awarem!”

¹² Guzenina, gonugau tapaimaraneu dudu go koli abe memenin. Yesus go *bret* agena, neleimai suaizuanen marasin wanib zis go en awarab tam, bo, go Parisi, Sadiusi dudu mui, goagal ze tapaimaranemen suban sisiarabun en awareun.

Pita nug Yesus nugau wanib araog meun.

(Mak 8:27-30; Luk 9:18-21)

¹³ Yesus gonugau tapaimaraneu dudu abai go Sisaria-Pilipai agaig ebu beteimai, gonugau tapaimaraneu dudu guzenai kanabai awareun, “Duailen agen Du Nugau Nag go in anem?”

¹⁴ Go koli auremen, “Duailen ipal agen guzenai ze macanem, ‘Go ze ziwaraneun du, Zon.’ Duailen ipal agen guzenai ze macanem, ‘Go Elaiza.’ Duailen ipal agen enanem, ‘Go Zeremaia ta, go Uwait nugau ze doimai, awaraneun du tub ta.”

¹⁵ Guzenai aurina, Yesus nug gonugau tapaimaraneu dudu awareun, “Agenag iz en in anemen?”

¹⁶ Saimon-Pita nug koli aureun, “Na Kristus, na Uwait, awau muzmuz dacaneu, gonugau nag.”

¹⁷ Yesus nug Saimon koli guzenai aureun, “Saimon, Zona nugau nag, na siksiken! Em ebu du tub nug ze go na aizab tam, bo, nait ze go izal mekai Mesgai wag dareu, nugtal na abai mizeun. ¹⁸ Gonun, iz na aizem, na Pita, aitabag sul. Iz izal duailen aitabag go wag gotularai, bo, noumabun igul nug duailen go i zilaramau. ¹⁹ Iz nait wanim banou mizem. Na duailen sisiaraimai, du tub guzenai auramam, ‘Na igul go guzenabun iboin.’ Na du tub guzenai auren, ‘Na igul go i guzenen.’ Duair in na em ebu auramam, ‘Na igul go i guzenen,’ Uwait nug han Mesgai wag guzental auramau. Duair in na em ebu auramam, ‘Na igul go guzenabun iboin.’ Uwait nug han Mesgai wag guzental auramau.”

²⁰ Guzenaimai, Yesus nug gonugau tapaimaraneu dudu ze guzenai awareun, “Ag duailen ipal guzenai i awaran, ‘Yesus go Kristus.’”

Yesus nug noumaimai, koli usamaun en ze gonugau tapaimaraneu dudu mareun.

(Mak 8:31–9:1; Luk 9:22-27)

²¹ Ziwas go ebu, Yesus nug gonugau tapaimaraneu dudu araog ze mareun, “Iz Zerusalem uzan betemin, go ebu du banban mui, Uwait

ula dacanemen dudu banban mui, kasai ze tapaimaranem dudu go, agen iz mu banou milamam. Iz mu banou mileimai, goagen iwebi, noumanai, bo, gil ainarai ebu, iz koli asanai.”

²²Pita nug Yesus wage wageimai gasageim ze gusig aurabun imai waneun. Pita nug guzenai ze gusig aureun, “Tam pet! Igul go na ebizab i zumau!”

²³Guzenina, Yesus nug koli kekulaimai, Pita guzenai aureun, “Satan, na iz seiab beten! Na izal ame zoi i tapelai dan, iz abu piamoroi. Na dudu agal dabeleu sag sesamoranem, na Uwait nugau dabeleu naliu i sesamoranem.”

²⁴Go Pita guzenai auraimai, go gonugau tapaimaraneu dudu awareun, “Du in iz sesamilai zuabun, go nug en i dabilamau, go gonugau a gegeulanau nugtal gamacaimai, iz sesamilamau. ²⁵Du in go gonugau dorog awau dabun dabilaneu, go gonugau dorog eg umau. Bo, du in gonugau dorog iz en noumaneu, du go gonugau dorog muzmuz suban naliu damau. Go naliu dabun abu itanamau. ²⁶Du tub em ebuan ece unum umau, go noumamau. Ece gonug gonugau dorog awau dabun erunai isanuramau? Go ein ece oimai, koli gonugau dorog awau dabun gau mamau? Tam, go koli nugtal gonugau dorog gau mabun iborain tam. ²⁷Bo, Du Nugau Nag gonugau memeg nugau al mui, gonugau tibur inain abai ereg alaimai, duaillel sisiaramau. Duaillel inen ag igul naliu macanemen, go ece naliu maramau. Duaillel inen ag igul eg macanemen, go ece i maramau. Go duaillel unum sisiaramau. ²⁸Iz ag petak pet awarem, dudu ipal ag ulis em e ebu daremen, ipal noumabun uhu unum i pimamen, bo, ag dabi dabi, Du Nugau Nag gumaraneun du banou sul alaba, ag pimamen.”

Yesus nugau enib ataipet kekuleun.

17 ¹Gil wasolig uteimai, Yesus nug Pita, zaug Zems, gonugau amag Zon mui go sag gonug imaraimai, em tabag banou tub wag siemen. ²Go agal ameag ebu, Yesus nugau enib kekulaimai, ataipet usaleun uligemen. Gonugau siameg am ameg sul uligemen, gonugau tibur galau han am nugau hilaneu sul. ³Guzenina, Moses, zaug Elaiza dual zoimai, Yesus dual ze ze mai darena, uligaremen. ⁴Guzenaimai, Pita nug Yesus guzenai aureun, “Dubanou Ban, ig e ebu dabun naliu! Na ze memen, iz e ebu agal zau ainarai manai, tub nait, tub Moses nugau, tub Elaiza nugau.”

⁵Go guzenai zeze mai darena, pi tub ausiau pet alai kularena, Uwait nug ze tub pi go oug guzenai ze mareun, “Go mogoi go petak izal nagwai pet, iz go en izal oiab nug noumaneu, iz gonugau igul uligaimai, izal oiab naliu meu. Ag gonugau ze dumamen!”

⁶Ziwas go ebu, Yesus gonugau tapaimaraneu dudu agen zeu go doimai, go banban uminaimai, em ebu gabuai mai oiag tonoi eim daremen.

7Guzenina, Yesus go waiagab zoimai, pataraimai, gonug guzenai awareun, “Ag asan. Ag i uminan!” 8Guzenina, go asaimai, goagal ameag nug uligemen, go du tub piab tam, Yesus nugtal dareun uligemen.

9Yesus gonugau tapaimaraneu dudu abai em tabag utei noi noimai, go guzenai ze awareun, “Ag igul e ag ameagab ebu usaleun uligemen ag betei duair i awaran, bo, Du Nugau Nag noumaimai, koli ob ougan usaba, ziwias go ebu ag ein igul uligemen go petak duail el awaran.”

10Bo, Yesus nugau tapaimaraneu dudu agen go guzenai kanabai ze auremen, “Kasai ze tapaimaranem dudu agen einen Elaiza go amegai alamau aimai ze manem?”

11Yesus nug koli guzenai awareun, “Ag go petak ze macanemen, Uwait nugau ze nug guzenai ze meun, Elaiza go amegai alaimai, go koli ece unum suban mamau. 12Bo, iz ag petak awarem, Elaiza go amegai aleun, duail el ag go suban abe mab tam, agen agal dabeleu eim igul eg beu beu go ebu memenin. Ag go guzenai daremen sultal agal igul eg Du Nugau Nag ebu guzenamamen.”

13Go guzenai ze mina, gonugau tapaimaraneu dudu go abe memen, go ze ziwaraneun du, Zon nug en ze meu aimai ze memen.

Yesus nug mogoi tub wes eg mui kasai meun.

(Mak 9:14-29; Luk 9:37-43a)

14-15Yesus gonugau tapaimaraneu dudu abai duail el asiu gotulai daremen ebu betena, du tub nug Yesus waugab zoimai, taubib aimai, eneun, “Dubanou Ban, na izal nagwai bisou peiba, kasen! Go ebeu eg oimai, silosiloi aneu. Go guzenina, umkoskos ab oug nuaneu. Ipal ziwias ebu, ze oug nuaneu. 16Iz nait tapaimaranem dudu go waiagab imai alemin, bo, goagen go kasurabun iborain tam.”

17Yesus nug duail el en acegsisilaimai, awareun, “Ei, einen agal oiagab petak ab tam! Ag gagaliag gusig macanemen. Gil eiceisab iz koli ag abai danai? Gil eiceisab iz ag en koli agal uhu gamahai. Ag mogoi go iz waiab imai alan.” 18Go mogoi go imai alina, Yesus nug wes eg go mogoi go ebu dareun gusig ze aurina, ziwias go ebutal wes eg mogoi go utei waneun. Mogoi go koli naliu usaleun.

19Go guzenina, Yesus nugau tapaimaraneu dudu agen wage wageimai zoimai, Yesus guzenai kanabai ze auremen, “Ig einen wes eg go oiabun iborain tam?”

20Yesus nug koli awareun, “Ag agal oiagab petak emen go ginampet pet. Gonun, ag iborain tam. Iz ag petak awarem, agal oiagab petak emenin paipai a ug ginampet go sul, agen em tabag e guzenai auramamen, ‘Na e eiman asaiba, ulib e beten,’ guzenai aurebi, go bitamau. Agal oiagab petak pet anemen, ag ein salau mabun go mamamen. 21 [Bo, abu tub eiman wes eg go oiabun iborain tam. Uwait auraimai, ee ur maimai, go eim sag petak guzenamamen.]”

Yesus nug noumaimai, koli usabun en ze gonugau tapaimaraneu dudu koli awareun.

(Mak 9:30-32; Luk 9:43b-45)

²²Ziwas tub ebu, Yesus gonugau tapaimaraneu dudu abai ereg Galili bitabun bete betei, gonug guzenai awareun, “Dudu ipal agen Du Nugau Nag ebe garab durub waimai, dudu ipal agal ebeag ebu mamam. ²³Dudu go agen go webi, noumamau. Guzenebi, gil ainarai ebu go koli ob ougan usamau.” Gonugau tapaimaraneu dudu go ze go doimai, goagal oiagab uhu pet usaleun.

Yesus nug Nou zaueim aiwag macanemen en ze awareun.

²⁴Ziwas go ebu Yesus gonugau tapaimaraneu dudu abai Kapaneam uzan betena, Nou zaueim aiwag wanemen dudu agen alai Pita kanabai ze auremen, “Agal tapaimaraneu du go aiwag Nou Zauem macaneu ta?”

²⁵Pita nug euneun, “Io, go macaneu.” Guzenaimai, Pita go zaueim sinai, Yesus nug amegai go kanabai aureun, “Saimon na einai dabelem? E emgasag gumaranemenin dudu banban agen dudu inen ebuan aiwag wanemen? Goagal emgasag ebuan dudu ta, emgasag ipal ebuan dudu?”

²⁶Guzenai aurina, Pita nug koli Yesus aureun, “Emgasag tub ebuan dudu agen aiwag mamam!” Yesus nug koli go guzenai aureun, “Guzenaimai, emgasag e ebuan dudu ag aiwag i mamamen, ag gaul damamen. ²⁷Bo, ig dudu go abai i alalamam. Gonun, na nait karuk wabun kuai oiba, betei ze unig ebu karuk wabun kuai heiba, karuk amegai umam. Go karuk gonugau ogusau oug aiwag tub dareu uligaimai, umam. Go iboin, nagen aiwag go oi betei Nou Zauem maremen, aiwag go igual ereg tutak.”

Du in go Uwait nugau duaillel ula banou pet abai dareu?

18 ¹Ziwas tub ebu, Yesus nugau tapaimaraneu dudu agen, go waugab alaimai, go guzenai kanabai ze auremen. “Du in go Uwait nugau duaillel ula banou pet abai dareu?”

²Guzenaimai, Yesus nug mogoi ginampet tub aurina, alina, mogoi go dudu ameagab ebu ula tapai maimai, awareun, ³“Iz ag petak pet awarem. Bo, ag agal oiagab koli kekulaimai, mogoi ginampet e sul usalab tam, go ag Uwait nugau duaillel i usalamamen. ⁴Du in nugtal gonugau wanib ulagwag i mamau, koli e mogoi ginampet sul usalamau, du go petak gonug dudu ipal zilacaraimai, Uwait nugau amegwab du banou usalamau. ⁵Du in nug iz en dabeleimaimai, go mogoi tub e mogoi ginampet sul imai aimai, suban gumaneu, go iz imailaneu.”

Igul eg nug oiagab petak emenin duaillel eg maraneu.

(Mak 9:42-48; Luk 17:1-2)

⁶Yesus nug koli awareun, “Mogoi ginampet tub iz en gonugau ougab petak eun du tub nug igul eg abai muraba aba, go igul egonou pet. Dudu

ipal agen aiwag uhu ban oimai, du gonugau beu ebu us sil kiai maimai, ze unig oug hamacebi, numau, go iboi, uhu go ginampet. Tam aba, aiu ses Mesgai wag, go uhu banou pet umau. ⁷Bisoua pet, em ebuan dudu ipal agen igul eg maimai, igul gonug duailel ipal naliu agal oiagab petak emen utanem. Igul eg go petak zuaneu, bo, du go igul eg go macaneu, bisou pet, go aiu ses uhu banou pet umau.

⁸Bo, nait eben ta aram ta, gonug igul eg mabun keuizaba, nait eben go ta, aram ta, kuataiba, hamaramam, go iboi. Na muzmuz naliu awau damam. Na i guzenamam na go eben aliag ta, aram aliag mui unum ab i noumaneu oug heizamam. ⁹Bo, nait amen tub nug igul eg mabun keuizaba, amen go gue oi esei heib amen tutak go iboi. Na muzmuz awau damam. Na i guzenamam, na amen aliag go mui unum ab muzmuz elaneu oug heizamam.”

Yesus nug sipsip tub wagemeu gonugau tatau ze en aneun.

(Luk 15:3-7)

¹⁰Yesus nug kolital awareun, “Ag suban go don, ag guzenai i dabilan e mogoi ag gaul mogoi ginaginam aimai i ze macan. Tam! Iz ag petak awarem, Mesgai wag e agal gumaraneun tibur darem, go muzmuz izal Mekai Mesgai wag dareu gonugau amegwab tapai dacanemen. ¹¹[Go einen, Du Nugau Nag go duailel abu egecemenin koli imarabun aleun.]

¹²Du tub gonugau sipsip handret tutak (100), bo, go gonugau sipsip tutak wagemaba, ag dabilemen, go erunamau? Go i itanamau ta? Tam. Go sipsip ipal ⁹⁹em manam ebu utaraba, gig zai dabi dabi, go sipsip tub wagemeu betei itanamau. ¹³Iz ag petak pet awarem, go du go betei sipsip wagemeu go itanai betei peimai, go ougab naliu maimai, siksikeun. Go ⁹⁹sipsip ipal en banban siksikab tam, einen, go kaiab tam. ¹⁴Go igul guzenenegtal, agal Memeag go Mesgai wag dareu nug e mogoi ginaginam utaraba, i abu egecamam.”

Nait zaun igul eg na ebizab maba, nagen koli go isanoromen, naliu damaun en ze.

¹⁵Yesus nug koli awareun, “Bo, nait zaun nug na ebizab igul eg maba, nagen go waugab beteiba, gonugau igul eg meun en auramam. Bo, ag sag wage wageimai go guzenamamen. Guzenemen, gonug nait ze duba, go iboi, nagen nait zaun koli go imacem. ¹⁶Bo, go nait ze duabun utaba, na du tutak ta, du aliag imaraiba,

ag go dual alai hoboiban, gonugau ougab koli kekulabun en auramamen. Guzenaimai, du aliag agen gonugau ze tuguiyai ebi uligamamen. *Lo 19:15*

¹⁷Guzenebi, go agal ze duabun utaba, ag duailel oiagab petak emen du gonugau igul eg meun gonugau ze awarebi, goagen han go isanuramam.

Bo, go duaillel agal ze guzental duabun utaba, aba ag go guzenai auramamen, ‘Na ounab petak ab tam du sul, na *takis* aiwag waneu du sul, na ig ibaig i tulai damam.’”

**Yesus nug em ebuan igul eg ipal uteimai, igul
naliu ipal patai dabun en ze awareun.**

¹⁸Yesus nug koli euneun, “Iz ag petak pet awarem, em ebu, duair in ag auramamen, ‘Na igul go i guzenen’ Uwait nug han Mesgai wag guzental auramau. Em ebu, duair in ag auramamen, ‘Na igul go iboi guzenen,’ Uwait nug han Mesgai wag guzental auramau.

¹⁹Iz ag kolital awarem, e em ebu ziwias tub ebu, du aliag agen goagal oiagab tutak maimai, go ze pataimai, ein ece wabun Uwait auramamen, izal Mekai go Mesgai wag dareu gonug ag ece go maramau. ²⁰Einen, du aliag ta, ainarai agen iz en dabeleimai, izal wanim ebu tulai dacanemen, go iz ag abai danai.”

**Em gasag gumaraneun du gonugau salau du
nugau igul eg zilagai murab tam.**

²¹Ziwias go ebu Pita nug Yesus waugab alaimai, guzenai kanabai aureun, “Dubanou Ban, izal zai nug umkoskos iz ebilab igul eg maba, ziwias eiceisab iz gonugau igul eg zilagai murai? Ziwias kwali ta?”

²²Yesus nug koli guzenai aureun, “Iz guzenai i aizem. Bo, iz ziwias houhou kwali (70) mui guzenenegtal ziwias kwali mui go na aizem. ²³Ag go don, Uwait nugau gumaraneu igul go sul: Ziwias tub ebu emgasag tub gumaraneun du banou nug gonugau salau dudu agal aiwag ameg wabun betei kanabareun. ²⁴Go ece ameg wabun igul go guzenina guzenina, ziwias go ebutal dudu ipal agen du tub, go du banou nugau aiwag asiu milion houhou (10,000,000) oun imai aimai, alemen.

²⁵Salau du gonug aiwag go ameg koli murabun iborain tam. Guzenina, du banou gonug go guzenai aureun, ‘Iz na mui, nait air mui, nait gelenar alenar mui, unum iz ag aiwag i wanemen salau dudu sul usalai maremin, nait ece mui unum dudu ipal agen go gau marebi, iz aiwag go ameg koli go ebuan milebi, wai.’ ²⁶Salau du gonug gumaraneun du banou go waugab zoimai, bisou a ze guzenai aureun, ‘Na iz en bisom pen. Iz nait aiwag omin unum koli na mizai.’ ²⁷Em gasag gumaraneun du banou nug du go en bisou peimai, gonug du go guzenai aureun, ‘Na izal aiwag omen go iz koli i milen. Iz aiwag go dabui sikeun.’ Go guzenai aurina, salau du go utei waneun.

²⁸Bo, salau du gue go utei beteimai, abu ebu salau du tub zaug gonugau aiwag ameg ginampet oun tuloroimai, gonug gonugau zaug beu patai suoraimai, guzenai aureun, ‘Na izal aiwag ipal gaul omen koli ameg unum pigai milen.’ ²⁹Guzenina, salau zaug gonug em ebu alai noimai,

bisou a ze mui salau zaug go aureun. ‘Na iz bisom peben, iz nait aiwag ameg koli mizai.’ ³⁰Bo, gonug gonugau salau zaug nugau ze duab tam, gonug du go aureun. ‘Bo, na izal aiwag gaul omen koli milab tam, gonun, iz na hiacaranem zau oug heizai. Na izal aiwag ameg go koli mileben, petak na utei unamam.’ Guzenai auraimai, du go hiacaranem zau oug heun. ³¹Guzenina, gonugau salau zaugul ipal agenag igul go uligaimai, goagal oiagab eg wina, goagal gumaraneun du banou ze go unum betei auremen. ³²Guzenaimai, gumaraneun du nug gonugau salau du eg uloron, waugab alina, gonug guzenai aureun, ‘Na salau du eg pet. Na izal aiwag gaul mizena, omen, na iz aiwag tamacag ailina, iz petak aimai izal aiwag ameg na ebuan koli wab tam. ³³Izan na en bisom pemin, na nait salau zaun bisou piab utemen. Izan na en guzenemin sul, na han go en guzenabun utemen. Na igul eg mem.’ ³⁴Gonun, emgasag go gumaraneun du go aigsisilaimai, salau du go hiacaranem zau oug heimai, go salau banou pet moroimai, go guzenai aureun, ‘Na koli izal aiwag ameg unum milamam.’”

³⁵Yesus nug ze go poaimai, koli guzenai awareun, “Agal oiagab gusig maiban, agal zaiagar en igul eg memenin unum zilagai maramamen. Ag i guzenamamen, emgasag gumaraneun du gonug gonugau salau du guzeneu sul, igul go guzental izal Mekai go Mesgai wag dareu gonug han ag unum, igul go guzenaramau.”

Yesus nug duair egaraimai, koli uta utaranemenin en ze awareun.

19 ¹Yesus nug duaillel ze go marai poaimai, go Galili agaig uteimai, Zudia agaig Zordan Ze tubaim dareu ebu beteun. ²Betena, duaillel asiu ebeu mui go sesamorai betena, gonug go ebu duaillel ipal ebeu mui kasareun.

³Parisi dudu ipal agen Yesus polumurabun en go waugab alaimai, guzenai kanabai ze auremen. “Igal kasai ze nug eneu, air tub igul eg i meun, gonugau gamu nug gonugau dabeleu eim utabun iboin ta, tam?”

⁴Yesus nug koli guzenai awareun, “Ag Uwait nugau ze enai dareu i nanalanemen ta?

‘Amegai Uwait nug du mui, air mui, patarai meun.’ *Stat 1:27*

⁵‘Igul go en, du gonugau wau dual eregtal atai daimai, agal enimag tutak tulamam.’ *Stat 2:24*

⁶Gonun, du go air dual goagal enimag beu beu aliag i dareu, bo, goagal enimag tutak sul usalai damau. Guzenaimai, Uwait nug ag tutak enimag sul tulareun, gonun, duair tub nug koli i atalaramau.”

⁷Guzenina, Parisi dudu agen Yesus guzenai auremen, “Nait ze petak zob, Moses nugau kasai ze nug einen guzenai aigeun, du tub gonugau air utaba, unabun en sikut tub waimai, gonugau wau muramau, go guzenaimai, petak gonugau wau utaba, unamau? Go einen guzenai ze meun?” *Lo 24:1-4*

⁸ Yesus nug koli awareun, “Moses nug agal oiagab gusig mina, uligaraimai, dudu ag ailel omenin, utarebi, unabun iboin awareun. Bo, getal du air dual patarai meun ziwasi ebu, igul go enai i dareu. ⁹ Iz ag petak awarem, du in gonugau wau wal igul i meun, du gonug gonugau wau gaul uteimai, go air tub umau, go go nugtal gonugau air uteimai, go nugtal duaillel egaranemenin kasai ze etuburacamau.”

¹⁰ Parisi dudu go wanena, Yesus nugau tapaimaraneu dudu agen go guzenai auremen, “Air mui dabun igul enai, gonun, igual dabeleu enai dudu ag air i umamen gaul damamen, igul go naliu.”

¹¹ Guzenina, Yesus nug koli guzenai awareun, “Gaul dabun en ze go duaillel unum sesamorabun iborain tam. Bo, Uwait nug sag duaillel ipal gusig marena, go ze gosag sesamoranem. ¹² Ag go don! Dudu ipal ag air i egaranemen, gonugau bigeg enai: dudu ipal agal anaiagar agen ebeu eg mui soliang wemen, gonun, ag mogoi patabun iborain tam. Bo, dudu ipal agen dudu ipal eg maremenin, gonun, ag air wabun iborain tam. Dudu ipal ag Uwait nugau salau oimai, ag air i egaranemen. Du in go ze e doimai, sesamorabun go sesamoramau.”

Yesus nug mogoi ainagul ginaginampet suban dabun en ze mareun.
(*Mak 10:13-16; Luk 18:15-17*)

¹³ Ziwas go ebu, duaillel agen goagal geleagar aleagar Yesus nug goagal gagaliag pataba, Uwait nug go gusig marabun en aurabun go waugab imarai alemen. Bo, gonugau tapaimaraneu dudu agen duaillel go zamaremenin. ¹⁴ Guzenina, Yesus nug gonugau tapaimaraneu dudu awareun, “Ag go mogoi ainagul utarebi, iz waiab alamam. Ag kuatai ze i awaran. Duaillel ag mogoi ainagul ginaginam e sul, ag abiu Uwait go agal gumaraneu du banou.”

¹⁵ Go gonugau ebeu go mogoi ainagul goagal gagaliag ebu maimai, Uwait go auraimai, utei waneun.

Silin mogoi tub go ece asiu a.
(*Mak 10:17-31; Luk 18:18-30*)

¹⁶ Silin mogoi tub go Yesus waugab alaimai, aureun, “Du Banou, iz ein igul naliu memin, izal dorop muzmuz awau damau?”

¹⁷ Guzenai aurina, Yesus nug aureun, “Na einen igul naliu mabun iz ailem? Du tub tutak go naliu. Bo, na awau dabun aiba, kasai ze unum sesamoramam.”

¹⁸ Du go nug koli Yesus aureun, “Ein kasai ze?”

Guzenai aurina, Yesus nug koli du go aureun, “Kasai ze enai, ‘Na du tub weben, i noumamau’, ‘Na du tub nugau air dual wal igul i men’, ‘Na dudu ipal agal ece zob i on’, ‘Na du tub nugau enib ebu polu ze i men’, ¹⁹ ‘Na nait memen anan agal ze unum sesamoren,’

‘Na nag en ounab nug noumanem sul, dudu ipal en guzenal guzenamam.’”

Kisim Bek 20:12-16

²⁰ Silin mogoi gonug koli guzenai aureun, “Is kasai ze go unum sesamoranem. Bo, ein igul naliu iz mab tam?”

²¹ Yesus nug du go koli guzenai aureun, Na du naliupet pet usalabun aba, na beteiba, nait ece unum dudu ipal mareben, goagen ece go gau mebi, aiwag go oiba, dudu ecesab tamacag aiwag go dou maramam. Na guzenemen, nait ece asiu pet Mesgai wag damau. Guzenaimai, na alaib iz sesamilen.”

²² Silin mogoi go ze go doimai, gonugau ougab uhu mina, go utei waneun. Einen, go ece asiu mui, gonun, igul go guzenabun iborain tam.

²³ Guzenaimai, Yesus nug gonugau tapaimaraneu dudu awareun, “Iz ag petak pet awarem. Dudu ece asiu mui ag Uwait nugau duail el usalabun anmamamen.

²⁴ Iz ze go koli awarem. Egun tub kamel go tibur galau sopwanem kulam nugau biag ougeim siabun anmamau. Bo, duail el ece asiu mui ag Uwait nugau duail el usalabun banban anmamamen.”

²⁵ Gonugau tapaimaraneu dudu agen ze go doimai, go esilakaimai, enemem, “Guzenaba, Uwait nug du in imaba, go dual ereg muzmuz damau?”

²⁶ Yesus nug uligaraimai, awareun, “Dudu agen igul go guzenabun iborain tam. Bo, Uwait nug sag igul go unum guzenabun iboin.”

²⁷ Go guzenai ze mina, Pita nug koli aureun. “Na ig uligigen, ig igual ece unum uteimai, na sesamizai alemun. Ig ein ece umam?”

²⁸ Yesus nug koli awareun, “Iz ag petak pet awarem, em awau usalaba, Du Nugau Nag go wanib banou mui gumaraneu du nugau biz ebu hubaba, ziwag go ebu ag iz sesamilanemen dudu ag han gumaranem dudu agal biz begurug ebu hoboimai, agal salau Israel agal ug tutak tutak begurug agal igul sisiaramamen. ²⁹ Duair in izal wanim ulapwag mabun dabeleimai, go gonugau zau, gonugau apag, gonugau amag, gonugau abiag, gonugau memeg, gonugau anag, gonugau gelegul, gonugau alegul, gonugau em uteimai, izal igul sesamoreun, aiu ses Uwait nug ece go utei aleun sul, handret tutak muraba, go muzmuz naliu awau damau. ³⁰ Ag go don, dudu asiu ag ulis wanimag banou a daremen, aiu ses ag wanimag tamacag gaul du sul damamen. Bo, dudu ulis gaul daremen, aiu ses ag wanimag banou a damamen.”

Dudu wain ougem salau macanemen goagal tatau ze.

20 ¹ Yesus nug koli eneun, “Uwait nugau gumaraneun igul enai dareu. Ziwag tub umaseu pet, wain ougem atag du nug gonugau ougem ebu salau mabun dudu ipal ee ig wanem empip ebu daremen itanarai beteun. ² Go betei dudu ipal tularaimai, guzenai awareun, ‘Ag

izal wain ougem ebu, betei salau oi milebi, iz ag aiwag gil tutak ebuan aiwag guzental marai.’ Guzenina, dudu goagen io aurina, go palautarena, gonugau ougem ebu salau mabun betemenin. ³Go ougem atag du go koli am ameg sai naliu sul ee ig wanem empip ebu koli beteimai, dudu ipal gaugaul tapai daremen uligareun. ⁴Guzenaimai, gonug dudu go awareun, ‘Ag han betei izal wain ougem ebu salau oi milebi, iz ag aiwag marai.’ ⁵Guzenina, dudu go salau mabun wanena, go koli am ameg begurug ebu guzental guzeneun. Dai dai, go am ameg ainarai guzental guzeneun. ⁶Du go gue am ameg tabkuai mazicina, koli ee ig wanem empip ebu beteimai, go dudu ipal go ebu gaugaul daremen uligareun. Gonug awareun, ‘Ag einen e ebu gaugaul daremen?’ ⁷Dudu go agen koli go guzenai auremen, ‘Ig du tub nug salau migab tam, gonun, ig gaugaul darem.’ Goagen guzenai aurina, gonug koli dudu go awareun, ‘Ag betei izal wain ougem ebu salau macan.’

⁸Guzenaimai, umusig mina, ougem atag du nug salau dudu gumaraneun du banou aureun, ‘Na salau dudu ularemen, alebi, goagal aiwag maren. Ses betei salau memen dudu, go aiwag amegai maraib, aiu ses, amegai betei salau memen dudu, koli aiwag maramam.’ ⁹Dudu go beu beu go ulistal betei, salau memen gil tutak ebuan aiwag omen. ¹⁰Guzenina, amegai betei salau memen dudu agen ‘Ig aiwag asi pet umam’ aimai dabilemenin, bo, ag han guzental gil tutak ebuan aiwag omenin. ¹¹⁻¹²Go aiwag go oimai, ougem atag du mui gonogonocaimai, go guzenai auremen, ‘Dudu go ag ulistal betei, salau ginampet memen. Ig umaseutal betei, salau memun, am nug atai pet heligeun. Bo, ig aiwag banou migab tam. Dudu go aiwag omenin sul ig han guzental migem.’

¹³Guzenai ze mina, ougem atag du gonug salau du tub guzenai aureun, ‘Zai, iz na polu ze aizab tam. Iz na ibaiz ze pataimai, aizemin, na e gil tutak ebu salau meben, iz gil tutak ebuan aiwag mizai, guzenai aizemin, na io aimai ailemen. ¹⁴Ulis na nait aiwag oiba, nait uzan utei beten. Du go gue ses alai salau meun go han na omen sul muramoroi. ¹⁵E izal aiwag, gonun, izaseu dabeleimai, igul go guzenem. Iz igul naliu go guzenem, na einen ounab eg wem?’”

¹⁶Guzenaimai, Yesus nug eneun, “Dudu go ag wanimag banou tam ses daremen ag amegai damamen. Amegai daremen dudu ag wanimag a, ag ses pet damamen.”

Yesus go noumaimai, gil ainarai ebu koli usamaun en ze gonugau tapaimaraneu dudu kolital awareun.
(*Mak 10:32-34; Luk 18:31-33*)

¹⁷Yesus gonugau tapaimaraneu dudu begurug go ereg Zerusalem uzan betei beteimai, gonug ze wageimai awareun, ¹⁸“Ag izal ze go don! Ulis ig Zerusalem uzan betemun, go ebuan dudu agen Du Nugau Nag Uwait ula

dacanemen dudu banban mui, kasai ze tapaimaranem dudu mui, goagal ebeag ebu mamam. Go dudu banban agen uzanan dudu agal ze doimai, webi, noumabun en ze patamam. ¹⁹Goagen emgasag ipal ebuan dudu agal ebeag ebu mebi, dudu goagen go ze biabial kuai ze auraimai, esalau sul oimai, a gegeulanau ebu asai mebi, noumamau. Bo, gil ainarai ebu Uwait nug go koli usai mamau.”

Zems zaug Zon dual goagal anaiaug nug Yesus ze tub kanabai aureun.
(*Mak 10:35-45*)

²⁰Ziwas go ebu, Zebedi nugau wau nug gonugau gelegul aliag Yesus waugab imarai alaimai, go ece tub en kanabai aurabun eun.

²¹Yesus nug air go aureun, “Na ein ece umam?” Air gonug koli guzenai aureun, “Na iz ibail baib guzenai mamam. Izal mogoi aliag e aiu ses na gumarabun du banou usalemen, izal nagwai tub nug eben naliu eiman hubamau, nagwai tub nug eben nanai eiman hubamau, go na ibaiz damam.”

²²Go guzenai ze mina, Yesus nug koli awareun, “Ze go kanabai ailemen gonugau bigeg ag abiu mab tam. Iz ze gap tub ebu dareu zai, ag ze go zabun iboin ta?” Mogoi aliag goagen koli auremen, “Ig ze go zabun iboin.”

²³Yesus nug mogoi aliag go koli awareun, “Go petak, ag izal gap ebuan ze zamamen, bo, du in go izal ebe naliu eiman simai hubamau, du in go ebe nanai eiman simai hubamau, go izal salau tam. Izal Mekai nug dudu ipal agal empip suban mareun dareu.”

²⁴Yesus nugau tapaimaraneu dudu ipal houhou agen ze go doimai, go mogoi aliag go en aiag sisileun. ²⁵Yesus nug gonugau tapaimaraneu dudu awarina, go alai unum gotulina, gonug guzenai awareun, “Ag abiu em ebuan dudu agal gumaranem dudu banban agen agal wanimag wag maimai, agal duail el gumaranem. Duail el agal dudu banban agen duail el agal ze sesamorabun gusig ze awaranem. ²⁶Ag izal duail el ag igul go i guzenan. Bo, duair tub nug agal banou dai aba, go iboi, amegai go agal salau duair damau. ²⁷Duair tub nug ‘iz wanim banou a amegai dai’ aba, go iboi, amegai go agal salau duair (slev) sul damau. ²⁸Go sul, Du Nugau Nag duail el ipal agen go isanurabun en alab tam. Tam! Go duail el ipal isanarabun en aleun. Go noumaimai, duail el asi uwait nug waugab imarai simau.”

Yesus nug du aliag ameg kumi kasareun.
(*Mak 10:46-52; Luk 18:35-43*)

²⁹Yesus gonugau tapaimaraneu dudu abai Zeriko uzan betena, duail el asi uwait agen sesamarai betemen. ³⁰Du aliag ameg kumi go abu gasag eim hobo daremen. Go Yesus zoi zilarai bitabun ina, ze doimai, go agen

guzenai ul emen, “Dubanou Ban, na Devit nugau Ug, na ig en bisomig peiba, ig isanigen.”

³¹Duaillel asiu agen du aliag go en acegisisilaimai, ul emen utamam aimai gusig pet awaremen. Bo, go agal ze duab tam, go ulai ban pet ul aimai, guzenai ul emen, “Dubanou Ban, na Devit nugau Ug. Na ig en bisomig peiba, ig isanigen.”

³²Yesus go tapai daimai, dudu aliag go ularaimai, awareun, “Iz ag erunarabun ailemen?”

³³Dudu aliag ag en koli auremen, “Dubanou Ban, na igual amecig waipai migemen, ig em uligamam.”

³⁴Yesus go du aliag bisomagar peimai, goagal ameag ebeg sil patena, ziwag go ebutal goagal ameag waipina, koli abu pemenin. Guzenaimai, go sesamorai wanemenin.

Yesus go emgasag gumaraneu du tub king sul, Zerusalem uzan beteun.

21 ¹⁻²Yesus go gonugau tapaimaraneu dudu abai, Zerusalem ban uzan bitabun bete beteï, Betpage uzan Oliv em manam ebu beteimai, Yesus nug gonugau tapaimaraneu du aliag palautaraimai, awareun, “Ag ulibe uzan ginampet ebu beteiban, egun donki gonugau nag dual, us sil kiarai memen darem uligaiban, us waipaiban, donki go gonugau nag dual iz waiab imarai alan. ³Bo, du tub nug ag kanabai ze awaraba, go donki atag du guzenai auran, ‘Go donki gonugau nag dual igual Dubanou Ban, go ag abai salau a.’ Guzenaimai, go pigai ag palautaraba, alamamen.”

⁴Igul go Uwait nugau ze doimai, awaraneun du tub nug ze aneun go unum usaleu.

⁵“Ag Saion duaillel guzenai awaramamen, ‘Agal emgasag gumarabun du banou aleu. Go nugtal gonugau wanib i ulagwag macaneu, go donki ebu hoboimai, aleu.’” *Aisaia 62:11, Sekaraia 9:9*

⁶Guzenaimai, Yesus nugau tapaimaraneu du aliag agen gonugau ze awareun sultal guzenemenin. ⁷Guzenaimai, go donki nag Yesus waugab imai alaimai, goagal tibur galau huia donki nugau bugazig ebu duei mina, Yesus nug wag simai hoboun. ⁸Duaillel ipal asiu agen goagal tibur galau oimai, abu ebu duei betemenin. Duaillel ipal agen nun gau kuataraimai, abu ebu duei betemenin. ⁹Guzenaimai, duaillel ipal agen Yesus ula maimai, amegai betemenin. Duaillel ipal agen ses sesamoraimai, guzenai ul ai betemenin, “Devit nugau Ug gonugau wanib wag murab.

Du go gue Uwait Ban nugau wanib ebu aleu, ulagwag murab, Uwait nugau wanib sag ulagwag pet murab.” *Buk Song 118:26*

¹⁰Yesus go Zerusalem ban uzan simai, uzanan duaillel go agen go uligaimai, esilakaimai, guzenai ze memen, “Du go in?”

¹¹Go dual ereg betemenin duailel agen guzenai awaremenin, “Go Yesus, Uwait nugau ze doimai, awaraneu du. Go Nasaret uzan Galili agaigan.”

**Yesus go Uwait ecesab muranemen zau banou wanib
tempel zaueim sieun.**

(Mak 11:15-19; Luk 19:45-48; Zon 2:13-22)

¹²Yesus go Uwait ecesab muranemen zau banou tempel zau oug simai, duailel go ecesab palautaraimai, gaugau mai darena Yesus nug zamarina, unum wanemenin. Go dudu goagal aiwag ig wai wanemen biz mui, meg palautaimai daremen nugau biz mui oimai, hamareun. ¹³Gonug dudu go awareun, “Uwait nugau ze sikut wai memen dareu,

‘Izal ecesab milanemen zau banou duailel goagen iz ibail ze mabun zau anem.’ Bo, ulis goagen zob dudu agal wageimai dabun empip sul usalai mem.”

Aisaia 56:7, Jeremaia 7:11

¹⁴Yesus go Uwait ecesab muranemen zau banou zaueim darena, dudu ipal ameag kumi mui aramag eg mui go waugab alina, gonug kasareun. ¹⁵⁻¹⁶Mogoi agen zaueim go daimai, guzenai ul emen, “Devit nugau Ug gonugau wanib wag macan.” Uwait ula dacanemen dudu banban mui kasai ze tapaimaranem dudu mui go Yesus nug gugeg ipal atai meun uligaimai, mogoi go agal ze doimai, oiagab eg wina, goagen Yesus guzenai kanabai ze auremen, “Na ze go zememen dom ta?” Yesus nug koli awareun, “Io. Iz dom. Bo, ag Uwait nugau ze go i nanalanemen ta?

‘Na mogoi mui, mogoi ginampet ap zanemen ipal mui, go nugtal ze abai marena, go agen nait wanim naliupet wag mizamam.”

Buk Song 8:2

¹⁷Yesus go dudu go utaraimai, ban uzan utei betei, go Betani uzan nineun.

Yesus nug sabug a ze aurina, meu meun.

(Mak 11:12-14, 20-24)

¹⁸Yesus go gonugau tapaimaraneu dudu abai go umaseu pet koli ban uzan alabun alalai, Yesus go we weun. ¹⁹Go abu gasag sabug a uligaimai, waugab beteun. Bo, go a dab useg tamacag, go gau sag darena, uligeun. Guzenaimai, gonug a go aureun. “Na dab kolital i mamam. Tam pet.” Gonug guzenai aurinatal, a go pigai meu meun.

²⁰Gonugau tapaimaraneu dudu agen igul go uligaimai, esilakaimai, goagen guzenai ze memen, “A go erunai pigai meu meun?”

²¹Yesus nug koli gonugau tapaimaraneu dudu awareun, “Iz ag petak pet awarem, agal oiagab petak aimai, ag dabeleu aliag i umamen, iz a go guzenem sul, ag han guzenamamen. Bo, ag igul go sag i guzenamamen. Tam pet! Ag ulibe em tabag auramamen, ‘Na asaiba, ze unig oug kuanai

numam!' aurebi, go guzenamau. ²²Gonun, ag agal oiagab petak aimai, ein igul Uwait nug mabun auramamen, go igul go guzenamau."

**Yesus go inug gusig moroun dudu agen bigeg go piabun
kanabai ze auremen.**

(Mak 11:27-33; Luk 20:1-8)

²³Yesus go koli Uwait ecesab muranemen zau banou zaueim simai, duaillel Uwait nugau ze abai marai daren daren, Uwait ula dacanemen dudu banban mui, ze tapaimaranemen dudu ipal mui, go go waugab alaimai, go kanabai ze auremen, "Na ein gusig oimai, igul go guzenanem? In nug gusig go na mizeun?"

²⁴Yesus nug koli dudu go awareun, "Izan han ze tub kanabaramoroi. Agen amegai izal ze bigeg go kanabaramoroi ailebi, izan han iz ein gusig eiman igul go guzenanem bigeg go ag awarai. ²⁵Ze ziwaraneun du, Zon, gonugau gusig eru eiman aleun? Gusig go Uwait nug moroun ta, ta du tub nug gusig go moroun ta?"

Go ze go doimai, agzozou ze maimai, enemem, "Ig go ein ze aurab? Ig go Uwait nugau gusig eiman ze ziwaraneun emun, gonug aigamau, 'Gonun, ag einen agal oiagab petak abun utemenin?' ²⁶Bo, 'Gonugau gusig go du nug moroun,' guzenai auremun, duaillel agen ig ein igul ig ebilangeb mamam aimai uminaremen. Einen, ag Zon go Uwait nugau ze doimai, awaraneun du guzenai gusig dabilanem." ²⁷Gonun, goagen Yesus koli auremen, "Ig i abiu." Gonug koli dudu go awareun, "Iz han, inug iz gusig milena, igul go guzenanem ag i awarai."

Yesus nug mogoi aliag agal tatau ze en meun.

²⁸Yesus nug koli awareun, "Agal dabeleu erunai dareu? Du tub go mogoi aliag a. Du go nug gonugau nag kaman betei, aureun, 'Nagwai, ulis na wain ougem betei salau men.' ²⁹Nag nug koli memeg aureun, 'Iz ougem unabun utem.' Guzenai ze meun, go koli dabeleu oimai, ougem betei salau meun. ³⁰Du gonug gonugau amag ginam guzentel betei, aureun, 'Na han wain ougem betei salau men.' Gonug koli aureun, 'Io, mekai, iz bitai.' Bo, go guzenai auraimai, go ougem bitab tam. ³¹Ziwas go ebu, nag in nug gonugau memeg nugau ze sesamoreu?" Duaillel agen guzenai ze memen, "Mogoi kamam nug gonugau memeg nugau ze sesamoreun."

Guzenaimai, Yesus nug dudu go awareun, "Iz ag petak pet awarem, *takis* aiwag wanemen dudu mui, abu ebuan ailel mui, ag amegai Uwait nugau duaillel usalamamen. ³²Ze ziwaraneun du, Zon go waiagab alaimai, abu naliu abai mareun, ag go en agal oiagab petak ab tam. Guzenina, aiwag wanemen dudu mui, abu ebuan ailel mui, goagal oiagab go en petak emen. Ag duaillel go agal igul uligaraimai, agen agal igul eg ebuan koli kekulab tam gonun, Zon en oiagab petak i eu."

Dudu eg agen wain ougem gumanemen agal tatau ze.

(Mak 12:1-12; Luk 20:9-19)

³³Yesus nug awareun, “Ag tatau ze tub don. Du tub go em banou mui, go wain ougem maimai, wain ug baimai, gilana otoi meun. Go wain ougem ebu dab pasiabun ob eleimai, ougem gumabun zau huia wag meun. wai unum suban darena, dudu ipal gonugau ougem salau mabun gau maraimai, salau mina mina, ougem atag du nug go uzan tub pulig waneun.

Buk Song 80:8

³⁴Wain dab useg mina, wabun ziwasa alina, ougem atag du gonug gonugau salau dudu ipal awarina, ‘Wain dab ipal wabun ougem gumanemen dudu go darem ebu beten,’ guzenai awarina, betemen.

³⁵⁻³⁶Wain ougem gumanemen dudu agen salau dudu ainarai go gusig pataraimai, du tub wina, waneun, du tub wina, noumeun, du tub go aiwag sil wina, noumeun. Go guzenina, ougem atag du gonug koli gonugau salau dudu asiu palautarena, go wain ougem gumanemen dudu waiagab betemen. Dudu go agen salau dudu ainarai amegai ugaremenin sultal, salau dudu asiu go han guzental ugaremenin. ³⁷Guzenina, du gonug nug nugau nag pet palautina, dudu go daremen waiagab beteun. Memeg nug guzenai dabeleun, ‘Go izal nagwai nugau ze doimai, eg i muramam.’ ³⁸Bo, wai gumanemen dudu go agen ougem atag du nugau nag alina, uligaimai, go guzenai ze memen, ‘Gonug gonugau memeg noumaba, gonugau ecesab unum umau. Ig go wemun, noumaba, gonugau wain ougem ig umam. Go ig guzenamam.’ ³⁹Guzenaimai, go mogoi go wain ougem ebu imai noimai, ougem gasageim wai hina, noumeun.”

⁴⁰Yesus nug dudu daremen awareun, “Agal dabeleu erunai dareu? Wai atag du go wain ougem alaimai, wai gumanemen dudu go erunaramau?”

⁴¹Goagen auremen, “Gonug, dudu eg go unum ugarai heimai, go koli dudu ipal go wain ougem gumabun imaramau. Aiu ses go wain useg maba, wabun ziwasa ebu, wain ougem gumamam dudu goagen ougem atag du wain dab ipal muramam.”

⁴²Yesus nug koli awareun, “Ag Uwait nugau ze go ze meu nanalanemen ta?

Zau sanag go zau macanemen dudu agen eg aimai, gasag memen.

Ulis, zau sanag go ula ebuan zau sanag gusig naliu usaleun. Uwait Ban nugtal sanag go salau banou moroun, go naliupet pet ig uligem.”

Buk Song 118:22

⁴³Yesus nug dudu go awareun, “Getal Uwait nug ag gumaraneun, ulis Uwait nug ag utaraimai, duailel ipal go gonugau salau suban macanem gonug duailel go gumaramau. [⁴⁴Duair in sanag go ebu titou amau, duair go unum kitkuataba, sibsib mamau. Zau sanag gonug du tub ebu nuba, du go gue waibul sul usalamau.>]”

⁴⁵Uwait ula dacanemen dudu banban mui, Parisi dudu mui, go agen Yesus nugau tatau ze doimai, go abiu memen, go goagal igul en ze meu. ⁴⁶Gonun, goagen go ebutal Yesus gusig pataporoi dabilemenin. Bo, go abiu duaillel agen Yesus go Uwait nugau ze doimai, awaraneu du aimai dabilemenin, gonun, go duaillel uminaraimai, utemen.

Air oimai, ee banou aganemen en tatau ze.

22 ¹Yesus nug tatau ze eiman duaillel guzenai awareun, ²“Uwait nug gumaraneu igul go enai. Ziwas tub ebu gumaraneu du banou king nug gonugau nag air wabun ina, ee agabun meun. ³Gonun, gonugau salau dudu palautarena, betei dudu go gonug getal awareun, awaraimai, imarai alai ag gonugau ee agamau ebu alamam. Bo, go dudu go awaremen alab utem.

⁴Guzenina, gonug gonugau salau dudu ipal gusig ze mui palautaraimai, awareun, ‘Iz ulis ee agaimai darem. Izal bulumakau zawai mui egun sirag mui unum waimai, mis memin. Ag air wabun ee agemin ebu alan.’

⁵Bo, gonugau salau dudu palautarena, go betei ze go awarina, dudu goagen goagal ze duab tam, go goagal salau ebu beu beu wanemen. Du tub go gonugau ougem beteun. Du tub go gonugau ee palautaneu zau beteun. ⁶Dudu ipal agen gonugau salau dudu gusig pataraimai, ze biabial kuai ze awaraimai, ugarina, noumemen. ⁷Guzenina, gumaraneu du banou king go aigsisilaimai, gonugau malai dudu palautina, betei dudu go unum ugaraimai, agal ban uzan ab sil agemen.

⁸⁻⁹Guzenaimai, gonug gonugau salau dudu ipal awareun, ‘Iz air wabun ee agemin. Bo, iz duaillel awaremin go alai ee zabun utem, gonun, ag ban abu ebu beteiban, duaillel asiu uligaraimai, awarebi, ee agemin ebu alamam.’ ¹⁰Gonug guzenai ze mina, gonugau salau dudu agen abu ebu unum betei duaillel naliu mui eg abai ereg awarina, gonugau ee zabun zaueim unum alai kapai daremen.

¹¹Guzenina, gumaraneu du banou go zaueim go simai, du tub go tibur galau naliu i arugeun uligeun. ¹²Emgasag gumaraneu du banou gonug du go guzenai aureun. ‘Zai, na einen tibur galau naliu arugab tam, na e zaueim zomen?’ Bo, du go go aurab tam, go ze tamacag a dareun.

¹³Guzenina, du banou go nug gonugau salau dudu awareun, ‘Ag du gonugau arab ebeg mui, us sil kiaiban, uzaneim oi hamacebi, go umaum weinai daimai, acig kititkatitai damau.’”

¹⁴Yesus nug guzenai ze meun, “Uwait nug duaillel asiu go waugab alabun ulareu, bo, go duaillel asiu i tapai maraneu.”

Dudu agen aiwag Sisar murabun iboin tam ta aimai

|Yesus kanabai ze auremen.

(Mak 12:13-17; Luk 20:20-26)

¹⁵Ze go meun doimai, Parisi dudu agen uzaneim noimai, agzozou Yesus polumorabun ze patemen. ¹⁶Guzenaimai, goagen goagal tapaimaranemen

dudu ipal mui Herot nugau ze sesamoramen dudu mui go Yesus waiagab palautarena, alemen. Go alaimai, guzenai auremen, “Du Banou, ig abiu na petak ze ze macanem du. Na dudu agal dabeleu i duanem. Wanimag a dudu sag na i piaranem. Na Uwait nugau ze petak pet ig abai miganem. ¹⁷Guzenaimai, na einai dabelem? Ig aiwag Sisar muramam ta utamam? Nagen ig aigamam.”

¹⁸Yesus go nug polumurabun en ze memen abiu maimai, gonug koli awareun, “Ag polumanemen dudu, ag einen iz ame patemen? ¹⁹Ag aiwag macanemen tub oi abai milebi, iz piai!” Goagen aiwag go oi alai moromen.

²⁰Gonug kanabai awareun, “Aiwag e ebu wanib dorog mui inugau?”

²¹Goagen koli auremen, “Sisar nugau.”

Guzenai aurina, Yesus nug koli awareun, “Guzenaimai, ag Sisar nugau ece go Sisar muramamen. Uwait nugau ece, go Uwait muramamen.”

²²Go ze go doimai, dabeleu asiu oimai, utei wanemenin.

Yesus nug dudu noumaimai, koli asamam en ze awareun.

(Mak 12:18-27; Luk 20:27-40)

²³Gil go ebutal, Sadiusi dudu agal dabeleu enai, dudu noumamam, koli i asamam aimai ze macanem, goagen Yesus waugab zoimai, guzenai kanabai ze auremen, ²⁴“Du Banou, getal Moses nug guzenai ze meun, ‘Du tub go air oimai, gonugau wau mogoi tamacag noumai utei unaba, gonugau amag nug han apag nugau wab air oimai, mogoi muramau, mogoi go apag noumeun nugau mogoi sul usalamau.’

Lo 25:5

²⁵Bo, umtabag du tub gonugau gelegul kwali a. Mogoi kaman air oimai, go mogoi tamacag noumeun. Guzenaimai, amag tub nug gonugau wab air oun. ²⁶Go han mogoi tamacag noumeun. Guzenaital betei, dudu kwali go agen air go omen, unum nanag tamacag gaul noumemen. ²⁷Guzenaimai, wab air go dareun nug, ses noumeun. ²⁸Air go dudu kwali agen omenin, aiu ses noumemen duaille koli asamam ziwes ebu, air go in nugau tuguiwai damau? Em ebu, go dudu kwali noumemen goagen air tutak omenin.” ²⁹Guzenai aurina, Yesus nug koli guzenai awareun, “Ag Uwait nugau ze mui gonugau gusig mui ag i abiu. Gonun, ag polumanemen dudu pet! ³⁰Duaille noumemen koli asamam, gue Uwait nugau tibur Mesgai wag darem sul damam. Ag i egaramam. ³¹Uwait nugau dudu go koli asamam aimai ze meun. Ag ze go nanalanem ta?

³²‘Iz Abraham, Aisak, Zekob goagal Uwait.’

Kisim Bek 3:6

Uwait go dudu noumemen agal Uwait tam, go dudu muzmuz awau dacanemen agal Uwait.”

³³Guzenai awarina, duaille go gonugau ze naliu doimai, esilakemenin.

Ein kasai ze go banou pet?

(Mak 12:28-34; Luk 10:25-28)

³⁴Yesus nug ze go Sadiusi dudu awarina, go koli ze mabun iborain tam. Guzenina, Parisi dudu go ze go doimai, gotulaimai, ³⁵Parisi du kasai

ze tapaimaraneu du tub nug Yesus polumurabun en guzenai kanabai aureun, ³⁶“Du Banou, ein kasai ze go banou pet?”

³⁷Guzenina, Yesus nug koli aureun,

“Na nait ounab mui nait dorop mui nait dabeleu mui nait Uwait Ban nug en unum noumen.’ Lo 6:5

³⁸Go kasai ze petak banou pet, amegai dareu. ³⁹Kasai ze banou tub go bigeg enai.

‘Na nag en noumanem sul, nait zaun en guzental noumen.’

Wok Pris 19:18

⁴⁰Ag kasai ze banou aliag go sesamoramamen, ag Moses nugau kasai ze mui Uwait nugau ze doimai, awaranemen dudu agal ze mui unum sesamoramamen.”

Kristus go in nugau nag?

(Mak 12:35-37; Luk 20:41-44)

⁴¹Yesus nug Parisi dudu ipal go waugab alai gotulai darena, gonug kanabai awareun, ⁴²“Agal dabeleu eim Kristus go in anemen? Go in nugau nag?” Goagen koli go auremen, “Go Devit nugau Nag.”

⁴³Yesus nug koli awareun, “Erunai Ah Wes nug Devit dabeleu morona, gonug Kristus gonugau Dubanou Ban aneun? ⁴⁴Devit nug eneun,

‘Uwait Banou nug izal Dubanou Ban aureun, “Na izal ebe naliu eiman hobomen, izan nait iwai zaunar unum zilacaraimai, nait aramab maremin, nait pinsal damam.”’ *Buk Song 110:1*

⁴⁵Devit nugtal ‘Kristus go izal Dubanou Ban’ aneun. Guzenaimai, erunai ag Kristus go gonugau nag anemen?”

⁴⁶Guzenaimai, gil go ebu betei, du tub nug Yesus ze ipal aurab tam, go go gusig uminaimai, ze tub kanabai aurab tam.

Yesus nug kasai ze tapaimaranem dudu mui Parisi dudu mui goagal igul eg en awareun.

23 ¹Guzenaimai, Yesus nug duaillel mui gonugau tapaimaraneu dudu mui ze mareun. ²Go guzenai awareun, “Parisi dudu mui agal tapaimaranem dudu mui goagen go agal kasai ze tapaimaranemen, go Moses nugau kasai ze sul. ³Guzenaimai, ag ze go awaremen ag doimai, unum sesamoran. Bo, agal igul guzenanemen, ag go i sesamoran. Einen? Ag gaul ze asiu macanemen, bo, ag ze go i sesamoranemen. ⁴Agen uhu asiu duaillel marena, ag uhu go oi abun iborain tam. Bo, uhu go duaillel maranemen ag koli i isanaranemen.

⁵Ag ein igul guzenanemen, go unum guzenebi, duaillel agen peigamam aimai guzenanemen. Ag dudu uligarabun aimai, ag Uwait nugau Ze ipal agau ginampet tub ebu sikut waimai, agal aipag, ebeag ebu us sil kiai macanemen. Ag agal Uwait aurabun tibur galau ebu ilig inain

naliupet mai mamamen. ⁶ Guzenaimai, ag ee zanem zaueim mui gotulanemen zaueim mui empip naliu naliu ebu amegai hubabun agal oiagab noumanem. ⁷ Ag agal dabeleu dudu agen ee ig wanem empip ebu, ‘Amban,’ awaraimai, ebeag pataimai, ‘Tapaimaranemen dudu,’ guzenai ag awarebi, agal oiagab naliu usalanemen.

⁸ Bo, ag izal tapaimaranemin dudu, dudu ipal agen ag tapaimaranemen dudu aimai guzenai i awaramam. Ag unum ug tutak. Agal tapaimaranenu du tutak, go Kristus. ⁹ Gonun, ag em ebulan du tub ‘Mekai’ aimai i auran. Agal Memeag tutak go Mesgai wag dareu. ¹⁰ Dudu ipal agen ag ‘igual gumiganemen dudu’ guzenai i ze mamam. Agal gumarabun du go iz sag Kristus. ¹¹ Ag ula ebu, du in banou usalabun go agal salau du sul damau. ¹² Du in nugtal gonugau wanib ulag zamau gonugau wanib Uwait nugau ameg ebu banou i usalamau. Du in go nugtal gonugau wanib ulagwag i mamau, du go gonugau wanib ulagwag damau.”

**Yesus nug Nou Zau gumanemen dudu agal igul eg uligaraimai,|
gusig ze awareun.**

(Mak 12:40; Luk 11:39-52; 20:47)

¹³ Yesus nug koli eneun, “Ei! Ag kasai ze tapaimaranemen dudu, Parisi dudu abai. Ag bisomagar! Ag polumanemen dudu! Uwait nugau duaille gumarabun abu agen tapelanemen. Ag agtal go ebu i sianem. Bo, duaille go ebu siabun ebi, agen goagal abu siabun tapelai daremen.

[¹⁴ Ei! Ag kasai ze tapaimaranemen dudu, Parisi dudu abai, ag bisomagar! Ag polumanemen dudu. Ag wab ailel polumaraimai, agal zauan ece gaul oi unanemen. Dudu ipal agal ameagab ebu han ag Uwait auraimai, ze huia macanemen. Gonun, aiu ses Uwait nug alai sisiaramaun ziwis ebu, ag uhu banou pet umamen.]

¹⁵ Ei! Ag kasai ze tapaimaranemen dudu, Parisi dudu abai, ag bisomagar, ag polumanemen dudu. Ag ibut ze waugab mui em ebu mui unum aidaimai, du tub agal igul sesamorabun aimai itanemenin. Ag du go agal igul sesamorabun itanemen, go agal igul eg unum sesamoraimai, go ab i noumaneu oug numau, ag numamen sul numau.

¹⁶ Ei! Bisomagar! Ag ameag kumi dudu. Agen dudu ipal abu abai maranemen. Guzenaimai, agen guzenai ze maranemen, ‘Dudu ipal ze awaraimai, agen Uwait ecesab muranemen zau banou nugau wanib patanemen, ze go gusig tam. Bo, ag aiwag gol zaueim go dareu nugau wanib patanemen, ze go petak gusig a, ag ze go suban sesamoramen.’ ¹⁷ Ag kar wageun dudu, ag ameag kumi dudu! Ein ece go banou pet? Uwait ecesab muranemen zau go banou ta, aiwag gol zaueim dareu go banou ta? ¹⁸ Ze tub go guzenai ze macanemen. ‘Bo, du tub nug ze maraimai, egun aganem biz nugau wanib patamau, ze go gusig tam, go i sesamoran. Bo, du tub go egun aganemen, biz ebu ece tub wag daba,

gonugau wanib patamau, ze go petak gusig damau.' ¹⁹Ag ameag kumi dudu! Ein ece go Uwait nugau amegwab banou? Uwait nugau egun aganem biz ta, ece go biz ebu dareu ta? Ece egun aganem biz ebu dareu, go biz go nug ece naliu usalai maneu. ²⁰Guzenaimai, du tub gonugau ze nug gusig maimai, go egun aganem biz nugau wanib patamau, go ece unum biz ebu dareu agal wanimag unum pataneu. ²¹Bo, du tub go Uwait ecesab muranemen zau banou nugau wanib pataimai, gonugau ze go gusig mamau, go go zau nugau wanib mui Uwait zaueim dareu nugau wanib mui ereg pataneu. ²²Bo, du tub nug Mesgai wanib pataimai, gonugau ze gusig mamau, go Uwait nugau hubaneu biz mui Uwait nug biz ebu hoboï dareu agal wanimag ereg pataneu.

²³Ei! Ag kasai ze tapaimaranemen dudu, Parisi dudu abai, ag bisomagar! Ag polumanemen dudu! Agal ougeman eg ginampet tutak tutak houhou dou mizanaraimai, doumaraimai, tutak sul oi Uwait muranemen. Bo, ag ipal kasai ze banou go uteimai, i sesamoranemen. Kasai ze go ag sesamorab tam igul go enai: ag dudu ipal mui igul naliu i macanemen. Ag dudu ipal agen bisomag i piaranemen. Ag dudu ipal suban i gumaranemen. Ag igul naliu banou go unum sesamoraimai, petak ag igul ipal ginaginam ereg sesamoramamen. ²⁴Ag ameag kumi dudu! Ag guzenemen, eb guabur nug agal ee il oug nuabunina, ag go zamoranemen. Bo, egun kamel banou ag ee il mui gulutanemen. Ag kasai ze ginaginam sesamoranemen, bo, ag kasai ze banou i sesamoranemen.

²⁵Ei! Bisomagar! Ag kasai ze tapaimaranemen dudu, Parisi dudu abai, ag polumanemen dudu! Guzenaimai, ag agal gap mui tebil mui oi seiugab ze ulusanemen. Bo, ag igul eg asiu macanemen, gonun, agal oiagab oug unu asiu dareu, ag go i ulusanemen. ²⁶Ag Parisi dudu, ag ameag kumi! Ag amegai agal gap ougab oug unu dareu go ulusaimai, koli uzaneim an enib ebu ulusebi, go unu tamacag naliu usalamau!

²⁷Ei! Bisomagar! Ag kasai ze tapaimaranemen dudu Parisi dudu abai, ag petak polumanemen dudu! Ag eb ob ebalagab iweu naliu arugai muranemen sul, iweu go dudu agen pianemen go naliupet pet. Bo, ob oug eb beleimai, sous eg dareu. ²⁸Go guzeneu sul agal igul han guzenenegtal, duaillel agen uligaraimai, 'ag dudu naliu' anem. Bo, agal oiagab oug ag igul eg pet macanemen, polu ze maranemen."

Yesus nug ein igul eg kasai ze tapaimaranemen dudu mui Parisi dudu ebalagab zumau awareun.

(Luk 11:47-51)

²⁹Yesus nug kolital awareun, "Ag kasai ze tapaimaranemen dudu Parisi dudu mui, ag bisomagar! Ag polumanemen dudu. Einen, ag Uwait nugau ze doimai, awaranemen dudu agal ob ebu biz naliu gugai macanemen. Ag dudu agal oiagab petak emen, agal ob ebu iweu naliu arugai maranemen.

³⁰Bo, ag guzenai ze macanemen, ‘Ig igual asanagar abai getal ereg daremun sul darem zob, ig dudu go i ugaremun noumem zob.’ ³¹Agal ze nugtal go koli awaranem araog mareu, ag agal memegar agen getal Uwait nugau ze doimai, awaranemen dudu ugarina, noumemen ag goagal geleagar. ³²Guzenaimai, agal memegar agen guzenemen sul, ag han guzental Uwait nugau ze doimai, awaranem dudu ipal ugarebi, noumamam.

³³Ag man eg nugau geleagar! Uwait nug ab i usecaneu ebu hiacaraba, ag erunai uminai unamamen? ³⁴Iz petak pet awarem, ag dumamen, izan Uwait nugau ze doimai, awaranemen dudu mui ze tapaimaranemen dudu mui palautaremin, ag daremen ebu alamam. Agen dudu ipal ugarebi, noumamam. Dudu ipal a gegeulanau ebu asarai mebi, noumamam. Dudu ipal agal gotulanemen zaeim esalau sul igaramam. Dudu ipal agen zamarebi, uminai betei ban uzan tub betebi, koli go ebulan zamarebi, ban uzan tub bitamamen. Ag guzenai guzenai ai damamen. ³⁵Guzenaimai, dudu ipal agen getal dudu oiagab petak emen ugarina, noumemen, uhu go ag ebalagab zumau. Abel go igul naliu macaneun du wina, noumeun, guzental zoizoi Sekaraia, go Berekia nugau nag guzental guzenemen. Ag Sekaraia Uwait ecesab muranemen zau banou mui ulagwag macanemen biz ula ebu wina, noumeun. ³⁶Iz ag petak pet awarem. Igul go getal agal asanagar agen guzenemen en ag ulisan duaillel ag go uhu banou umamen!”

Yesus go Zerusalem uzan uligaimai, bisou peun.

(Luk 13:34-35; 19:41-44)

³⁷Yesus nug Zerusalem uzan uligaimai, eneun, “O, Zerusalem, Zerusalem! Agen Uwait nugau ze doimai, awaranemen dudu ugarina, noumemen. Ag dudu ipal ze oi aidanemen dudu Uwait nug palautareun, aiwag sil ugarina, noumemen. Iz gil asi asi, toi anag nug gonugau gelegul sausil kularai daneu sul, izal ebesil duaillel gumarai anemin. Bo, duaillel agen iz ag guzenabun i utilemen. ³⁸Ag go don, Uwait gonugau ecesab muranemen zau utei unaba, zau go unum eg umau. ³⁹Iz ag petak pet awarem, ulis iz wanemin, ag iz koli i peilamamen, betei aiu ses, agtal guzenai ze mamamen,

‘Uwait nugtal du go tapai mamau, go Banou nugau wanib ebu alamau.’”

Buk Song 118:26

**Yesus nug Uwait ecesab muranemen zau banou
wanib tempel eg umau en ze meun.**

24 ¹Yesus go Uwait ecesab muranemen zau banou wanib *tempel* zaeim dareun, utei noi unabun dabilena, gonugau tapaimaraneu dudu agen alaimai, auremen, “Na zau e suban uligaiba, alien.” ²Gonug

koli guzenai awareun, “Go iboi, ag ece unum pemen. Bo, iz ag petak pet awarem, iwai zaiagar agen alaimai, zau go unum eg wai mamau. Zau go memenin aiwag unum ulagai numau. Aiwag tub gonugau empip i damau.”

Yesus nug aiu ses uhu asiu zumau en ze meun.

(Mak 13:3-13; Luk 21:7-19)

³Guzenaimai, Yesus go Oliv em manam ebu betei hobo darena darena, gonugau tapaimaranau dudu agtal go waugab alaimai, goagen go guzenai kanabai ze auremen, “Eisab go igul zumau? Na ig aigemen, dumam, ein igul amegai zuba, ig go ziwaz abiu mamam?”

⁴Gonug koli awareun, “Ag gusig tapai dan. Dudu ipal agen alaimai, ag polu ze awaramam. Ag, goagal ze i don. ⁵Dudu ipal agen alaimai, izal wanim pataimai, guzenai ze mamam. ‘Iz Kristus iz ag koli imarabun du zom.’ Dudu asiu agen guzenai ze doimai, petak amam. Ag, izal tapaimaranem dudu, ag go dudu agal ze sesamarian. ⁶Bo, ag amegai malai alamau ze mui malai saiu mui waiagab alaba, doimai, ag esilakian. Igul go petak amegai zumau. Bo, sisiarabun ziwaz go pigai i zumau. ⁷Emgasag tub ebuan duaillel agen asaimai, emgasag tub ebuan duaillel abai iwai maimai, malaininamau. Emgasag ipal ebu mim zumau. Emgasag ipal ebu duaillel we ziwaz huia damamen. ⁸Igul go unum zumau go gonugau igul enai, air tub go mogoi wabun amegai mu banou wanem sul.

⁹Guzenaital, ziwaz go ebu ag izal tapaimaranemin dudu agal iwai zaiagar agen gusig pataraimai, uhu banou maraimai, ugarebi, noumamamen. Em ebuan duaillel unum agen ag en aiag sisilaimai, gasag hiacaramam. Ag izal tapaimaranemin dudu, gonun, ag duaillel agen guzenaramam. ¹⁰Duaillel asiu goagal oiagab petak emen, ziwaz go ebu goagal oiagab petak emen utamamen. Guzenaimai, agzozou agal zaiagar abai iwai maimai, ag imaraimai, agal iwai zaiagar agal ebeagab maramam. ¹¹Ag guzenebi guzenebi, Satan nugau ze doimai, awaranemen dudu agen zoimai, duaillel asiu polumarebi, go agal ze sesamoramam. ¹²Ag igul go banou usalaba, duaillel asiu agal zaiagar go en bisomag piaramamen, ag igul naliu go utamamen. ¹³Bo, du in izal salau i utanem, go umkoskos gusig mai damau aiu ses sisiarabun ziwaz ebu, Uwait nug go koli imaiamau. ¹⁴Duaillel agen Uwait nugau Ze Naliupet emgasag duaillel unum awarebi, duaillel go ze go abiu maimai, doi dabi dabi, petak go sisiarabun ziwaz alamau.”

Ece eg pet tub usalamau.

(Mak 13:14-23; Luk 21:20-24)

¹⁵Yesus nug koli eneun, “Ag ece eg pet tub go getal Uwait nugau ze doimai, awaraneun du Daniel nug ze meun usalamau pimamen.

Daniel 9:27

Ece eg pet go zoimai, Uwait nugau empip naliupet ebu zoimai tapai damau. (Ag ze go nanalanemen aba, suban dabilan.) ¹⁶Ziwas go ebu duaillel ag Zudia agaig ebu daremen ag em tabag ebu uminai simamen. ¹⁷Du tub go zau wag damau, go noimai, gonugau ece zaueim dareu i simai umau. Go pigai gaul uminai unamau. ¹⁸Du tub ougem salau mai damau, go gonugau iweu naliu zaueim dareu alai i umau. ¹⁹Ziwas go ebu, ailel ag enimag a mui, ailel geleagar ap zai darem mui, ag bisomagar pet. ²⁰Ag Uwait auramamen, ‘Ze numau ziwas ebu ta, igual i mabun ziwas ebu, ece eg go alamau i uminamamen.’ ²¹Ag uhu banou go getal i wanemen. Em awau usaleun ziwas ebu zoizoi ulis dareu, aiu ses han uhu guzenai koli i zumau. ²²Bo, Uwait nugau ziwas huia pigai hogu usaleun, einen, go igul go i guzeneu zob, duaillel asi i darem zob. Go duaillel ipal imarabun isanarai meun, gonun, igul go pigai guzeneun.

²³Du tub nug zoimai, guzenai awaramau, ‘Kristus e zoimai dareu!’ ta, ‘Go ulib e dareu!’ aimai, awaraba, ag gonugau ze doimai, oiagab petak i an. ²⁴Dudu ipal agen alaimai, polumaimai, guzenai ze mamam, ‘Iz Kristus.’ Dudu ipal agen ze mamam, ‘Iz Uwait nugau ze doimai, awaranem du.’ Ag guzenemen, ag gugeg banban mui salau ipal beu beu mamamen. Ag duaillel ipal Uwait nug nugau tapai mareun, polumaraimai, agal ameagab ebu igul go guzenamam. Polu ze awarebi, ag Uwait nugau duaillel agal igul sesamoraimai, ag Uwait nugau igul utabun aimai guzenamam. Bo, agen igul go guzenarabun iborain tam. ²⁵Iz ag ze go awaremin suban don. Ein igul aiu ses zuabun dareu mui ulis mui iz ag awarem.

²⁶Gonun, dudu ipal agen alaimai, guzenai awaramam, ‘Du Nugau Nag go du tamacag uzan alai dareu.’ Guzenai awarebi, ag betei i pian. Dudu go agen koli awaramam, ‘Go aleun ulibe zaueim wageimai dareu.’ Guzenai awarebi, ag goagal ze doimai, oiagab petak i an. ²⁷Du Nugau Nag alamau ziwas pigai zumau, am zuaneu eiman amilaimai, noi betei am nuaneu ebu nuaneu sul guzental alamau.

²⁸Egun noumaimai, belei damau go ebu, tumui asi egun go beleu zabun betei gotulamam.”

Du Nugau Nag koli alamau.
(*Mak 13:24-27; Luk 21:25-28*)

²⁹Yesus nug kolital eneun, “Uhu banou pet go unum zoimai unaba, am go umaum sul usalamau, geil go suban i hilamau, ureb emes wageim sisilai numam. Guzenebi, emes wagan ece gusig daremen unum iloialoiamau. *Aisaia 13:10*

³⁰Igul go guzenaba, esab tub Mesgai wag eiman aba, ag guzenai dabilan go Du Nugau Nag alamau. Duaillel em ebu darem ag uminai manil mai dabi dabi, Du Nugau Nag Mesgai wag pi eiman gusig banou

mui al eiman alaba, pimamen. *Daniel 7:13* ³¹Guzenaimai, gonug Uwait nugau tibur tub auraba, pulel huaba, sai u banou usalamau. Gonug Uwait nugau tibur ipal palautaraba, emgasag unum beteimai, Uwait nug gonugau duaillel tapai mareun, imarai alai gotularai mamam.”

Kisim Bek 19:16

Gair gau nuaneu ebu, ag abiu macanemen am tapamau ziwias zo dareu.

(Mak 13:28-31; Luk 21:29-33)

³²Yesus nug koli awareun, “A gair nug ag am tapamau igul abai maramau. Guzenaimai, gair gau unum nuanina, a gau awau koli walu zuna, ag abiu mamamen, go am banou zuabun ziwias. ³³Guzenai sul aiu ses igul go beu beu zuba, ag guzenai dabilan, Du Nugau Nag alabun ziwias hogu mai dareu. ³⁴Iz petak pet awarem, duaillel em e ebu darem ag i noumamamen ebu igul go guzenai zumau ag pimamen. ³⁵Emes em mui dareu go unum tamamau. Bo, izal ze i tamamau, muzmuz damau.”

Du Nugau Nag alamau gil du tub nug i abiu mamau.

(Mak 13:32-37; Luk 17:26-30, 34-36)

³⁶Yesus nug koli eneun, “Du tub nug Du Nugau Nag alamau gil i abiu mamau. Uwait nugau tibur han go en i abiu. [Gonugau nag nug han go i abiu.] Izal mekai nug sag go gil abiu. ³⁷Getal Noa dareun ziwias ebu, duaillel agen goagal igul beu beu guzenai daremen sul, Du Nugau Nag koli alamau ziwias ebu duaillel guzental guzenai damamen. ³⁸Zewei banou i usalau ebu duaillel go ee zai daren, ze zai daren, du air egarai daremen, go guzenai daren daren, Noa go tebil oug sieun. *Stat 7:7* ³⁹Bo, go igul zuabun i doi daren. Zewei banou zoimai, duaillel unum igarai zeun. Igul go guzenemen sul ag guzenebi, Du Nugau Nag koli alamau. ⁴⁰Ziwias go ebu, du aliag ougem salau mai damamen ebu tibur agen alai du tub imai aimai, du tub utei unamam. ⁴¹Ailel aliag ma sakai damam ebu, air tub alai imai aimai, air tub utei unamam. ⁴²Guzenamau, gonun, ag awau tapai dan. Einen, ag agal Dubanou Ban nugau alamau gil ag han i abiu. ⁴³Bo, zau atag du gonug zob du tub ein ziwias umaum zoimai gonugau zau bigacaimai, zaueim siabun abiu maimai, go i ninamau, go awau tapai daneu. Go du go ulagzaba, gonugau zaueim i ulagai simau. ⁴⁴Ag han guzental umkoskos suban gumei dan. Einen? Du Nugau Nag go i abiu wag alamau, gonugau alamau gil ag han i abiu.”

Salau dudu eg mui naliu mui goagal tatau ze.

(Luk 12:41-48)

⁴⁵Yesus nug koli awareun, “Salau du in go dabeleu naliu a go ze sesamoraneu? Du go sag gonugau gumaneu du nug tapai mina, gonug salau duaillel ipal gumaraimai, goagal ee marai damau. ⁴⁶Salau du go

gue guzenamau, gonugau gumaneu du alaba, go siksikamau. ⁴⁷Iz petak pet awarem, salau du go gue gonugau du banou nug gonugau ece unum gumabun tapai muramau. ⁴⁸Bo, salau du tub go dabeleu naliu tam, go guzenai dabilamau, 'Izal gumilaneu du go pigai alab tam.' ⁴⁹Guzenaimai, gonug salau zaugul ipal, ugaraimai, ze gusig zaimai, ameg kualilai damau. ⁵⁰⁻⁵¹Go guzenaba aba, gonugau gumaneu du i abiu wag alaimai, busil higwag aimai, zamoraba, polumanemen dudu abai betei daimai, aceg kititkatutai, damau."

Ailel houhou agal tatau ze.

25 ¹Yesus nug koli awareun, "Uwait nug duailel gumarabun ziwaz zumau go gonugau igul enai. Ailel magun houhou agen agal al oimai, du tub air awau oun go betei abu ebu peimai, imabun betemen. ²Ailel go magun houhou tubaim tabkuai go goagal dabeleu naliu tam, tubaim tabkuai agal dabeleu naliu a. ³Ailel go dabeleu naliu tamacag agen goagal al oi alemen, bo, goagal al ze banou tam. ⁴Bo, ailel dabeleu naliu a agen goagal al ebuan ze dalim mui kapeun oimai alemen. ⁵Air go du oun go pigai alab tam. Guzenina, ailel houhou go ameswagena, ninemen.

⁶Go nine ninen, umaum du tub nug guzenai ul eun, 'Air du awau oun du go aleu! Ag abu ebu betei peiban, imai alan!' ⁷Ailel houhou ag go ul doimai, asaimai, goagal al suban memen. ⁸Gonun, ailel go tabkuai go dabeleu naliu tamacag agen zaiagar dabeleu naliu a awaremen, 'Ig agal al ebuan ze tub daba ig gorai migen. Igual al ze tamacag, gonun, noumamoroi.' ⁹Bo, ailel go dabeleu naliu a agen koli guzenai awaremen, 'Tam, igual ze e ag abai iborain tam, igual al ebuan sag dareu. Ag awau betei beu, gau macan.' ¹⁰Guzenaimai, ailel go dabeleu naliu tamacag, go ee palautanem zau ze gau mabun wanen wanen, air du oun go aleun. Ailel dabeleu naliu a ag go alina, uligaimai, go dual ee zabun zaueim ereg siemenin. Guzenina, im gebei memenin.

¹¹Guzenina, ailel tabkuai dabeleu naliu tamacag go koli alaimai, guzenai ze menen, 'Dubanou Ban, Dubanou Ban, na ig im oitai migen.'"

¹²Aurina, du go nug koli guzenai awareun, "Petak pet, iz ag i abiu."

¹³Guzenaimai, Yesus tatau ze go awaraimai, go duailel koli guzenai awareun, "Du Nugau Nag go alamau gil ag i abiu, gonun, ag awau tapai dan."

Salau dudu ainarai agal tatau ze.

(Luk 19:11-27)

¹⁴Uwait nug duailel gumarabun ziwaz zumau go gonugau igul enai. Du tub gonugau zau utei uzan tub pulig unabunaimai, gonugau salau dudu awarina, go alina, gonugau ece unum goagal ebeagab meun. ¹⁵Go goagal

igul uligaimai, aiwag ata atai guzentel mareun. Go du tub aiwag tausen tabkuai moroun, du tub go tausen aliag moroun, du tub go tausen tutak moroun. Guzenaimai, go utarai waneun. ¹⁶Guzenaimai, go wane wanena, du go aiwag tausen tabkuai oun go aiwag go sil salau maimai, koli tub tausen tabkuai salau go ebuan oun. ¹⁷Du tub go guzentel aiwag tausen aliag oun go han salau maimai, koli tub tausen aliag oun. ¹⁸Bo, du tub go aiwag tausen tutak oun, go gue em eleimai, ob oug wageimai mina, dareun.

¹⁹Ziwas asiu wanena, go gumaraneu du gonugau salau dudu aiwag mareun, go aiwag en ze kasabun koli aleun. ²⁰Salau du tub go aiwag tausen tabkuai oun go waugab zoimai, guzenai aureun, “Banou, getal na iz aiwag tausen tabkuai milemen, iz go aiwag sil salau maimai, koli tub tausen tubkuai omin. E na pen!”

²¹Guzenina, gonugau gumaneu du nug koli guzenai aureun, “Na salau du naliu. Na salau ginampet suban gumemen, gonun, iz na salau banou ebun mizemina, na salau gumamam. Gonun, na iz ibail beteimai, siksikai damam.”

²²Guzenina, salau du tub go aiwag tausen aliag oun, go han zoimai, guzenai aureun, “Banou, nagen iz aiwag tausen aliag milemen. Na e pen. Iz koli salau maimai, tub tausen aliag omin.” ²³Guzenina, go gumaraneu du nug aureun, “Na salau du naliu. Na salau ginampet suban gumemen, gonun, iz na salau banou ebun mizemina, na salau gumamam. Guzenaimai, na iz ibail beteimai, siksikai damam.”

²⁴Guzenina, salau du tub aiwag tausen tutak (1,000) oun du go han zoimai, guzenai aureun, “Banou, iz abiu na pigai ainsisilaneun du. Guzenaimai, du tub nug gonugau ougem ee ug beun, na gonun ee silai wacanem. Na du tub nug gonugau ougem ee ug hiacaneun, na gonun ee tulai wacanem. ²⁵Gonun, iz uminaimai, nait aiwag tausen tutak milemen, iz aiwag go oi betei em eleimai, em oug memin. Nait aiwag e na pen.”

²⁶Guzenai aurina, gonugau gumaneu du nug salau du go guzenai aureun, “Na salau du egonou! Na wasig pag du. Du tub nug gonugau ougem ee ug beun, iz gonugau ee silai wacanem ta? ²⁷Gonun, na izal aiwag aiwag zau ebun mabun einen utemen. Iz koli guzenai alemin, aiwag go mui aiwag ipal mui wai.”

²⁸Guzenai auraimai, gonug salau dudu ipal awareun, “Ag go ebuan aiwag tausen tutak ebegalau oimai, du aiwag tausen houhou (10,000) a muramamen.” ²⁹Gonug koli awareun, “Iz petak pet awareun, du in go ece asiu a, go salau macaneu, go du go Uwait nug ece ipal asiu pet muramau. Guzenaba, du go ece asiu a damau. Bo, du in go ece ginampet a salau i macaneu, gonugau ece unum ebegalau umau. ³⁰Wasig du go egonou, ag go imaiban, seseim hamacebi, umut oug noi damau. Go dudu wein aimai, aiag katutai daremen abai ereg damam.”

Du Nugau Nag koli alaimai, duail el unum sisiaramau.

³¹“Ziwas go ebu Du Nugau Nag go gumaraneu du banou king sul, go alaba, Uwait nugau tibur abai ereg alamam. Guzenaimai, go gonugau biz ebu hoboimai, duail el sisiaramau. ³²Em ebuan duail el emgasag gasag darem, go unum go waugab alebi gonug duail el ipal tubaim dou maraimai, duail el ipal tubaim dou maramau. Dudu agen sipsip meme mui gumaraimai, dou maranemen sul, sipsip tubaim dou maraimai, meme tubaim dou maranemen sul guzenamau. ³³Gonug duail el oiagab petak emen ag gonugau ebeg naliu eiman maramau, duail el ipal ag oiagab petak ab tam go ag ebeg nanai eiman maramau. ³⁴Guzenaimai, gumaraneu du banou king nug guzenai awaramau, “Duail el izal ebe naliu eiman darem, ag izal Mekai nug tapai mareun. Getal em usalab tam ebu, izal Mekai nug nugau gumaraneu uzan agal tapai mareun, ag umamen.” ³⁵Gonug guzenai awaramau, ‘Iz we daremin, agen iz ee milena, zemin. Iz ze usegiwena, agen iz ze milena, zemin. Iz uzan tuban du sul alemin, agen agal zaueim imailei siemenin. ³⁶Iz tibur galau tamacag, gaul daremin, agen tibur galau milena, tuagemin. Iz ebeu daremin, agen alai gumilemen. Iz hiacaranem zau oug daremin, agen betei peilemenin.’

³⁷Gonug guzenai awaraba, dud u naliu agen koli go guzenai auramam, ‘Banou, eisab na we daremen, ig na ee mizemun? Eisab na ze usegni wena, ig na ze mizemun? ³⁸Ig ein ziwas ebu na uzan tuban du sul peizaimai, igual zaueim imaiz betemun? Eisab ig na tibur galau tamacag daremen peizaimai, tibur galau mizemun? ³⁹Na ein ziwas ebu ebeu daremen ta hiacaranem zau oug daremen, ig betei uligizemun?’ ⁴⁰Go guzenai aurebi, go gumaraneu du banou king nug koli awaramau, ‘Ag petak pet awarem, ag izal du tub gonugau wanib banou tamacag, ag go isanoromen, du go sag isanurab tam, ag go iz isanilemen.’ ⁴¹Guzenaimai, gonug duail el go gonugau ebeg nanai eiman daremen, guzenai awaramau, ‘Ag enan, Uwait nugau amegwab ag ze asiu enimag ebu mui. Ag ab i noumaneu ebu beten. Ab go izal mekai nug Satan gonugau tibur abai ereg tapai mareun go ebu ag ereg noi damamen. ⁴²Go einen, iz getal we daremin ag iz ee milab tam, iz ze usegiwena, ag iz ze milab tam. ⁴³Iz uzan tuban du sul alemin, agen agal zaueim imailei bitab tam. Bo, iz tibur galau tamacag daremin, agen tibur galau tub milab tam. Iz ebeu a daremin agen gumilai dab tam. Iz hiacaranem zau oug daremin ag iz betei peilab tam.’

⁴⁴Guzenai awaraba, agen go koli auramamen, ‘Banou, na eisab we daremen ig uligizemun, na eisab ze usegni wena, na eisab na uzan tuban du sul alemen, na eisab na tibur galau tamacag daremen, na eisab ebeu a daremen, na eisab hiacaranem zau oug betei daremen, ig na isanizab tam?’ ⁴⁵Go gumaraneu du banou king nug koli ag guzenai awaramau,

'Iz ag petak pet awarem, ag izal du tub gonugau wanib banou tam, ag go isanorab tam, go ag iz isanilab tam.' ⁴⁶Gonun, duaille go ag ab banou i noumaneun ebu noi damamen, bo, duaille naliu ag sag petak muzmuz awau damamen."

Dudu banban agen Yesus webi, noumamaun en dabeleu omen.

26 ¹Yesus nug ze go awaraimai, gil go ebutal gonugau tapaimaraneu dudu awareun, ²"Ag abiu imabun ziwias gonugau wanib Pasowa gil aliag bitaba, ziwias go zumau. Du Nugau Nag ziwias go ebu gonugau iwai zaugul agen eg moroimai, a gegeulanau ebu asai mamam."

³Go ziwias ebutal Uwait ula dacanemen dudu banban ipal mui, uzan gumanemen dudu banban mui agen Uwait ula dacanemen dudu agal gumaraneu du banou, gonugau wanib Kaiapas nugau zaueim betei gotulemen. ⁴Guzenaimai, go Yesus gusig pataimai, webi, noumabun ze wage wageimai patemenin. ⁵Bo, go enemen, "Ig go imabun ziwias go ebu i wab, duaillel agen asaimai, ig ibaig banban alalamam."

Air tub nug a ilau sous naliu mui oimai, Yesus nugau gagalig ebu esikeun.

(Mak 14:3-9; Zon 12:1-8)

⁶Betani uzan du tub, gonugau wanib Saimon, getal go ebeu gusig sug (leprosi) mui dacaneun, Yesus simai gonugau zaueim dareun. ⁷Guzenaimai, go zaueim hoboimai, ee zina zina, salau air tub nug dalim naliu a ilau sous naliu mui oi zoimai, Yesus nugau gagalig ebu esikeun. Air go getal aiwag banou sil a ilau go gau meun. ⁸Yesus nugau tapaimaraneu dudu agen igul go uligaimai, aicag sisilai zuna, guzenai ze menen, "Air go nug einen a ilau sous naliu mui gaul sakeu? ⁹Ig a ilau go dudu ipal maremun, gau mebi, gonun aiwag banou oimai, duaillel ecesab tamacag marabun iboin."

¹⁰Guzenina, Yesus goagal dabeleu abiu maimai, gonug guzenai awareun, "Ag einen air go ougab eg moroimai, uhu moromen? Go igul naliu pet go iz ebilab guzeneu. ¹¹Duaillel ecesab tamacag go ag abai umkoskos damamen. Bo, iz ag abai umkoskos ban i danai. ¹²Air go a ilau sous naliu mui izal enim ebu esikeun, go iz noumemin, ob heilabun enim tabug suban uluseu. ¹³Iz ag petak pet awarem, dudu agen Uwait nugau Ze Naliupet e em e ebu duaillel unum awarai aidaimai, igul go air e nug meun go han awaramam. Guzenaimai, duaillel ag go en dabilamamen."

Zudas nug Yesus dudu banban ebeagab mabun baib meun.

(Mak 14:10-11; Luk 22:3-6)

¹⁴⁻¹⁵Yesus nugau tapaimaraneu dudu begurug ebulan du tub, gonugau wanib Zudas Iskariot, go Uwait ula dacanemen dudu banban waiagab

beteimai, gonug guzenai kanabarai awareun, “Iz Yesus agal ebeagab memin, agen iz ein ece milamamen?” Guzenina, goagen aiwag houhou ainarai (30) nanalaimai, go moromen. ¹⁶Ziwas go ebun Zudas go Yesus gonugau iwai zaugul ebeagab mabun abu itanai dareun.

Yesus gonugau tapaimaraneu dudu abai Pasowa gil ebun ee zemenin.
(*Mak 14:12-21; Luk 22:7-14, 21-23; Zon 13:21-30*)

¹⁷*Bret* zis tamacag agaimai zanemen gil go amegai zuna, Yesus nugau tapaimaraneu dudu agen go guzenai kanabai ze auremen, “Ig nait Pasowa gil ebun ee zabun empip eru ebun kasai mizamam?”

¹⁸Guzenina, gonug gonugau tapaimaraneu dudu guzenai awareun, “Ag Zerusalem ban uzan sieiban, go ebun du go guzenai auran. ‘Iguwal Dubanou Ban nug, guzenai aigeun, ‘Izal utarai unabun gil waiagab go zou, gonun, iz izal tapaimaranem dudu abai Pasowa gil ebun nait zaueim alai ee zamam.’ ”

¹⁹Guzenina, Yesus nug gonugau tapaimaraneu dudu ze go awareun sul, go betei, Pasowa gil ebun ee zabun empip kasai memenin.

²⁰Umusig mina, Yesus gonugau tapaimaraneu dudu abai zaueim go ee zabun hobemen. ²¹Go hoboimai, ee zai zai darena, gonug guzenai awareun, “Iz ag petak pet awarem, du tub ag ula dareu gonug iz izal iwai zaiar agal ebeagab mamau.”

²²Go guzenai ze mina, goagal oiagab uhu usaleun. Go tutak tutak agen go guzenai kanabai ze auremen, “Dubanou Ban, na iz en anem ta? Iz tam ta?”

²³Yesus nug koli awareun, “Du go iz ibail ereg tebil tutak ebun gonugau *bret* il oug maimai, oimai zimau, gonug iz izal iwai zaiar agal ebeagab mamau. ²⁴Uwait nugau ze nug eneun sul, Du Nugau Nag unamau, bo, du gonug gonugau iwai zaugul agal ebeagab mareun, du go gue bisoua. Du go anag nug soligweun ziwas ebun noumeun zob, go uhu ginampet. Guzenab tam, gonun, aiu ses Mesgai wag go uhu banou pet umau.”

²⁵Du go Yesus gonugau iwai zaugul ebeagab marabun du, Zudas gonug guzenai ze meun, “Abai maranemun du, petak izan na igul go ebitab mai ta?” Guzenai aurina, Yesus nug koli aureun, “Io, nagtal go anem.”

Yesus nug *bret* wain ze mui gonugau tapaimaraneu dudu mareun.
(*Mak 14:22-26; Luk 22:14-20; 1 Korin 11:23-25*)

²⁶Yesus gonugau tapaimaraneu dudu abai hoboii ee zai zai daren, go *bret* oimai, Uwait ‘Ese-e’ auraimai, ebeg sil kikakaraimai, gonugau tapaimaraneu dudu maraimai, eneun, “Ag oiban, zan. E izal enim tabug.”

²⁷Guzenaimai, go koli wain ze gap mui oimai, Uwait auraimai, gonugau tapaimaraneu dudu maraimai, awareun, “Ag unum e gap ebulan ze zan. ²⁸E izal esep, Uwait nug izal esep sil ag abai baib [awau] meu.

Izal esep esikaba, gonug duailel asiu agal igul eg zilagai maramau. ²⁹Iz ag petak pet awarem, iz koli e wain dab ebuan ze i zai, betei iz wain ze awau tub go izal Mekai nugau gumarabun uzan ag abai koli zai.”

³⁰Guzenaimai, go kabal tub waimai, uzaneim noimai, Oliv em manam ebu betemenin.

**Yesus nug Pita guzenai aureun, “Nagen duailel iz en awaramam,
‘Iz go i abiu.’”**

(Mak 14:27-31; Luk 22:31-34; Zon 13:36-38)

³¹Yesus nug gonugau tapaimaraneu dudu awareun, “Ulis e umaum igul tub iz ebilab zuba, ag uligaimai, ag iz utilaimai, uminai unamamen. Uwait nugau ze nug guzenai ze meu.

‘Sipsip gumanau du go izan wemin, sipsip inain go uminai beu beu telitelihamam.’ *Sekaraia 13:7*

³²Go guzenamam, bo, iz noumaimai, koli usaimai, amegai Galili agaig ebu betemin, ag sesamilai bitamamen.”

³³Pita nug Yesus koli aureun, “Igul eg na ebizab zuba, uligaimai, go unum na utizai unamam. Iz tutak na i utizai.”

³⁴Yesus nug koli guzenai aureun, “Iz na petak pet aizem, ulis umaum toi i ulau ebu nagen izal wanim wagemaimai, ‘Iz go i abiu’ aimai ziwass ainarai ze mamam.”

³⁵Pita nug koli aureun, “Petak pet, iz guzenai ze i mai. Bo, iz na ibaiz ereg noumanai.” Guzenina, tapaimaraneu dudu ipal agen han guzentel auremenin.

Yesus go Getsemani ougem betei Uwait aurai dareun.

(Mak 14:32-42; Luk 22:39-46)

³⁶Yesus gonugau tapaimaraneu dudu abai em tub wanib Getsemani beteimai, guzenai awareun, “Ag e ebu hobo dan, iz ulib e Uwait aurabun betem.” ³⁷Gonug Pita mui Zebedi nugau gelegul aliag abai imarai waneun. Gonugau ougab eg pet wina, go siksikab tam. ³⁸Yesus nug dudu ainarai go awareun, “Izal oiab uhu pet mina, wauiaig kuatina, noumamoro. Ag iz ibail e ebu awau tapai dan.”

³⁹Go empip go uteimai, nugtal betei wageimai daimai, go ougab uhu mina, em ebu alai noimai, Uwait guzenai aureun. “O Mekai, nagen iz ebilab ebuan uhu oi amam go iboi. Bo, na izal dabeleu i sesamoren, na nait dabeleu tutak sesamoren.”

⁴⁰Guzenaimai, go gonugau tapaimaraneu dudu ainarai go gabuai daremen zoi uligaraimai, asareun. Go Pita aureun, “Ag iz gumilaimai, awau dab einen utemen? ⁴¹Ag i gabuan, awau daiban, Uwait auran. Guzenebi, Satan nug bimaiaig i pimau. Iz abiu ag igul naliu guzenaporoi, bo, agal enimag gusig tam.”

⁴²Guzenaimai, go kolital Uwait aurabun beteimai, Uwait guzenai aureun, “O Mekai, iz e noumabun gap nagen i oi hen, iz go zaimai, iboin nait igultal sesamorai.”

⁴³Go koli zoi gonugau tapaimaraneu dudu go kolital guzental gabuai daremen uligareun. Go ames wagena, awau dabun iborain tam.

⁴⁴Gonun, go koli utarai Uwait aurabun waneun. Go amegai Uwait aureun sultal ze gotal koli aureun.

⁴⁵Bo, go koli zoimai, gonugau tapaimaraneu dudu gabuai daremen uligaraimai, asaraimai, guzenai awareun, “Ag gabuaimai, i mai darem ta? Ag go don! Du Nugau Nag ebe garab durub waimai, dudu igul eg macanemen agal ebeag ebu mabun ziwias aleu. ⁴⁶Ag uligan! Du ulibe nug iz izal iwai zaiar ebeag ebu marabun go aleu. Ag asan! Ig betei go tulorabun unab.”

Zudas nug Yesus gonugau iwai zaugul agal ebeagab ebu meun.
(*Mak 14:43-50; Luk 22:47-53; Zon 18:3-12*)

⁴⁷Yesus nug gonugau tapaimaraneu dudu ze go awarina awarina, gonugau tapaimaraneu dudu begurug ebu an du tub gonugau wanib Zudas nug go waugab aleun. Uzanan dudu banban mui, Uwait ula dacanemen dudu banban mui agen dudu asiu Yesus gusig patabun palautarena, Zudas sesamorai betemen. Go malaimanem maulzag mui malai hog mui patai alemen. ⁴⁸Zudas nug getal dudu go guzenai awareun, “Iz du go betei sibeg zukemina, ag guzenai dabilan du gotal ag gusig patamamen.”

⁴⁹Gonun, Zudas go pigai Yesus waugab beteimai, guzenai aureun, “Umaseu, tapaimiganeu du!” auraimai, sibeg zukeun.

⁵⁰Guzenina, Yesus nug koli aureun, “Zai, na erunabun alemen aiba na pigai guzenen.” Go guzenai ze mina, dudu goagen pigai zoimai, Yesus gusig patemen. ⁵¹Guzenina, du tub Yesus dual dareun nug, gonugau maulzag huia oimai, Uwait ula dacanemen dudu agal gumaranem du banou nugau salau du wai aimai gonugau dabug gau kuatai heun.

⁵²Guzenina, Yesus nug du go aureun, “Nait maulzag oiba, koli gonugau zo oug zulagai men. Dudu ag siag sil malaimanemen ag siag sil ugarebi, noumamamen. ⁵³Bo, na i abiu ta? Iz izal Mekai auremin, gonug iz isanileimai, gonugau tibur asiu emgasag begurug eiman agal malai dudu sul zilaramau go palautarabun iboin. ⁵⁴Bo, izal Mekai nug isanilaba, gonugau ze agau ebu dareu go petak i zumau. Gonun, igul go nugtal iz ebilab zuabun eun zumau.”

⁵⁵Guzenaimai, Yesus nug gonugau iwai zaugul awareun, “Ag malai mabun malai hog mui maulzag mui oimai, iz zob du sul gusig patilaimai, iwabun alemen ta? Iz gil umkoskos Uwait ecesab muranemen zau banou zaueim duaillel tapaimaranemin, ag go ebu gusig patilabun utanemen.

⁵⁶Bo, ag igul go guzenina, Uwait nugau ze doimai, awaranemen dudu

agen gonugau ze sikut wai memen go petak zoun.” Guzenina, ziwas go ebun gonugau tapaimaraneu dudu unum uminai wanemenin.

Yesus go dudu banban ameagab ebun wina, noumabun aimai polumoromen.
(*Mak 14:53-65; Luk 22:54-55, 63-71; Zon 18:13-14, 19-24*)

⁵⁷Dudu go agen Yesus gusig pataimai, Uwait ula dacaneu du banou pet gonugau wanib Kaiapas nugau zaueim imai betemen. Go ebun kasai ze tapaimaranem dudu mui uzanan dudu banban abai ereg go tulai daremen. ⁵⁸Dudu go agen Kaiapas nugau zaueim Yesus imai siena, Pita go sesamarai, wage wageimai holo holo beteun. Guzenina, Pita simai, go ebun em gumaneu dudu abai hoboimai, Yesus erunaimai, koli imai numam, piabun aimai dareun. ⁵⁹Uwait ula dacanemen dudu banban mui Zuda dudu banban ipal mui agen polu ze ipal Yesus enib ebun moroimai, erunai webi, noumabun aimai guzenemenin. ⁶⁰Dudu asiu zoimai, go enib ebun polu ze memen. Bo, go gonugau igul sisiai uligemen, go igul eg tub i meun. Dudu asiu ze mina, dudu aliag zoimai tapai daremen. ⁶¹Goagen guzenai ze memen, “Du go nug guzenai ze meun, ‘Iz go Uwait ecesab muranemen zau banou ticalaimai, gil ainarai ebun koli mai,’ gonug guzenai ze meun.” ⁶²Guzenina, Uwait ula dacaneu du banou pet, Kaiapas nug goagal ameagab ebun tapai daimai, koli Yesus guzenai kanabai aureun, “Na einen go dudu agal ze aizemen koli awarabun utem? Na erunemen, gonun, na enim ebun ze mem.” ⁶³Bo, Yesus go ze mab tam.

Gonun, Kaiapas nug kolital aureun, “Na Uwait, go muzmuz awau daneu, nugau wanib pataimai, nait ze gusig maimai, na ig aigen, na Kristus, Uwait nugau Nag ta, tam?” ⁶⁴Guzenai aurina, Yesus nug koli aureun, “Io, nagen anem sul. Iz ag unum petak pet awarem, ziwas go ebun, Du Nugau Nag go Uwait, go gusig banou mui nugau ebeg naliu eiman hoboimai, Mesgai wag pi eiman koli alamau, pimamem.”

Buk Song 110:1, Daniel 7:13

⁶⁵Kaiapas go ze go doimai, gonugau tibur galau bigagaimai, guzenai ze meun, “Du go gue Uwait ze biabial kuai ze aureu! Ig einen dudu ipal awaremun, alai gonugau enib ebun ze ipal mamam? Go Uwait ze biabial kuai ze aureun, ag domenin. ⁶⁶Ke, ag pen, agal dabeleu go erunamamen?” Go agen koli ze memen, “Go ze a, gonun, webi, noumamau.”

⁶⁷⁻⁶⁸Guzenaimai, goagen Yesus ebun sinocoroimai, ebeag sil wemen. Dudu ipal agen sibeg waimai, goagen go auremen, “Na Kristus, na ze doimai, awaranemen du aba, na ig aigen, io aigen, in nug na niweu?”

Pita nug ‘Iz Yesus i abiu’ aimai ze meun.
(*Mak 14:66-72; Luk 22:56-62; Zon 18:15-18, 25-27*)

⁶⁹Pita go Uwait ula dacanemen dudu agal gumaraneu du banou, Kaiapas nugau zau go gasageim hobo darena, salau air tub nug zoimai, aureun. “Na Galili agaigan du, Yesus nugau zaug.”

⁷⁰Guzenai aurina, Pita nug dudu go amegab ebu Yesus nugau wanib wageimai maimai, eneun, “Na ze go anem go gonugau bigeg iz i abiu.”

⁷¹Guzenaimai, go koli zau og eiman tapai darena, salau air tub nug zoimai, duaillel awareun, “Du e han go Nasaret uzanan, Yesus dual aidaneun du.”

⁷²Guzenina, Pita nug ebeg wag maimai, koli eneun, “Petak pet, iz du go i abiu.”

⁷³Dai dai, dudu ipal pulig daremen, Pita waugab zoimai, guzenai auremen, “Petak pet, na Yesus nugau tapaimizaneu du tub. Nait ze mem zep nug na araog mizeu.”

⁷⁴Bo, Pita nug ebeg wag maimai, kolital eneun, “Petak pet, iz ag awarem! Iz polu ze mai uhu tub iz ebilab zumau. Iz du go i abiu!”

Go guzenai ze mina mina, toi ul eun. ⁷⁵Guzenina, Pita go Yesus nug ze getal aureun, koli dabeleun. “Toi i ulau ebu, na izal wanim wagemaimai, ‘iz go i abiu’ aimai ainarai ziwaz ze mamam.” Gonun, Pita go uzaneim noimai, banban weineun.

Yesus go Pontias-Pailot waugab imai betemen.

27 ¹Em wagna, umaseu, Uwait ula dacanemen dudu banban mui uzanan ipal dudu banban mui, agen Yesus webi, noumabun ze patemenin. ²Gonun, go us sil ebeg kiai maimai, Rom agal gumaraneu du Pailot ebeg ebu mabun imai betemen.

Zudas nugtal beu us waimai, noumeun.

(Aposel 1:18-19)

³Zudas go, Yesus gonugau iwai zaugul ebeagab mareun, go Pailot nug Yesus waba, noumabun uligaimai, go koli Yesus en bisou peimai, koli betei Uwait ula dacanemen dudu banban mui dudu banban ipal mui go aiwag 30 go oun koli marabun beteun. ⁴Go betei, dudu go awareun, “Iz igul eg memin go du gue igul eg tub mab tam, izan gonugau iwai zaugul ebeagab memin, gonun, go wina, noumamoroi.” Goagen koli auremen, “Igul go iguan guzenemun ta? Nagtal guzenemen!”

⁵Guzenai aurina, Zudas go aiwag go Uwait ecesab muranemen zau banou zaueim hamaraimai, utei betei nugtal beu us waimai, noumeun.

⁶Uwait ula dacanemen dudu banban agen aiwag go oimai, enemen, “Go ee og esab memun aiwag, go igual kasai ze nug eneun, go unu a, gonun, ig Uwait ecesab muranemen zau banou ebuan aiwag mui i gotulai mab.” ⁷Go aiwag go oimai, mis patai macanemen dudu agal em tub gau maimai, uzan tuban duaillel noumina, go ebu ob hiaranemen. ⁸Gonun, em go wanib ‘Es em’ anem. Em go ulis han wanib patemen.

⁹⁻¹⁰Getal Uwait nugau ze doimai, awaraneun du Zeremaia nug ze go mareun go petak usaleu.

‘Goagen aiwag 30 go Israel duailen agen go ee ogog esab memen aiwag oimai, go mis patai macanemen dudu agal em gau memen. Go Uwait nug iz aileun sultal.’ *Sekaraia 11:12-13*

Pailot nug Yesus kanabai aureun.

(Mak 15:2-5; Luk 23:3-5; Zon 18:33-38)

¹¹ Yesus Pailot amegwab tapai mina, Pailot nug kanabeun. “Na Zuda duailen agal gumaranemen du banou king ta?” Yesus nug koli aureun, “Io, na anem guzental.” ¹² Bo, Uwait ula dacanemen dudu banban mui, uzanan ipal dudu banban mui, agen Yesus enib ebu ze polumorona, gonug koli ze tub awarab tam. ¹³ Guzenina, Pailot nug aureun, “Bo, ze go nait enim ebu memen, na duab tam ta?”

¹⁴ Guzenai aurina, Yesus nug ze ginampet tub koli aurab tam. Guzenina, Pailot go dabeleu asiu oun.

Pailot nug Yesus webi, noumabun en awareun.

(Mak 15:6-15; Luk 23:13-25; Zon 18:38b-19:16)

¹⁵ Agal i mabun ziwias wanib Pasowa ebu, Rom agal gumaraneu du banou nug wai tutak tutak ziwias go ebu du tub hiacaranem zau oug daneu utena, unaneu. Duailen agtal alai gotulaimai, du tub utena, unabun aurina, gonug du go utena, unaneu. ¹⁶ Ziwias go ebu du tub gonugau wanib Barabas gonugau igul egonou wanib mui, go hiacaranem zau oug daneu. ¹⁷ Gonun, duailen alai gotulina, Pailot nug awareun. “Ag dabileimen du in utemin, go unamau? Barabas ta, Yesus go Kristus em ta?” ¹⁸ Pailot go abiu Zuda duailen go Yesus nugau igul naliu en acagsisilai usalemen, gonun, go waugab imai alemen.

¹⁹ Guzenina, Pailot go ze sisiraneu biz ebu hobo darena, gonugau wau nug ze tub palautai moroimai, aureun, “Nagen igul eg tub du go ebu i men. Go du go igul naliu macaneu. Iz umaum nineimai, wabil ebu go pemin, gonun, izal oiab uhu pet meu.”

²⁰ Uwait ula dacanemen dudu banban mui dudu banban ipal agen duailen dabuiag pataimai, awaremen, “Pailot auran, Barabas utaba, unamau. Yesus waba, noumamau.” ²¹ Pailot nug kolital duailen kanabarai awareun, “Agal dabeleu du e aliag, iz du in utemin, unamau?” Goagen koli auremen, “Barabas utemen, unamau.”

²² Guzenina, Pailot nug koli awareun, “Yesus, go Kristus emen, iz go erunai?” Goagen oiagsau tutak maimai, auremen, “Go a gegeulanau ebu asai men!”

²³ Pailot nug awareun, “Einen? Go ein igul eg meun?” Agen koli go a gegeulanau ebu asai memun, noumabun aimai gusig ze memen.

²⁴ Go duailen uligareun go malaininabun sul usalina, Pailot go ze tub marabun iborain tam, gonug, ze tebil mui oimai, duailen ameagab

gonugau ebeg uluseun. Gonug eneun, “E izal uhu tam, izan du go wemin, i noumamau. Agenag guzenabun guzenan!”

²⁵Duaillel agen koli auremen, “Erunamau go noumaba, uhu go igual geleiger abai ereg umam.”

²⁶Guzenina, Pailot nug Barabas utena, waneun. Guzenaimai, gonugau malai du tub aurina, gonug Yesus esalau sul oimai, malai dudu ipal marena, agen a gegeulanau ebu asai mabun imai betemen.

Malai dudu agen Yesus ze biabial kuai auraimai, weloromen.

(Mak 15:16-20; Zon 19:2-3)

²⁷Malai dudu agen Yesus Pailot nugau zau wanib Pretoriam zaueim imai betena, malai dudu ipal zaueim daremen ereg alai go tali talioroi daremen. ²⁸Guzenaimai, malai dudu agen gonugau tibur galau zilagai moroimai, tibur galau tub epeu go ebu kulai moromen. ²⁹Guzenaimai, go us kulam mui oimai, kukotoimai, gonugau gagalig ebu kulai memen. Ait kabit tub oimai, gonugau ebeg naliu eiman memen. Guzenaimai, go go waugab taubib waimai, ze biabial kuai auremen. “Na Zuda agal gumaranemen du banou, king, ig nait wanim ulapwag mem.” ³⁰Goagen sino oroimai, ebeg ebuan ait kabit ebegalau oimai, go ait kabit gotal oimai gagalig poai memen. ³¹Ag go ze biabial kuai unum aurai heimai, tibur galau go go ebuan zilagai oimai, koli gonugau tibur galau arugai moromen. Guzenaimai, go imai aimai, a gegeulanau ebu asai mabun imai betemen.

Yesus a gegeulanau ebu asai memenin.

(Mak 15:21-32; Luk 23:26-43; Zon 19:17-27)

³²Rom agal malai dudu agen Yesus a gegeulanau ebu wabun abu ebu imai betena betena, du tub go Sairini uzanan koli ban uzan siabun aleun. Gonugau wanib Saimon, go abu ebu peimai, gusig pataimai, Yesus nugau a gegeulanau oimai, Saimon gamai morona, go Yesus sesamorai beteun. ³³Go em tub wanib Golgota betemen. Go em wanib bigeg enai ‘eb gagalig gulam’. ³⁴Guzenaimai, goagen wain ze gubugub munug sul mui kekulaimai, Yesus zabun aimai moromen. Bo, go wain ze go minob sil helwaipeun munugina, go i zeun.

³⁵Guzenaimai, malai dudu agen Yesus a gegeulanau ebu asai maimai, go gonugau tibur galau ata atai wabun aimai, aiwag oimai, onemen.

³⁶Guzenaimai, go Yesus a gegeulanau ebu asai maimai, go ebu gumei daremen. ³⁷Ag go asai maimai, tabaugab dudu ipal agen ze tub enib ebu memen go guzenai sikut wai memen. ‘Du e Yesus, go Zuda duaillel agal gumaraneu du banou, king.’ ³⁸Guzenaimai, Yesus a gegeulanau ebu asai maimai, goagen igul eg memen du aliag imaraimai, du tub Yesus nugau ebeg naliu eiman asai memen, tub ebeg nanai eiman asai

memen. ³⁹Guzenina, duaillel agen abu eiman beten alan ai daremen, go uligaimai, tabaiag kunkunaimai, ze biabial kuai aurai aurai wane anemen. ⁴⁰Goagen guzenai ze menen, “Nagen guzen anemen, na Uwait ecesab muranemen zau banou ticalaimai, gil ainarai ebu koli zau awau mai anemen. Guzenaimai, na Uwait nugau Nag zob, nagtal koli nait enim isanoroimai, a gegeulanau ebuan utei non.”

⁴¹Uwait ula dacanemen dudu banban mui kasai ze tapaimaranem dudu mui agen han guzentel ze biabial kuai auremen. ⁴²Go guzenai ze memen, “Go duaillel ipal isanareun, nugtal koli enib isanorabun iborain tam! Zuda duaillel agal gumarabun du banou king zob, go a gegeulanau ebuan utei nuba, ig go uligaimai, igual oigeb go en petak amam. ⁴³Gonugau ougab Uwait nug en petak aimai, en aneu, ‘Iz Uwait nugau Nag aneu.’ Gonun, Uwait nug go isanuramau ta, ig uligai damam.” *Buk Song 22:8*

⁴⁴Igul eg memen dudu aliag goagen han go guzentel ze biabial kuai auremen.

Yesus noumeun.

(*Mak 15:33-41; Luk 23:44-49; Zon 19:28-30*)

⁴⁵Am gusig ban ula, am ilab tam, em unum umaum sul usalai betei am ameg ainarai umusig. ⁴⁶Guzenai daren daren, am ameg ainarai waugab usalina, Yesus nug guzenai uleun, “Eloi, eloi, lama sabaktani.” Ze go bigeb enai.

‘Izal Uwait, izal Uwait, na einen iz utilem?’ *Buk Song 22:1*

⁴⁷Guzenina, duaillel ipal go ebu tapai daremen agen go ul doimai, enemen, “Go du go Elaiza ulorou!” ⁴⁸Guzenaimai, du tub nug pigai betei ecesab tub ambig sul oimai, wain ze munug, ait kabit ebu maimai, Yesus zabun muramoroi dabeleun. ⁴⁹Bo, duaillel ipal agen du go auremen, “Ig gumei damun, Elaiza nug alai, isanuramau ta, ig uligai damam!”

⁵⁰Yesus nug kolital gusig pet ulaimai, gonugau dorog utei waneun. ⁵¹Ziwas go ebutal, *laplap* Uwait ecesab muranemen zau banou zaueim asai memen dareun, wag eiman bigagai noi betei, aliag usaleun. Guzenina, mim banou zoimai, aitabag banban ula ebutal gugai heicareun. ⁵²Guzenaimai, eb ob han oitina, getalan duaillel go goagal oiagab Uwait en petak emen, noumemen, go koli unum wasemenin. ⁵³Yesus go koli wasena, go noumemen duaillel wasemenin go Zerusalem ban uzan betena, duaillel asiu agen piaremen. ⁵⁴Malai dudu agal du banou go gonugau malai dudu abai go Yesus gumei daremen, mim zoimai, igul beu beu zuna, uligaimai, go banban uminaimai, enemen, “Petak pet, go du go Uwait nugau Nag.”

⁵⁵Ailel asiu getal Galili agaig eiman Yesus isanorabun sesamorai alemen, go ereg tubaiman tapai daimai, Yesus erunamam aimai uligai daremen. ⁵⁶Ailel go ula, air tub gonugau wanib Maria go Magdala

uzanan, air tub gonugau wanib Maria go Zems amag Zosep goagal anaiag, air tub go Zebedi nugau wau, mui, daremen.

Yesus nugau enib oi aizau oug emen.

(Mak 15:42-47; Luk 23:50-56; Zon 19:38-42)

⁵⁷Umusig usalina, du tub aiwag asiu a du aleun. Gonugau wanib Zosep, go Arimatea uzanan, go han Yesus nugau tapaimaraneun du tub. ⁵⁸Go Pailot waugab beteimai, Yesus nugau noumeun enib wabun kanabai aureun. Guzenina, Pailot nug gonugau malai dudu awarina, goagen Yesus nugau noumeun enib oi moromen. ⁵⁹Guzenina, Zosep nug Yesus nugau noumeun enib oimai, tibur galau awau naliu ausiau sil kulai meun. ⁶⁰Go gonugau ob awau nugtal nug nugau enib mabun outai meun, Yesus nugau noumeun enib aizau ob go oug meun. Guzenaimai, aitabag banou oimai, aizau ogusau tapelai maimai, utei waneun. ⁶¹Maria go Magdala uzanan, air tub gonugau wanib Maria, go ob waugab hoboimai, uligai daremen.

Malai dudu agen Yesus nugau ob gumei daremen.

⁶²Nineimai, umaseu, imabun gil ebu Uwait ula dacanemen dudu banban mui kasai ze tapaimaranem dudu mui go Pailot dual alai gotulemen. ⁶³Goagen guzenai auremen, “Du banou, ig ze tub getal du go polu ze meun, du gonug guzeneun domun dabelem, ‘Aiu ses gil ainarai ebu uteimai, iz koli asanai’ eun. ⁶⁴Guzeneun, gonun, na nait malai dudu awaremun, goagen eb ob suban gumei damam, betei gil ainarai utamam. Guzenemun, gonugau tapaimaraneun dudu agen gonugau noumeun enib i zob umam. Na go i guzenab, goagen gonugau noumeun enib zob umam. Guzenaimai, duaille guzenai awaramam, ‘Go noumaimai, koli ob oug eiman waseun.’ Getal go guzenai polu ze meun, ‘Iz Kristus.’ Go ulis guzenai polumamam, ‘Go noumaimai, koli waseun.’ Go ulisan polu ze nug getal polu ze mareun zilauramau.”

⁶⁵Guzenai aurina, doimai, Pailot nug dudu banban go awareun, “Malai dudu ipal imaraiban, betei go ob suban gusig gumamamen.”

⁶⁶Guzenaimai, go betei ob ebu aitabag banou us sil kiai maimai, seg maimai, malai dudu ipal agen go ob gumei daremen.

Yesus koli waseun.

28 ¹Imabun ziwaz mazicina, umaseu Ban Zobu ebu Magdala uzanan Maria mui, Maria tub dual go Yesus nugau ob piabun betemen.

²Pigai mim banou zuna, Uwait Ban nugau tibur tub Mesgai utei noimai, aitabag banou ob ogusau tapelai memen ebuan ilacil betei maimai, go go ebu hobi dareun. ³Gonugau siameg amel nugau hilanau sul. Gonugau tibur galau pi ausiau sul. ⁴Malai dudu ob gumei daremen, ag go uligaimai, esilakaimai, banban uminaimai, go dudu noumemen sul ninemen.

⁵Go guzenina, Uwait nugau tibur nug ailel aliag go awareun, “Ag i uminan. Iz abiu ag go du Yesus a gegeulanau ebu asai memen noumeun piabun itanemen. ⁶Go e ebu i dareu. Getal go ze meun sultal go koli waseun. Go gabuai memen empip alai pian. ⁷Ag guzenaiban, pigai beteiban, gonugau tapaimaraneun dudu awaramamen. Yesus go ob ebuun koli waseun, go amegai Galili agaig beteu, ag sesamorai bitamamen. Ag go ebu betei pimamen. Izal ze e awarem subantal dabilamamen.”

⁸Ailel aliag go uminemen, bo, pigai ob uteimai, siksikaimai, gonugau tapaimaraneun dudu awarabun betemen. ⁹⁻¹⁰Abu ebu betena, Yesus nug pigai zoi piaraimai, awareun, “Zaug dual.” Guzenai awarina, goagen waugab zoimai, gonugau arab pataimai, gonugau wanib ulagwag morona, Yesus nug ailel aliag go awareun, “Ag i uminan. Ag betei izal tapaimaranemin dudu awarebi, Galili betei peilamam.”

Malai dudu agal ze.

¹¹Ailel aliag go abu ebu bete betena, ob gumemen malai dudu ipal agen ban uzan beteimai, Uwait ula dacanemen dudu igul banban go zoun unum awaremen. ¹²Uwait ula dacanemen dudu banban mui, uzanan dudu banban mui, agzozou ze pataimai, aiwag asiu oimai, malai dudu maremen. ¹³Goagen malai dudu guzenai awaremen. “Ag guzenai ze mamamen, ‘Ig umaum ninena, gonugau tapaimaraneun dudu agen zoimai, gonugau noumeun enib zob oi wanemen.’ guzenai awaran. ¹⁴Guzenina, Pailot go ze go duba, iguan go guzenai auramam, go igul eg tub i meun, gonun, ag go igul en oiagab eg i umau.”

¹⁵Guzenina, malai dudu agen aiwag go oimai, ze awaremen sultal sesamoremenin. Guzenina, ze go nug Zuda agal emgasag unum betei iboreun. Ze go Zuda duaillel ulis guzentel ze mai darem.

Yesus gonugau tapaimaraneun dudu ameagab usaleun.

(Mak 16:14-18; Luk 24:36-49; Zon 20:19-23; Aposel 1:6-8)

¹⁶Yesus nugau tapaimaraneun dudu nigbasig agen Galili beteimai, Yesus nug getal awareun em tabag go ebu betemen. ¹⁷Go ebu, go uligaimai, ulagwag moromen. Bo, tapaimaraneun dudu ipal go dabeleu aliag mui. ¹⁸Yesus go waiagab zoimai, guzenai awareun, “Uwait nug Mesgai mui, em mui, gumabun gusig go unum iz mileun. ¹⁹Gonun, ag emgasag unum beteiban, duaillel go izal ze abai marebi, goagal oiagab kekulebi, izal tapaimaranem dudu usalebi, agen betei, Mekai nugau wanib mui, Nag nugau wanib mui, Ah Wes nugau wanib ebu, duaillel ze ziwaramamen. ²⁰Ag ze go abai maremin agen mui koli duaillel abai maramamen. Guzenamamen, iz ag abai muzmuz dai, guzentel betei sisiarabun ziwasa alamau.”